



THEOT Deuteronomy in EthioSPaRe Ura Masqal 40

Ff. 139r–170v

Draft 1, Text of Deuteronomy in Mahabire Hawariyat electronic edition; the following people were involved in creating second, third, and fourth drafts: Jeremy Brown, Ralph Lee, Rowan Williams, Shaun Short, Jonah Sanford, Ashlee Maslik, Curt Niccum, Brian Jeanseu, and Jarod Jacobs; Draft 5, Hiwot Samuel; Draft 6, Steve Delamarter and Daniel Assefa; Draft 7, Ralph Lee

Nota Bene: Images can be viewed at the EthioSPaRe website at

https://mycms-vs03.rz.uni-hamburg.de/domlib/receive/domlib_document_00001313?images=yes&genDesc=yes&phDesc=no&cnDesc=0&col=no&add=no&decor=no&keywords=no (a user account with Digital Oriental Manuscripts Library (DOMLib), director Denis Nosnitsin, is needed to view these images)

Chapter 1

Deut 01:00 ዳግመ አራት

Deut 01:01 ዝንቱ ነገሮ ዘነሮሙ ሙሴ ለኵሉ እስራኤል በመዕድብ ዮርዳንስ በመንገል ዐረቢሁ በኃብ ባሕረ ኤርተራ በማእከል ፋራንጦፊል ወሎጥን ወአውሎን ወዘካሪሲያ።

Deut 01:02 በዐሡር መዋዕል በኮሬብ በፍኖተ ደብረ ሴይር እስከ ቃዴስ በርኔ።

Deut 01:03 ወኮነ አመ አርብዓ ዓም እመ ዐሡርቱ ወአሐዱ አውራኅ አመ ሠርቀ ወርኅ ነገሮሙ ሙሴ ለኵሉ ደቂቀ እስራኤል ኵሉ ዘአዘዘ እግዚአብሔር ይንግሮሙ።

Deut 01:04 እምድኅረ ቀተልዎ ለሴዎን ንጉሠ አሞሬዎን ዘይነብር (ዘው)ስተ ሔሴቦን ወአግ ንጉሠ ባሳን ዘይነብር ውስተ አስጣሮት ወኤኔድራይን

Deut 01:05 በማዕድብ ዮርዳንስ ውስተ ምድረ ሞአብ ወአኅዘ ሙሴ ይንግር ዘንተ ሕገ ወያቤ እግዚአብሔር አምላክነ ነገረነ በኮሬብ ወይቤለነ ይአክለክሙ ኅደሩ



Deut 01:06 ውስተ ዝንቱ ደብር ተንሥኡ እንከ ወግብኡ ወባኡ ውስተ ደብረ አሞሬዎን ወውስተ ኩሉ መጋደረ አራባ ወውስተ ደብሩ ወውስተ ገዳሙ ወውስተ ሊባ ወውስተ ጳራ[ል]ያ ዘምድረ ከናኦን ወአንጢ[ሊባ]ኖን እስከ ፈለገ ዐቢይ ፈለገ አፍራጥስ

Deut 01:07 ናሁ ወሀብኩክምዎ ለይእቲ ምድር እንተ መሐልኩ ለአበዊክሙ ቅድሜክሙ ለአብርሃም ወለይስሐቅ ወለያዕቆብ ከመ አሀቦሙ ሎሙ ወለዘርአሙ እምድጎሬሆሙ ምድር እንተ ትውሕዝ ሐሊበ ወመዐረ

Deut 01:08 ወእቤለክሙ በውእቶን መዋዕል እንዘ እብል ኢይክል ባሕቲትየ ክሂሎተክሙ እስመ አብዝኅን እግዚአብሔር አምላክነ

Deut 01:09 ወናሁ ብዙኃን አንትሙ ዮም ከመ ኮከበ ሰማይ

Deut 01:10 ወያብዝኅክሙ እግዚአብሔር አምላኩሙ ለአበዊክሙ ምእልፊት ወይባርክሙ በከመ ይቤለክሙ

Deut 01:11 ወእፎ እክል ባሕቲትየ ጸማክሙ ወሥራሕክሙ ወተባህሎተክሙ

Deut 01:12 አውፀኡ ለክሙ ዕደው ጠቢባነ ወለባዊያነ ወማእምራነ ዘዘ ነገድክሙ ወእሠይሞሙ ለክሙ መሳፍንቲክሙ

Deut 01:13 ወአውሠእክሙኒ ወትቤሉኒ ሠናይ ዝንቱ ቃል ወትቤሉኒ ግበር ከማሁ

Deut 01:14 ወነሣእኩ እምወስቴት(ክሙ) ዕደው ጠቢባነ ወመእምራነ ወለባዊያነ ወሂምክምሙ ለዕሌክሙ ይኩኑክሙ ሐበይተ መመሳፍንተ ወነገሥተ ሕዝብ ወሊቀናተ ወጸሐፍተሙ ለመኳንንቲክሙ

Deut 01:15 ወእቤሎሙ በውእቶን መዋዕል ስምዑ መእከለ አጋዊክሙ ወአግብኡ ፍ(ት)ሐ በጽድቀ መእከለ ብእሲ ወእኅሁ ወመእከለ ግዩር

Deut 01:16 ወኢትንሠእ ገጸ በፍትሕ ኢለንኡስ ወኢለዐቢይ ኩንን ወኢትሣእ ገጸ ሰብእ እስመ ፍትሕ ዘእግዚአብሔር ውእቱ ወለእመቦ ዘተግጸበክሙ ነገር ታዐርጉ ኀቤየ ወአሰምዎ

Deut 01:17 ወእዘዝኩክሙ በውእቶን መዋዕል ኩሎ ዘትገብሩ ቃለ

Deut 01:18 ወግ(ዕ)ዝነ እምነ ኮረብ ወሐርነ ኩሎ ዝክተ ገዳመ ዐቢየ ወግሩም ዘርኢክሙ በፍኖተ ደብር አሞሬዎን በከመ አዘዘነ እግዚአብሔር አምላክነ ወበጻሕነ እስከ ቃዴስ በርኔ

Deut 01:19 ወነገርኩክሙ በውእቶን መዋዕል ወእቤለክሙ በጽሑ እስከ ደብረ አሞሬዎን ዘይሁበክሙ እግዚአብሔር አምላክክሙ

Deut 01:20 ወናሁ ርእዩ ከመ ወሀበክሙ እግዚአብሔር አምላክክሙ ይእተ ምድር ቅድመ ገጽክሙ ዕርጉ እንከ ወተዋረስዋ በከመ ይቤሎ{.}ሙ እግዚአብሔር አምላክሙ ለአበዊነ ወኢትፍርሁ ወኢትደንግፁ



Deut 01:21 ወእምዘ መጻእክሙ ኩለክሙ ኅቤየ ወትቤሉኒ ንፈኑ ዕደወ ቅድሜነ ወይርአይዋ ለነ ይእቲ ምድር ወይዜንውነ ዜናሃ ለይእቲ ፍኖተ እንተ ሀለወትነ ንዕረግ ውስቴታ ወአህጉርኒ እለ ሀለዋነ ንባእ ውስቴቶን

Deut 01:22 ወአደመኒ ውእቱ ነገር ወነሣእኩ እምውስቴተክሙ ዐሠርተ ወክልኤተ ዕደወ በበ አሐዱ ብእሲ እምውስተ ነገድ

Deut 01:23 ወተመይጡ ወዐርጉ ውስተ ቈለተ ዓጽቅ ወይርአዪ

Deut 01:24 ወነሥኡ ምስሌሆሙ እምውስተ ፍሬሃ ለይእቲ ምድር ወአምጽ[ኡ] ኅቤነ ወንቤ ሠናይት ምድር እንተ ይሁበነ እግዚአ ብሔር አምላክነ

Deut 01:25 ወአበይክሙ ዐሪገ ወክሕድክሙ በቃለ እግዚአ ብሔር አምላክክሙ

Deut 01:26 ወአንጐርጐርክሙ በውስተ ተዕይኒክሙ ወትቤሉ እስመ ይጻልክነ እግዚአ ብሔር አውፅክነ እምድረ ግብጽ ከመ ያግብክነ ውስተ እዴሆሙ ለአሞሬዎን ወከመ ይሠርውነ አይቱ እንከ ንዓርግ ንሕነ

Deut 01:27 ወባሕቱ አኅዊክሙ አክሐድዎ ለልብክሙ ወይቤሉክሙ ዐቢየ ሕዝብ ወበዙኅ ወይጸንዑ እምኔነ ወአህጉሪሆሙኒ ዓበይት ወቦንተ ቅጽረ ዘይበጽሕ እስከ ሰማይ ወርኢነ ብህየ ደቂቆሙ ለእለ ያርብሕ

Deut 01:28 ወእቤለክሙ በውእቶን መዋዕል ኢይትፍርሁ ወኢትደንግፁ እምኔሆሙ

Deut 01:29 እግዚአ ብሔር አምላክነ ውእቱ ይፀብእ ምስሌክሙ ውእቱ ዘይሐውር ቅድመ ገጸክሙ በከመ ኩሉ ዘገበረ ለክሙ በምድረ ግብጽ

Deut 01:30 ወበውስተ ዝንቱ ገዳም ዘርኢክሙ ዘከመ ይሴሰየከ እግዚአ ብሔር አምላክከ ከመ ይሴሲ ብእሲ ወልዶ በኩሉ ፍኖት እንተ ሐርክሙ እስከ በጻሕክሙ ውስተ ዝንቱ መካን

Deut 01:31 ወኢአመንክምዎ በዝንቱ ቃል ለእግዚአ ብሔር አምላክክሙ ዘየሐውር ቅድሜክሙ ውስተ ፍኖት ከመ ይኅረይ ለክሙ መካነ ወይመርሐክሙ ሌሊት ከመ ያርኢክሙ ፍኖት እንተ ተሐውሩ ውስቴታ ወመዐልተኒ በደመና

Deut 01:32 ወስምዐ እግዚአ ብሔር ቃለ ነገርክሙ ወተምዕዐ ወመሐለ ወይቤ ከመ ኢይርአይዋ ለይእቲ ምድር ቡርክት እንተ መሐልኩ ለአበዊሆሙ እንበለ ካሌብ ወልደ ዮፎኒ

Deut 01:33 ውእቱ ዝይሬእያ ወሎቱ እሁባ ለይእቲ ምድር እንተ ውስቴታ ዐርገ ወለደቂቁ እስመ ኅብ እግዚአ ብሔር ውእቱ ልቡ

Deut 01:34 ወኪያየኒ ተምዕዕኒ እግዚአ ብሔር በእንቲአክሙ ወይቤለኒ አንተሂ ኢትበውእ ህየ



Deut 01:35 እስመ ኢየሱ ወልደ ነዌ ዘይቀውም ቅድሜከ ውእቱ ዘይበውእ ህየ ኪያሁ አጸንዖ እስመ ውእቱ ያወርሶሙ ይእተ ምድር ለእስራኤል

Deut 01:36 ወደቂቅክሙ እለ ትቤሉ ይዪወው ወኸሉ ሕፃን ንኡስ ዘኢያኣምር ዮም ሠናየ ወእኪት እሙንቱ ይበውኡ ህየ ወሎሙ እሁባ ወእሙንቱ ይትዋረስዋ

Deut 01:37 ወአንትሙስ ተመየጥክሙ ወገዐዝክሙ ውስተ ገዳም ፍኖተ ባሕር ኤርተራ

Deut 01:38 ወአውሣእክሙኒ ወትቤሉኒ አበስነ ቅድመ እግዚአ ብሔር ኣምላክነ ንዐርግ ንሕነ ወንትቃተል ኩሎ ዘከመ አዘዘነ እግዚአ ብሔር ኣምላክነ ወነሠእክሙ ብእሲ ንዋየ ሐቅሉ ወዐረግሙ ውስተ ደብር

Deut 01:39 ወይቤለኒ እግዚአ ብሔር በሎሙ ኢትዕረጉኣ ወኢተትቃተሉኣ እስመኣ ኢሀለውኩኣ ምስሌክሙኣ ከመኣ ኢትትቀጥቀጡኣ ቅድመኣ ፀርክሙኣ

Deut 01:40 ወነገርኩክሙ ወኢሰማዕክሙኒ ወተዐወርክሙ ቃለ እግዚአ ብሔር ወተሐየልክሙኒ ወዐረግሙ ውስተ ደብር

Deut 01:41 ወወፅኡ ኣሞራዎን እለ ይነብሩ ውስተ ውእቱ ደብር ወቀተሉክሙ ወአንጥዑክሙ ወሰደዱክሙ ወነደፉክሙ ከመ ንህብ ወወግኡክሙ እምነ ሴይር እስከ ሔርማ

Deut 01:42 ወነበርክሙ ወበከይክሙ ቅድመ እግዚአ ብሔር ወኢሰምዐክሙ ቃልክሙ ወ(ኢ)ነጸረክሙ

Deut 01:43 ወነበርክሙ ውስተ ቃዴስ ብዙኅ መዋዕለ ኣምጣነ ነበርክሙ ቀዲሙ ህየ

Deut 02:01 ወተመየጥነ ወሖርነ ውስተ ገዳም ፍኖተ ባሕረ ኤርተራ በከመ ይቤለኒ እግዚአ ብሔር ወኣድናሁ ለደብረ ሴይር ብዙኅ መዋዕለ

Deut 02:02 ወይቤለኒ እግዚአ ብሔር ኮነክሙ ኣዊዶቶ ለዝንቱ ደብር ግብኡ እንከስ ለመንገለ ምስዕ

Deut 02:03 ወአዝዞሙ ለሕዝብ ወበሎሙ ናሁ ተሐውሩ አንትሙ እንተ ኣድዋሊሆሙ ለኣኅዊክሙ ለደቂቀ ኤሳው እለ ይነብሩ ውስተ ሴይር ወይፈርሁክሙ ጥቀ

Deut 02:04 ዑቁ ኢትትቃተሉ ምስሌሆሙ እስመ ኢእሁበክሙ እምውስተ ምድሮሙ ርስተ ወኢምስጋረ እግር እስመ መክፈልቶ ወሀብክዎ ለኤሳው ደብረ ሴይር

Deut 02:05 ተሣየጡ እክለ በኅቤሆሙ በወርቅክሙ ወተሴሰዩ ወማየኒ በመስፈርተ ንሥኡ በኅቤሆሙ በወርቀክሙ ወስትዩ እስመ ባረከከ እግዚአ ብሔር ኣምላክከ በኩሉ ግብረ እደዊከ



Deut 02:06 አእምር እፎ ዐደውካሁ ለዝንቱ ገዳም ዓቢይ ዘግሩም ውእቱ ናሁ አርብዓ ዓም ሀለወ ምስሌክ እግዚአብሔር አምላክክ እንዘ አልቦ ዘያሐጥአክ እምዘ ነበብክ

Deut 02:07 ወተዐደውናሆሙ ለኢጎዊክሙ ለደቂቀ ኤሳው እለ ይነብሩ ውስተ ሴይር ኀበ ፍኖተ አራባ እምነ ኤሎም ወእምነ ጋስዮን ጋቤር ወእምዝ ተመየጥነ ወዐደውነ ፍኖተ ገዳም ዘሞአብ

Deut 02:08 ወይቤለኒ ኢትጻረርዎሙ ለሞአባዊያን ወኢትትቃተሉ ምሴሌሆሙ እስመ ኢእሁብክሙ ርስተ እምነ ምድሮሙ እስመ ለደቂቀ ሎጥ ወሀብክዎሙ ርስቶሙ ሴይር

Deut 02:09 ወአሚን ይቀድሙ ነቢረ ውስቴታ ሕዝብ ዐቢየ (ጥቀ) ወጽኑዓን ከመ እለ ውስተ አቂም

Deut 02:10 ወሞአባዊያን ወዘሚን ይብልዎሙ

Deut 02:11 ወኬሬዎስ ውስተ ሴይር ይነብሩ ቀዲሙ ደቂቀ ኤሳው አጥፍእዎሙ ወቀጥቅጥዎሙ እምቅድመ ገጽሙ ወነበሩ መካኖሙ ከመ ገብርዋ እስራኤል ለምድር ርስቶሙ እንተ ወሀቦሙ እግዚአብሔር

Deut 02:12 ወይእዜኒ ተንሥኡ ወገዐዙ አንትሙ ወሐሩ ውስተ ቈላተ ዛሬድ ወተዐደውናሆሙ ለቈላተ ዛሬድ

Deut 02:13 ወመዋዕሊሁ በዘ ቦንቱ እምቃዴስ በርኔ እስከ ተዐደውናሁ ለቈላተ ዛሬድ ሠላሳ ወሰመንቱ ዓመት እስከ ሞቱ ኩሎሙ ዕደው ዘይእቲ ተውልድ እለ መስተቃተላን እሙንቱ ወጠፍኡ እምነ መእከለ ትዕይንተ በከመ መሐለ ሎሙ እግዚአብሔር እግዚእ

Deut 02:14 እስመ እደ እግዚአብሔር ሀለወት ለዕሌሆሙ ከመ ታጥፍአሙ እምነ መእከለ ትዕይንተ እስከ ወድቁ

Deut 02:15 (ወ)ኮነ እምዘ ወድቁ ኩሎሙ ውእቶሙ ዕደው መስተቃተለን ወሞቱ እምነ መእከለ ሕዝብ

Deut 02:16 ወነበቦ እግዚአብሔር ለሙሴ ወይቤሎ ናሁ ተሐውር አንተ ውስተ አድዋለ ሞአብ ዘሴይር ወትበጽሑ ቅሩቦሙ ለደቂቀ ዓማን

Deut 02:17 ኢትጻረርዎሙ ወኢትትአጎዙ ቀትለ ምስሌሆሙ እስመ ኢእሁብክሙ እምነ ምድሮሙ ለደቂቀ ዐማን ርስተ እስመ ለደቂቀ ሎጥ ወሀብክዎሙ መክፈልቶሙ

Deut 02:18 ይእቲ ወራፋይን ትትሔለቀ እስመ ራፋይን ይነብሩ ውስቴታ ቀዲሙ ወዓማዊያን ዘሚን ይብልዎሙ

Deut 02:19 ሕዝበ ዐቢይ ውብዙኀ ወጽኑዓን ወኀያላን ከመ እለ አቂም ወአጥፍአሙ እግዚአብሔር እምቅድመ ገጽሙ

Deut 02:20 ወትወርስዎሙ ወነበሩ ህየቴሆሙ ከመ ገብሩ ለደቂቀ ኤሳው እለ ይነብሩ ውስተ ሴይር በከመ አሥዐሮሙ እግዚአብሔር ለከራዊያን እምቅድመ ገጽሙ ወትወርስዎሙ ወነበሩ ህየቴሆሙ እስከ ዛቲ ዕለት



Deut 02:21 ወሐዋውያንኒ እለ ይነብሩ ውስተ አሴርት እስከ ጋዜሰ ወቀጵዶቅያ ወአጥፍእዎሙ ወነበሩ ህየቴሆሙ

Deut 02:22 ወይእዜኒ ተንሥኡ ወግዐዙ አንትሙ ወተዐድውዎ ለቁላተ አርኖን ናሁ አግባእክዎ ለሴዎን ለንጉሠ ሔሴቦን ከርያዊ ወለምድሩ ወምለካ ወተዋረሳ ወአኅዞሙ ወተቃተሎሙ

Deut 02:23 ወበዛቲ ዕለት ቅድም አምጸአ ላዕለ ኩሉ አሕዛብ እለ ሀለው መተሕተ ሰማይ ከመ ይፍርሁከ ወይርዐዱ እምኔከ ወይደንግፁ እመከመ ስምዑ ስምከ ወትእኅዞሙ ፍርሀት እምቅድመ ገጽከ

Deut 02:24 ወፈነውከ ተናብልተ እምነ ገዳም ዘቁድምት ኅበ ሴዎን ንጉሠ ሔሴቦን በቃለ ሰላም እንዘ ትብል እኅለፍአ እንተአ ምድርከአ ፍኖተአ አሐውርአ ኢእትገሐስአ ኢለየማንአ ወኢለፀጋምአ

Deut 02:25 አክለኒአ በወርቂየአ ትሁብኒአ ወእሴሰይአ ወማይኒአ በወርቅየአ ትሁቡኒአ ወእሰቲአ ወዳእሙአ አኅልፍአ በእግርየአ

Deut 02:26 በከመአ ገብሩአ ሊተአ ደቂቀአ ኤሳውአ እለአ ይንብሩአ ውስተአ ሴይርአ ወሞአብያዊያንኒአ እለአ ይነብሩ(አ) አሮየርአ እስከአ ተዐደውክዎ አ ለዮርዳንስአ ውስተአ ምድርአ እንተአ ወሀበነአ እግዚአ ብሔርአ አምላክነአ

Deut 02:27 ወአቦየ ሴዎን ንጉሠ ሔሴቦን አኅልፎትነ እንተ ኅቤሁ እስመ አጽንዐ እግዚአ ብሔር አምላክነ መንፈሶ ወእእከዮ ለልቡ ከመ ይግባእ ውስተ እዴነ በይእቲ ዕለት

Deut 02:28 ይቤለኒ እግዚአ ብሔር ናሁ አኅዝኩ አግብአ ውስተ እዴከ በቅድመ ገጽከ ለሴዎን ንጉሠ ሔሴቦን አሞርያዊ ወምድሮሂ ወአኅዝ ተዋረስ ምድሮ ርስተ

Deut 02:29 ወወፅአ ሴዎን ወተቀበለነ ውእቱ ወኩሉ ሕዝቡ ከመ ይትቃተለነ በኢያስ

Deut 02:30 ወአግብአ እግዚአ ብሔር አምላክነ ውስተ እደዊነ ወቀተልናሁ ሎቱ ወለኩሉ ደቂቁ ወለኩሉ ሕዝቡ

Deut 02:31 ወነሠእነ ኩሎ አህጉሪሁ በውእቶን መዋዕል ወአጥፋእናሆን ለኩሎ አህጉሪሁ ወአንስቲያሆሙኒ ወደቂቆሙኒ ወአልቦ ዘአትረፍን ነፋጺት ዘእንበለ እንስሳሆሙ ዘመሀረክነ ለነ ወበርበርነ አህጉሮሙ

Deut 02:32 ዘነሠእነ እምነ አሮኤር እንተ መዕዶተ ፈለግ አርኖን ወሀገረኒ እንተ ሀለወት ውስተ ቁላተ እስከ ደብረ ገላአድ

Deut 02:33 ወአልቦ ሀገር እንተ አምሰጠተነ እስመ ኩሎ አህጉር አግብአ እግዚአ ብሔር አምላክነ ውስተ እደዊነ ዘእንበለ ውስተ ምድረ ደቂቁ ዐሞን ዘኢበጸኅን

Deut 02:34 ወኩሎ ዘውስተ ፈለገ ያቦቅ ወአህጉር ዘውስተ ቴርኔ በከመ አዘዘነ እግዚአ ብሔር አምላክነ



Deut 03:01 ወተመየጥነ ወዐረግነ ውስተ ፍኖተ ባሳን ወወፅአ አግ ንጉሠ ባሳን ተቀበለነ ውእቱ ወኵሉ ሕዝቡ ውስተ ኤድራይን ከመ ይትቃተለነ

Deut 03:02 ወይቤለኒ እግዚአብሔር ኢትፍርሆ እስመ ውስተ እዴከ አገብአ ወለኵሉ ሕዝቡ ወለኵሉ ምድሩ ወትገብሮ ከመ ገበርካሁ ለሴዎን ንጉሠ ኤሞሬዎን ዘይነብር ውስተ ሔሴቦን

Deut 03:03 ወአግብአ እግብአ ብሔር አምላክነ ውስተ እዴነ ለአግ ንጉሠ ባሳን ወለኵሉ ሕዝቡ ወቀተልናሁ እስከ ኢያትረፍነ እምኔሁ ዘርአ

Deut 03:04 ወአስተጋብእነ ኵሉ አህጉሪሁ በውእቶን መዋዕል ወአልቦቱ ሀገረ እንተ ኢነሠእነ እምኔሆሙ ስሳ አህጉር ኵሉ ዘኣድያማ ለአርጎ ዘመንግሥቱ ለአግ በባሳን

Deut 03:05 ወኵሉን አህጉር እለ ቦንቱ ጥቅመ ወነዋኅተ አረፋቲሆን ወቦንቱ ዴዳት ወመናስግተ ዘእንበለ አህጉረ ፌሬዜዎን እለ ብዙኃት እማንቱ ጥቀ

Deut 03:06 ወሠረውናሆሙ በከመ ገበርነ በሴዎን ንጉሠ ሔሴቦን ወአጥፋእነ ኵሉ አህጉር ኅቡረ ወአንስቲያሆሙኒ ወደቂቆሙኒ እስከ ኢያትረፍነ ነፋጺት

Deut 03:07 ወኵሉ እንስሳሆሙ ወምህርካ ዘበርበርነ እምነ አህጉሪሆሙ

Deut 03:08 ወነሠእነ ምድሮሙ በውእቶን መዋዕል እምውስተ እደቂሆሙ ለክልኤቱ ነገሥተ አሞሬዎን እለ ሀለው መዕዶተ ዮርዳንስ እምፈለገ አርኖን ዘይብሉ ወእስከ አኤርሞን ዘይብልዎ ሰብአ ፊንቄስ አኤርሞን ወሰኒርዮስ ወኤሞሬዎን ወይብልዎ ሳኒር

Deut 03:09 ኵሉ አህጉር ዘመንግሥተ አሰሚሳር ወኵሉ ዘገለኤድ ወኵሉ ዘባሳን እስከ ኤልካድ ወኤድራይን ሀገረ መንግሥቱ ለአግ በባሳን እንተ አትረፋ ራፋይን

Deut 03:10 ወናሁ ዐራቱ ዐራተ ኀጺን ወናሁ ሀለወት ውስተ ጽንፎሙ ለደቂቀ ዐሞን ተሳዕ በእመት ኑኃ ወርብዕ በእመት ግድማ በእመተ ብእሲ

Deut 03:11 ወበርበ(ር)ናሃ ለይእቲ ምድር በውእቶን መዋዕል እምአሮኤር እንተ ውስተ ማዕዶተ ፈለገ አርኖን ወመንፈቃ ለደብረ ገለአድ ወአህጉሪሁኒ ወወሀብክዎሙ ለሮቤል ወለጋድ

Deut 03:12 ወዘተረፈ እምነ ገላአድ ወኵሉ ባሳን መንግሥቶ ለአግ ወሀብክዎ ለመንፈቀ ነገዱ ለምናሴ ወኵሉ አድያሚሃ ለአርጎብ ኵሉ ዝንተ ባሳን ዘይትኃለቑ ውስተ ምድረ ራፋይን

Deut 03:13 ወኢያኦሮ ወልደ መናሴ ነሥአ ኵሉ አድያሚሃ ለአርጎብ እስከ ደወለ ገርጋሲ ወመካጢ ሰመዮን (በ)ስሙ ለባሳን አውታይ እስከ ዛቲ ዕለት ወለማኪር ወሀብክዎ ገላአድ



Deut 03:14 ወለሮቤል ወለጋድ ወሀብክም እምነ ምድረ ገለአድ እስከ ፈለገ አርኖን ዘማእከለ ፈለገ አድባር ወእስከ ኢያበቅ ፈለገ አድባር ለደቂቀ ዓማን

Deut 03:15 ወአራባ ወዮርዳንስ ወሰኖም ለመካናራ ወእስከ ባሕረ አራባ ባሕረ አሊቄ እምአ ሴደን ዘፋሰጋ ጽባሒሁ

Deut 03:16 ወአዘዝኩክም በውእተን መዋዕል ወእቤለክም እግዚአ ብሔር አምላክክም ወሀበክም ለዛቲ ምድሮ መክፈልተክም ከመ ትሐሩ ቅድመ አኅዊክም ምስለ ንዋየ ሐቅለክም ቅድሜሆም ለደቂቀ እስራኤል ኩሉ ኃያል

Deut 03:17 ዘእንበለ አንስቲያክም ወደቂቀክም ወአአምር ከመሂ ብዙኅ እንስሳ በክም

Deut 03:18 ወይነብር ባሕቱ ውስተ አህጉሪክም ዘወሀብኩክም እስከ አመ ያዐርፎም እግዚአ ብሔር አምላክነ ለአኃዊክም ከማክም

Deut 03:19 ወይወርሱ እሙንቱኒ ምድረ እንተ ይሁቦም እግዚአ ብሔር አምላክነ በማዕዶተ ዮርዳንስ ወእምዝ ትገብኡ ኩልክም ውስተ ርስተክም ዘወሀብኩክም

Deut 03:20 ወአዘዝክም ለኢያሱኒ በውእቶን መዋዕል ወእቤሎ ርእያ አዕይንቲክም ኩሎ ዘገብረ እግዚአ ብሔር በእሉ ክልኤቱ ነገሥተ ከማሁ ይገብር እግዚአ ብሔር በኩሉ መንግሥት ኅበ ተሐውር አንተ ህየ ወኢትፍርሁ እምኔሆም እስመ እግዚአ ብሔር ይፀብእ ለክም

Deut 03:21 ወሰአልክም ለእግዚአ ብሔር በውእቶን መዋዕል ወእቤሎ እግዚአ እግዚአ ብሔር አንተ አኅዝክ ታርኢዮ ለገብርክ ጽንዓክ ወኅይልክ ወ{አ}ጽንዓ ያዴክ ወልዕለ መዝራዕተክ ወመኑ ውእቱ አምላክ በሰማይ ወበምድር ዘይገብር በከመ ገበርክ አንተ

Deut 03:22 አብሐኒ እዕዱ ወእርኣያ ለይእቲ ምድር ቡርክተ ይእቲ እንተ ሀለወት ማዕዶተ ዮርዳንስ ወውእቱ ደብር ቡሩክ ወአንጢሊባኖን

Deut 03:23 ወተጸመመኒ እግዚአ ብሔር ወኢሰምዐኒ ወይቤለኒ እግዚአ ብሔር ኮነክ አከለክ ወኢትድግም እንክ ተናግሮ ዝንተ ቃለ ዕርግ ውስተ ርእሰ ዘውቅሮ

Deut 03:24 ወነጽር በአዕይንቲክ መንገለ ባሕር ወምስዕ ወአዜብ ወሠረቀ ወርኢ በአዕይንቲክ እስመ ኢተዐድዎ ለዝንቱ ዮርዳንስ

Deut 03:25 ወአዝዞ ለኢየሱ ወጽንዖ ኪያሁ እስመ ውእቱ ይዕዱ ቅድሜሁ ለዝንቱ ሕዝበየ ወውእቱ ያወርሶም ምድረ እንተ ርኢክ

Deut 03:26 ወነበርኒ ውስተ ወግር ኅበ ቤተ ፌጎር



Deut 04:01 ወይእዚኒ እስራኤል ሰምዑ ኩነኔሁ ወፍትኖ ዘእሜህረክሙ ኣነ ዮም ከመ ትግበሩ ወትሕየው ወትትባዝኑ ወትምልኡ ወትትዋረስዋ ለምድር እንተ ይሁበክሙ እግዚአብሔር ኣምላኩሙ ለኣበዊክሙ

Deut 04:02 ኢትወስኩ ለዕለ ቃል ዝእኤዝዘክሙ ኣነ ዮም ከመ ትዕቀቡ ኩሎ ትእዛዞ ለእግዚአብሔር ኢትወስኩ እምኔሁ ወኢትንክዩ

Deut 04:03 ኣዕይንቲክሙ ርእያ ኩሎ ዘገብረ እግዚአብሔር ኣምላክነ በብዔል ፌጎር እስመ ኩሎ ብእሲ ዘሐረ ድጎሬሁ ለብዔልፌጎር ቀጥቀጦ እግዚአብሔር ኣምላክክሙ እምኔክሙ

Deut 04:04 ወኣንትሙስ እለ ገባእክሙ ኀበ እግዚአብሔር ኣምላክክሙ ሕያው ኩልክሙ ዮም

Deut 04:05 ናሁ ርእዩ ዘኣርኣይኩክሙ ኩነኔ ወፍትሐ በከመ ኣዘዘኒ እግዚአብሔር እግበር ከማሁ በምድር እንተ ትበውኡ ህዩ ከመ ትትዋርስዋ

Deut 04:06 ወዕቀብዎ ወግበርዎ እስመ ውእቱ ጥበቢክሙ ወኣእመሮተክሙ በቅድመ ኩሎ (ኣ)ሕዛብ እለ ይሰምዑ ለዝንቱ ኩሎ ኩነኔ ወይብሉ ናሁ ሕዝብ ጠቢብ ወመእምር ሕዝብ ዐቢይ ውእቱ ዝንቱ

Deut 04:07 ወመኑ ውእቱ ሕዝብ ዐቢይ ዘቦቱ ኣምላክ ዘይቀርቦ ከመ ኣምላክነ እግዚአብሔር በኩሎ ዘጸውዕናሁ

Deut 04:08 ወመኑ ውእቱ ሕዝብ ዐቢይ ዘቦቱ ኩነኔ ወፍትሕ ዘጽድቅ በከመ ኩሎ ዝንቱ ሕግ ዘኣነ እሁበክሙ ዮም ቅድሜክሙ

Deut 04:09 ዑቅ ርእስከ ወዕቀብ ነፍስከ ጥቀ ከመ ኢትርሳዕ ኩሎ ዘንተ ነገር ዘርእያ ኣዕይንቲከ ወኢይዓእ እምነ ልብከ [በ]ኩሎ መዋዕለ ሕይወተከ ወመህሮሙ ለደቂቀከ ወለደቂቀ ደቂቀከ

Deut 04:10 ወኣይድዖሙ ዕለተ ቆምክሙ ቅድመ እግዚአብሔር ኣምላክክሙ በኮሬብ ኣመ ዕለተ ተጋባእክሙ እስመ ይቤለኒ እግዚአብሔር ኣስተጋብኣሙ ለሕዝብ ኀቤየ ወይሰምዑ ቃልየ ከመ ይትመህሩ ፈረሆቲየ በኩሎ መዋዕለ እለ ቦንቱ ይሐይዉ እሙንቱ ለዕለ ምድር ወይሜህሩ ለደቂቆሙ

Deut 04:11 ወመጻእክሙ ወቆምክሙ ታሕተ ደብር ወይነድድ ደብሩ በእሳት እስከ ሰማይ ወጽልመት ወዓውሎ

Deut 04:12 ወነበበኒ እግዚአብሔር እምነ መእከለ እሳተ ወሰማዕክሙ ኣንትሙ ቃሎ እንዘ ይትናገር ወርኢየቶሰ ኢርኢክሙ ዘእንበለ ቃሎ

Deut 04:13 ወኣይደዐክሙ ኪዳኖ ዘኣዘዘክሙ ከመ ትግበሩ ዐሥሩ ቃለ ወጸሐፎን ውስተ ክልኣቲ ጽላተ ዘእብን

Deut 04:14 ወሊተኒ ኣዘዘኒ እግዚአብሔር ከመ እምሀርክሙ በውእቶን መዋዕል ኩነኔ ወፍትሐ ዘትገብሩ ላዕለ ምድር እንተ ውስቴታ ትበውኡ ኣንቱሙ ትትዋርስዋ



Deut 04:15 ወዕቀቡ ጥቀ ነፍሰክሙ እስመ ኢርኢክሙ ርእየቶ በይእቲ ዕለት እንተ ባቲ ተናገረክሙ እግዚአብሔር በኮሬብ በውስተ ደብር እምነ መእከለ እሳት ወኢትጌጊዩ

Deut 04:16 ወኢትግበሩ ግልፎ በአምሳለ ኩሉ ምስለ በአምሳለ ተባዕት አው ዘአንስተ

Deut 04:17 በአምሳለ ኩሉ እንሰሳ ዘሀለወ ለዕለ ምድር ወበአምሳለ ኩሉ ያፍ ሠራሪት ዘይሰርር ምተሕተ ሰማይ

Deut 04:18 ወበአምሳለ ኩሉ ሕያው ዘይትሐወሥ ለዕለ ምድር ወበአምሳለ ኩሉ ዓሣ ዘሀለወ ውስተ ማይ ምትሕተ ምድር

Deut 04:19 ወለኣመ ነጻርከ ሰማይ ወርኢከ ፀሓይ ወወርኅ ወከዋክብት ወኩሉ ሰርፌቲሃ ለሰማይ ዮጊ ትጌጊ ወትሰግድ ሎሙ ወታመልኮሙ ለእለ ገብረ እግዚአብሔር አምላክከ ለኩሉ አሕዛብ ዘታሕተ ሰማይ

Deut 04:20 ወኪያክሙስ ነሥኣክሙ እግዚአብሔር ወአውፅኣክሙ እምነ እቶነ ኀጺን እምነ ግብጽ ከመ ትኩንዎ መክፈልተ ሕዝቡ እስከ ዛቲ ዕለት

Deut 04:21 ወተምዕዕኒ እግዚአብሔር በእንተ ዘትቤሉ አንትሙ ወመሐለ ከመ ኢይዐድዎ ለዝንቱ ዮርዳንስ ወከመ ኢይበውእ ውስተ ምድር እንተ ይሁበከ እግዚአብሔር አምላክከ ርስትከ

Deut 04:22 እስመ አንሰ እመውት በዛቲ ምድር ወኢይዐድዎ ለዮርዳንስ ወአንትሙስ ተዐድዉ ወትወርስዋ ለይእቲ ምድር ቡርክት

Deut 04:23 ወዑቁ እንከ አንትሙ ኢትርስዑ ኪዳኖ ለእግዚአብሔር አምላክክሙ ዘተካየደ ምስሌክሙ ወአበስክሙ ወገበርክሙ ለክሙ ግልፎ በአምሳለ ኩሉ ዘብእንቲአሁ ቀሠፈከ እግዚአብሔር አምላክከ

Deut 04:24 እስመ እግዚአብሔር አምላክከ እሳት እንተ ታኅለቅ ውእቱ ወአምላክ ቀናኢ ውእቱ

Deut 04:25 ለእመ ወለድከ ደቂቀ ወአዋልደ ወደቂቀ ደቂቀከ ወጐንደይክሙ ለዕለ ምድር ወአበስክሙ ወገበርክሙ ለክሙ በአምሳለ ኩሉ ወገበርክሙ እኪት ቅድመ እግዚአብሔር አምላክክሙ ከመ ታምዕዕዎ

Deut 04:26 ናሁ አሰምዕ ለክሙ ሰማየ ወምድረ ከመ ትጠፍኡ ወትደመሰሱ እምነ ምድር እንተ ውስቴታ አንትሙ ተዐድውዎ ለዮርዳን ህየ ከመ ትትዋረስዋ ወኢትጐንደዩ መዋዕለ ውስቴታ አላ ተቀጥቀጦ ትትቀጠቀጡ

Deut 04:27 ወይዘርወክሙ እግዚአብሔር ውስተ ኩሉ አሕዛብ ወትተርፉ ውሑዳን በኖልቀ ውስተ አሕዛብ እለ ውስቴቶሙ ያበውኣክሙ እግዚአብሔር ህየ

Deut 04:28 ወታምልኩ ብህየ አማልክተ ባዕድ ግብር እደ እፌለ እምሕያው ዕፀወ ወእበነ እለ ኢይርኢዩ ወኢይሰምዑ ወኢይበልዑ ወኢያጺንዉ



Deut 04:29 ወእምዝ ተኅሥሥዎ ለእግዚአብሔር አምላክክሙ ብህየ ወትረክብዎ ሶበ ኅሠሥክምዎ በኩሉ ልበክሙ ወበኩሉ ነፍሰክሙ በሕማምክሙ

Deut 04:30 ወይረክ(በክ)ሙ ኩሉ ዝንቱ ነገር በድኃሪ መዋዕል ወትትመየጡ ኅበ እግዚአብሔር አምላክክሙ ወይሰምዐክሙ

Deut 04:31 እስመ አምላክ መሐሪ ውእቱ እግዚአብሔር አምላክክ ኢይኅድገክ ወኢያጠፍኦክ ወኢይረስዕ ኪዳኖሙ ለአበዊክ ዘመሐለ ሎሙ እግዚአብሔር

Deut 04:32 ተሰአሉ ዘቀዲሙ መዋዕለ ዘኮነ እምቅድሜክ እምአመ ፈጠሮ እግዚአብሔር ለእንላ እምሕያው ዲበ ምድር እምጽንፈ ሰማይ እስከ ጽንፈ ሰማይ ለእመ ኮነ ከመ ዝንቱ ነገር ወለእመ ኮነ ከመዝ

Deut 04:33 ወለእመ ሰምዐ ሕዝብ ቃለ እግዚአብሔር አምላክ ዘሕያው እንዘ ይትናገር እምነ መእከለ እሳት በከመ ሰማዕክ አንተ ወሐየውክ

Deut 04:34 ለእመ አመከረ እግዚአብሔር ወቦአ ወነሥኦ ሎቱ ሕዝብ እምነ መእከለ ሕዝብ በአመክሮ ወበተአምር ወበምድምም ወበቀትል ወበእድ ጽንዕት ወበመዝራዕተ ልዑል ወበመደንገፅ ዐበይት በከመ ኩሉ ዘገብረ እግዚአብሔር በምድረ ግብጽ በቅድሜክ እንዘ ትሬኢ

Deut 04:35 ከመ ታእምር ከመ ውእቱ እግዚአብሔር ውእቱ አምላክ ወአልቦ ባዕድ እንበሌሁ

Deut 04:36 እምሰማይ ተሰምዐ ቃሉ ከመ ይምህርክ በምድር አርአየ እሳቶ ዐቢየ ወሰመዕክ ቃሎ እምነ መእከለ እሳት

Deut 04:37 እስመ ያፈቅሮሙ ለአበዊክ ወሐረዮሙ ለዘርኦሙ እምድኅሬሆሙ ኪያክሙ እምኩሉ አሕዛብ ወአውፅኦ(ክ) ውእቱ በኅይሉ ዐቢየ አምነ ግብጽ

Deut 04:38 ከመ የጥፍኦሙ ለሕዝብ ዐበይት ወጽኑዓን እምቅድመ ገጽክ ከመ ያብእክ ወየሀብክ ምድሮሙ ትረሳ በከመ ሀለውኩ ዮም

Deut 04:39 ወታአምር ዮም ከመ ውእቱ እግዚአብሔር አምላክ ውእቱ እግዚአብሔር በሰማይ በለዕሉ ወበምድር በታሕቱ ወአልቦ ባዕደ እንበሌሁ

Deut 04:40 ወዕቀቡ ኩነኒሁ ወትእዛዞ ዘኤኤዝዘክሙ ኣነ ዮም ከመ ሠናይ ይኩንክሙ ወለውሉድክሙሂ እምድኅሬክሙ ከመ ይኑኅ መዋዕሊክሙ ውስተ ምድር እንተ ይሁበክ እግዚአብሔር አምላክክ በኩሉ መዋዕል

Deut 04:41 ወይእተ አሚር ፈለጠ ሙሴ ሠለሰ አህጉረ በማዕዶተ ዮርዳንስ መንገለ ሠረቀ ፀሐይ ከመ ይስኪ ህየ ቀታሊ ዘቀተለ ካልኦ እንዘ ኢያአምር ወኢኮነ ጸላኢሁ ትካተ ወይሰኪ ውስተ አሐቲ እምእላንቱ አህጉር ወይሐዩ



Deut 04:42 በሶር በውስተ ገዳም ውስተ ምድረ ሐቅል ለሮቤል ወራሞት በግለአድ ለጋድ ወአውሎን በባሳን ለምናሴ

Deut 04:43 ዝንቱ ውእቱ ሕግ ዘአዘዘ ሙሴ በቅድሚያሁም ለደቂቀ እስራኤል

Deut 04:44 ዝንቱ ውእቱ ትእዛዝ ወኵነኔ ወፍትሕ ኩሉ ዘነገሮሙ ሙሴ ለደቂቀ እስራኤል በገዳም ወዲሁሙ እምነ ምድረ ግብጽ

Deut 04:45 በምዕዶተ ዮርዳን በቄላተ በቅሩበ ቤተ ፌጎር በምድረ ሴዎን ንጉሠ አሞሬዎን ዘይነብር ውስተ ሔሴቦን ዘቀተሉ ሙሴ ወደቂቀ እስራኤል ወዲሁሙ እምነ ምድረ ግብጽ

Deut 04:46 (ወ)ተዋረሱ ምድሮ ወምድር አግሂ ንጉሠ ባሳን ክልኤቱ ነገሥት አሞሬዎን እለ ይነብሩ መዕዶተ ዮርዳንስ መንገለ ሠረቀ ፀሐይ

Deut 04:47 አምአሮ ኤር እስከ መዕዶተ ፈለግ አርኖን እስከ ደብረ ሴዎን ዘኤርሞን

Deut 04:48 ኩሉ አራባ ዘመዕዶተ ዮርዳንስ ዘመንገለ ምሠራቀ ፀሐይ ዘመትሕት አሴዶን ዘበመንድቅ

Deut 05:01 ወጸውዎሙ ሙሴ ለኩሎሙ እስራኤል ወይቤሎሙ ስማዕ እስራኤል ኩሉ ኵነኔ ወፍትሕ ዘአነ እነግረከ ዮም ውስተ አእዘኒክሙ በዛቲ ዕለተ ወተመህሩ ገቢሮቶ ወዐቂበቶ

Deut 05:02 እግዚአ ብሔር አምላክክሙ አቀመ ኪዳኖ ምስሌክሙ በኮሬብ አኮ ለአበዊክሙ ዘአቅደመ ዝንተ ኪዳን አላ ለክሙ እስመ አንትሙ ሀለውክሙ ሕያዋን

Deut 05:03 ገጽ በገጽ ተናገረክሙ እግዚአ ብሔር በደብር በማእከለ እሳተ

Deut 05:04 ወአንሰ እግዚአ ብሔር መእከሌክሙ በይእቲ ዕለተ ከመ እንግርክሙ ቃሎ ለእግዚአ ብሔር እስመ ፈራህክሙ እምቅድመ ገጸ እሳት ወኢዐረግሙ ውስተ ደብር

Deut 05:05 ወይቤ አነ ውእቱ እግዚአ ብሔር አምላክከ ዘአውፃእኩከ እምነ ምድረ ግብጽ እምነ ቤተ ቅኔት ወኢይኩንከ ባዕድ አማለክተ እንበሌየ

Deut 05:06 ወኢትግብር ለከ አምላክ ዘግልፎ ወኢበኩሉ አምሳለ ዘውስተ ሰማይ በላዕሉ ወኢበኩሉ ዘበ ምድር በተሕቱ ወኢበኩሉ ዘውስተ ማይ ዘመተሐተ ምድር ወኢትሰገድ ሎሙ ወኢተምልኮሙ

Deut 05:07 እስመ አነ እግዚአ ብሔር አምላክከ አምላክ ቀናኤ ዘይትፋደይ ኀጣይኦ ወላዲ ላዕለ ውሉድ እስከ ሃልሰተ ወራብዕተ ተውልድ ለእለ ይጸልኡኒ

Deut 05:08 ወእገብር ምሕረተ እስኪ እልፍ ለእሌ ያፈቅሩኒ ወለእሌ ይዕቅቡ ትእዛዝየ



Deut 05:09 ኢትዮጵያ በስመ እግዚአብሔር አምላክክ በሐሰት እስመ ኢያንጽሖ እግዚአብሔር አምላክክ ለዘይምሕል ስሞ በሐሰት

Deut 05:10 ወዕቀብ ዕለተ ሰንበት ከመ ትቀድሳ በከመ አዘዘ እግዚአብሔር አምላክክ

Deut 05:11 ሰዱስ መዋዕል ተገብር ኩሉ ግብርክ ወበሳብዕት ዕለት ሰንበቱ ለእግዚአብሔር አምላክክ

Deut 05:12 ወኢትግበር ባቲ ኩሉ ግብርክ ወኢወልድክ ወኢወለተክ ወኢገብርክ ወኢአመቲክ ወኢላህምክ ወኢአድግክ ወኢኩሉ እንስሳክ ወኢግደር ዘውስተ ደዴክ ከመ ያዕርፍ ገብርክ ወአመተክ ከማክ

Deut 05:13 ወትዜከር ከመ {ከመ} ገብር አንተ በምድረ ግብጽ ወአውፅአክ እግዚአብሔር አምላክክ እምህየ በእድ ጽንዕት ወበመዝራዕተ ልዑል ወበእንተዝ አዘዘክ እግዚአብሔር አምላክክ ከመ ትዕቀባ ለዕለተ ሰንበት ወትቀድሳ

Deut 05:14 አክብር አባክ ወእምክ በከመ አዘዘክ እግዚአብሔር አምላክክ ከመ ትኩን ሠናይተ ለዕሌክ ወይኑሳ መዋዕሊክ በዲበ ምድር እንተ ውህበክ እግዚአብሔር አምላክክ

Deut 05:15 ኢትሑር ኀቤ ብእሲተ ብእሴ

Deut 05:16 ወኢትቅተል ነፍስ

Deut 05:17 ወኢትስረቅ

Deut 05:18 ወኢተኩን ሰምዐ በሐሰተ ለዕሌ ቢጽክ ኢተሐሱ ሰምዐ

Deut 05:19 ወኢትፍቶ ብእሲተ ካልእክ ወኢትፍቶ ቤቶ ለካልእክ ወኢገራህቶ ወኢገብሮ ወኢአመቶ ወኢላህም ወኢአድጎ ወኢእምኩሉ እንስሳሁ ወኢእምኩሉ ዘቦ ካልእክ

Deut 05:20 ዘነገር ዘነገረ እግዚአብሔር ለኩሉ ተዓይንክሙ በውስተ ደብር በማእከለ እሳት ወጽልመት ወዓውሎ ወጣቃ ወቃለ ዓቢይ ወኢደገመ እንክ ወጽሐፎ ውስተ ክልኤ ጽላት ዘእብን ወወሀበኒ እግዚአብሔር

Deut 05:21 ወኮነ ሶበ ሰማዕኩ ውእቱ ቃል እመእከለ እሳት ወደብሩሂ ይነድድ በእሳት ወመግእክሙ ኀቤየ ኩለክሙ መላእክተ ነገድክሙ ወአእሩጊክሙ

Deut 05:22 ወትቤሉኒ ናሁ አርአየነ እግዚአብሔር ስብሐቲሁ ወቃሉሂ ሰማዕነ እማ[...]

Deut 05:23 vacat

Deut 05:24 vacat



Deut 05:25 vacat

Deut 05:26 vacat

Deut 05:27 vacat

Deut 05:28 vacat

Deut 05:29 vacat

Deut 05:30 vacat

Deut 05:31 vacat

Deut 06:01 vacat

Deut 06:02 vacat

Deut 06:03 vacat

Deut 06:04 vacat

Deut 06:05 vacat

Deut 06:06 vacat

Deut 06:07 vacat

Deut 06:08 vacat

Deut 06:09 vacat

Deut 06:10 vacat

Deut 06:11 vacat

Deut 06:12 vacat

Deut 06:13 vacat

Deut 06:14 vacat



Deut 06:15 እስመ አምላክ ቀናኤ ውእቱ እግዚአ ብሔር አምላክክ

Deut 06:16 ዑቅ ኢይትምዕዐክ እግዚአ ብሔር በመዐቱ አምላክክ ወኢይሳርወክ እምገጸ ምድር

Deut 06:17 ወኢታመክሮ ለእግዚአ ብሔር አምላክክ በከመ አመከርካሁ አመ ዕለተ መንሱት

Deut 06:18 ተዓቃብ ወዕቀብ ትእዛዙ ለእግዚአ ብሔር አምላክክ ወሰማዕ ኩነኔሁ ኩሎ ዘአዘዘክ

Deut 06:19 ወተገብር ሠናይ ወዘአደመ ቅድሜሁ ለእግዚአ ብሔር አምላክክመ ከመ ሠናይተ ትኩንክመ ወትባእ ትትዋረስ ምድር ቡርክተ እንተ መሐለ እግዚአ ብሔር ለአበዊክ

Deut 06:20 ከመ ይሰድድ ኩሎ ፀርክ እምቅድመ ገጽክ በከመ ይቤ እግዚአ ብሔር

Deut 06:21 ወሶቤ ተሳእለኪ ወልድክ ጌሰም ወይቤለክ ምንተ ውእቱ ዝንቱ ትእዛዝ ወኩነኔ ወፍትሐ ኩሎ ዘአዘዘክ እግዚአ ብሔር አምላክክ

Deut 06:22 ወትብሎ ለወልድክ አግብርት ንሕነ ለፈርዖን በብሔረ ግብጽ ወአውፅኦነ እግዚአ ብሔር እምህየ በእድ ጽንዕት ወበመዝራዕተ ለዕለተ

Deut 06:23 ወፈነወ እግዚአ ብሔር ተአምረ ወመድምመ ዐቢይ ወእኩይ ለዕለ ግብጽ ወለዕለ ፈርዖን ወለዕለ ቤቱ በቅድሜኑ

Deut 06:24 ወኪያነሰ አውፅኦነ እምህየ ከመ ያብኦነ ውስቴ ዛቲ ምድር ወየህበነሃ እንተ መሐለ ከመ የሀበመ ለአበዊኑ

Deut 06:25 ወአዘዘክ እግዚአ ብሔር ኩሎ ዝንቱ ኩነኔ ከመ ንግበር ወከመ ንፍርሆ ለእግዚአ ብሔር አምላክክ ከመ ሠናይተ ትኩን ለዕሌኑ በኩሎ መዋዕሊኑ ከመ ንሕየው

Deut 06:26 በከመ ዮም ወንረክብ ምሕረቶ ለእመ ዐቀብነ ወከመ ንግበር ኩሎ ዝንተ ትእዛዝ በቅድመ እግዚአ ብሔር አምላክክ በከመ አዘዘ እግዚአ ብሔር

Deut 07:01 ወለእመ አቡኣክ እግዚአ ብሔር አምላክክ ውስተ ምድር እንተ ላቲ ተሐውር ከመ ትረሳ ወአሰሰለ አሕዛብ ዓቢያት ወብዙኅ እምቅድመ ገጽክ ኬጤዎን ወጌርጌሴዎን ወአሞሬዎን ወከናኔዎን

Deut 07:02 vacat

Deut 07:03 vacat

Deut 07:04 vacat



Deut 07:05 [ም]ሠዋዕቲሆሙ ንሠቱ ወምሳሌሆሙ ቀጥቅጡ ወአማልክቲሆሙ ዘግልፎ አውዐዩ በእሳት

Deut 07:06 እስመ ሕዝብ ቀዱስ አነተ ለእግዚአ ብሔር አምላክክ ወኪያክ ኦብደረ ወሐረየ እግዚአ ብሔር አምላክክ ትኩሮ ሕዝቦ ሎቱ እምኩሉ አሕዛብ እለ ሀለው ዲቤ ምድር

Deut 07:07 ወአኮ እስሜ ትበዝጉ እምኩሉ አሕዛብ ምድር ዘሐረየክሙ እግዚአ ብሔር አንትሙሰ ትውሕዱ እምኩሉ አሕዛብ

Deut 07:08 ወበእንተዝ አፍቀረክሙ እግዚአ ብሔር እስመ የዐቅብ መሐላሁ ዘመሐለ ለአበዊክሙ በበይነዝ አውፅአክሙ አምላክክሙ ብእድ ጽንዕት ወበመዝራዕተ ልዑል ወቤዘወክሙ እምቤተ ቀኔ እምእዴሁ ለፍርዖን ንጉሠ ግብጽ

Deut 07:09 ወታአምር ከመ ውእቱ እግዚአ ብሔር አምላክክ ውእቱ እግዚአ ብሔር ወውእቱ አምላክ ምእመን ዘይዐቅብ ኪዳኖ ወምሕረቶ ለእለ ያፈቅርዎ ወለእለ የዐቅቡ ትእዛዞ እስኪ እልፍ ተውልድ

Deut 07:10 ወይትፈድሮሙ ለእለ ይጸልእዎ በቅድመ ገጾሙ ወይሄርዎሙ ወኢይጐንዲ (ስርዎቶሙ ለእለ ይጸልእዎ በቅድመ ገጾሙ ወኢያጐንዲ) ፈዲሮቶሙ ለእሌ ኢያፈቅርዎ በቅድመ ገጾሙ

Deut 07:11 ወዕቀቡ ትእዛዛ ወኮነኔሁ ወፍትሖ ኩሎ ዘአነ እኤዝዘክሙ ዮም ከመ ትግበርዎ

Deut 07:12 ወእምከመ ሰማዕክሙ ዘንተ ኩነኔ ወዐቀብክሙ ወገበርክሙ እግዚአ ብሔርኒ ይዐቅብ ለክ ኪዳኖ ወምሕረቶ ዘመሐለ ለአበዊክሙ

Deut 07:13 ወያፈቅረክ ወይባርከክ ወያስተባዝካክ ወይባርክ ለክ ፍሬ ከርሥክ ወፍሬ ምድርክ ወስርናይክ ወወይንክ ወቅብእክ ወእዕጻዳተ ላህምክ ወመራዕየ አባግዕክ ላዕለ ምድር እንተ መሐለ እግዚአ ብሔር ለአበዊክ ይሁበክ

Deut 07:14 ወትከውን ቡሩክ እምኩሉ አሕዛብ ወአልቦ መካነ በውስቴተክሙ ወእንተኒ አልባቲ ውሉደ ወኢውስቴ እንሰሳከሂ

Deut 07:15 ወያሴስል እግዚአ ብሔር እምላዕሌክ ኩሉ ደዌ ወኩሉ ሕማም እኩይ ዘርኢክ መጺኦ ለዕለ ግብጽ ወኩሉ ውእቱ ዘርኢክ ኢያምጽእ ላዕሌክ ወይወስዶ ላዕለ ፀርክ ወለዕለ እለ ይጸልኡክ

Deut 07:16 ወትበልዕ ምህርካሆሙ ለአሕዛብ ዘይሁበክ እግዚአ ብሔር አምላክክ ወኢትምሐኮሙ ወኢታምልክ አማልክቲሆሙ እስመ እኩይ ውእቱ ለክ

Deut 07:17 ወለእመሰ ትብል በልብክ ይበዝኅ እምኔየ ዘሕዝብ ወእፎ እክል አጥፍኦቶሙ ኢትፍርሆሙ

Deut 07:18 ተዘከር ኩሎ ዘገብረ እግዚአ ብሔር አምላክክ ላዕሌ ፈርዖን ወላዕለ ኩሎ ግብጽ ዐቢየ መንሱት ዘርኢክ በአዕይንቲክ ውእቱ ተአምር



Deut 07:19 ወመድምም ዐቢየ ወእድ ጽንዕት ወመዝራዕተ ልዑል ዘከመ አውፅአክ እግዚአብሔር አምላክክ አምህየ ከማሁ ይገብሮሙ እግዚአብሔር አምላክክ ለኩሎሙ አሕዛብ እለ ትፈርሁ አንተሙ እምቅድመ ገጽሙ

Deut 07:20 ወይፌኑ እግዚአብሔር አምላክክ ቅድሚከ መቅሠፍተ ለዕሌሆሙ እስከ ያጠፍአሙ ለእለ ትፈርህሆሙ ወኢትትጎባእ እምኔሆሙ

Deut 07:21 ወኢትደገማፅ እምገጽሙ እግዚአብሔር አምላክክ ሀሎ ምስሌከ ውእቱ አምላክክ ዐቢይ ወጽኑዕ

Deut 07:22 ወያጠፍአሙ እግዚአብሔር አምላክክ ለእሉ አሕዛብ እምቅድሜ ገጽከ በበ ንእስቲተ ንሣቲተ ወኢትበል አጥፍአሙ ፍጡነ ከመ ኢትኩን ምድር ሐቅል ወይበዝኅ ለዕለከ አራዊተ ገዳም

Deut 07:23 ወያገብአሙ እግዚአብሔር አምላክክ ውስተ እደዊክ ወይድምስሶሙ ዐቢይ ሕርትምና እስከ ያጠፍአሙ

Deut 07:24 ወያገብአሙ ለነገሥቶሙ ውስተ እደዊከ ወይድምስስ ስሞሙ እምውእቱ ምድር ወአልበ ዘይትቃወም ቅድመ ገጽከ እስከ ያጠፍአሙ እግዚአብሔር

Deut 07:25 ለኩሎ ግልፎ አማልክቲሆሙ ወአውዐሎሙ በእሳት ወኢብርቱ ወኢወርቁ ወኢብሩሩ ኢተንሣእ እምኔሆሙ ለከ ከመ ኢትጌጊ ቦሙ እስመ ርኩሳን እሙንቱ በኅበ እግዚአብሔር አምላክክ

Deut 07:26 ወኢታብእ ርኩሳ ውስተ ቤተከ ወኢትኩን ርጉም ከማሁ አርኩሶ ታረኩሶ ወአስቆርሮ ታስቆርሮ እስመ ርጉም ውእቱ

Deut 08:01 ወዕቀቡ ከመ ትግበሩ ኩሎ ትእዛዘ ዘእኤዝዞክሙ አነ ዮም ከመ ትሕየው ወትብዝኑ ወትባኡ ወትረሱ እንተ መሐለ እግዚአብሔር ለአበዊከ

Deut 08:02 ወተዘከር ኩሎ ፍኖተ እንተ ወሰደከ እግዚአብሔር አምላክክ ውስተ ገዳም ከመ ያሕምምከ ወከመ ያመክርከ ወከመ ያእምር ልብከ ለእመ ተዐቀብ ትእዛዞ ወለእመ ኢትዐቅብ

Deut 08:03 ወአሕመመከ ወአርሐበከ ወእምዝ መና ሴሰየከ ዘኢያአምሩ አበዊከ ከመ ያርኢከ ከመ ኢኮነ በእከል ባሕቱቱ ዘየሐዩ ሰብእ አላ በኩሎ ቃል እንተ ትወፅእ እምአፈ እግዚአብሔር የሐዩ ሰብእ

Deut 08:04 አልባሲከኒ ኢበልያ በለዕሌከ ወእግርከኒ ኢረስሐ ናሁ አርብዓ ዓም

Deut 08:05 ወአእምር በልብከ እስመ ከመ ይጌስጽ ብእሴ ወልዶ ከማሁ ይጌስጸከ እግዚአብሔር አምላክክ

Deut 08:06 ወዕቀብ ኩሎ ትእዛዞ ለእግዚአብሔር አምላክከ ከመ ትሖር በፍናቱ ወትፍርህ

Deut 08:07 እስመ እግዚአብሔር አምላክከ ያበውአከ ውስተ ምድር ቡርክት ወብዝኅተ እንተ ሙሐዛተ ማይ ወዐዘታቲሃ ከመ ቀላይ ወይትክዐው ውስተ ገዳም ወውስተ አድባረ



Deut 08:08 ምድር ስርናይ ወስገም ወአዕጻደ ወይን ወበለስ ወሮማን ምድር ኤልያስ ዘዘይት ወመዐር

Deut 08:09 ምድር እንተ ኢኮነት በአስተክኦ ወትበልዖ ለእክለከ ወአልዐ ዘተሐጥእ ምንተኒ ውስቴታ ምድር እንተ እበኒሃ ጎጺን ወእምውስተ አድባሪሃ ያስተጋብእዎ ለብርተ

Deut 08:10 ወበላዕ ወጽገብ ወባርኮ ለእግዚአ ብሔር አምላክከ በውስተ ምድር ቡርክት እንተ ወሃበከ

Deut 08:11 ወዑቅ ርእስከ ኢትርስዖ ለእግዚአ ብሔር አምላክከ ከመ ኢትትዐዶ ትእዛዞ ወኮነኔሁ ወፍትሖ ዘእነ እኤዝዘከ ዮም

Deut 08:12 ዮጌ ሶቤ በላዕከ ወጽገብከ ወነደቀ አብያተ ሠናያነ ወነበርከ ውስቴቶሙ ወመላእከ አባግዐ ወአልህምተ ወመላእከ ወርቀ ወብሩረ ወመላእከ ኩሎ ንዋየ ዘትፈቅድ ወዮጌ ታዐቢ ልብከ

Deut 08:13 ወትረስዖ ለእግዚአ ብሔር አምላክከ ዘአውፀአከ እምድረ ግብጽ ወአድኅነከ እምቤተ ቀኔከ

Deut 08:14 ወወሰደከ ውስቴ ገዳም ዐቢይ ወግሩም ውእቱ ዘአራዊተ ምድር ዘይነስክ ወዐቃርብተ ወጽምእ ወኅበ አልዐ ማይ ዘአውፀአ ለከ ትስተይ እምውስተ እብን ኩኩሕ ነቅዐ ማይ ጥዑም

Deut 08:15 ወዓዲ ሴሰየከ መና ዘኢያአምሩ አበዊከ በገዳም ከመ ያሕምምከ ወያመክረክሙ ወያሴኒ ለዕሌከ በደኃሪ መዋዕልከ

Deut 08:16 ወኢትበል በልብከ በኅይልየ ወበጽንዕ እዴየ ገበርኩ ከመዝ ሊተ ኃይል ዐቢይ

Deut 08:17 ወተዜከሮ ለእግዚአ ብሔር አምላክከ እስመ ውእቱ ይሁበከ ከመ ትግበር ለከ ኅይለ ከመ ያቅም ኪዳኖ ዘመሐለ እግዚአ ብሔር ለአበዊከ በከመ ዮም

Deut 08:18 ወለእመ ርስዕካሁ ለእግዚአ ብሔር አምላክከ ወሖርከ ድኅረ ባዕድ አማልክተ ወአምላካሆሙ ወሰገድከ ሎሙ አሰምዕ ለዕሌከ ዮም ሰማየ ወምድር ከመ ጠፊአ ትጠፍኡ

Deut 08:19 ከመ ባዕድ አሕዛብ እለ ኩሎሙ ደምሰሶሙ እግዚአ ብሔር እምቅድ ገጽክሙ ከማሁ ትድምሰሱ እስመ ኢሰማዕክሙ ቃለ እግዚአ ብሔር አምላክክሙ

Deut 09:01 ስማዕ እስራኤል ናሁ ተዐድዎ አንተ ዮም ለዮርዳንስ ከመ ትሖር ትትዋረሶሙ ለአሕዛብ ዐቢያን እለ ይጸንዑክሙ ወአህጉር ዐበይተ እለ አርፍተ ቅጽሮን ይበጽሕ ሰማይ

Deut 09:02 ሕዝብ ዐቢይ ወብዙኅ ወነ(ዋ)ኅተ ደቂቀ ኤናቅ እለ ትብሉ አንትሙ

Deut 09:03 ወተአምር ዮም ከመ እግዚአ ብሔር አምላክከ ውእቱ ይሐውር ቅድመ ገጽከ እሳት ዘይዌድእ ውእቱ ውእቱ ይሴርዎሙ ወያነተዖሙ ወያጠፍኦሙ እምቅድመ ገጽከ ወያጠፍኦሙ ወይድምስሶሙ ፍጡን በከመ ይቤለከ እግዚአ ብሔር



Deut 09:04 ወኢትበል በልብክ ሶበ አጥፍአሙ እግዚአብሔር አምላክክ ለውእቶሙ አሕዛብ እምቅድመ ገጽክ በጽድቅየ አብኣኒ እግዚአብሔር እረሶ ለዘ ምድር ቡሩክ እለ በእንተ ኀጢአቶሙ ለውእቶሙ አሕዛብ አጥፍአሙ እግዚአብሔር እምቅድመ ገጽክ ወአኮ በእንተ ጽድቅክ ወአኮ በእንተ ንጽሕክ ዘትበውአ ከመ ትትዋረስ ለምድሮሙ

Deut 09:05 እለ በእንተ ኀጢአቶሙ ለውእቱ አሕዛብ ያጥፍአሙ እግዚአብሔር ለውእቱ አሕዛብ ከመ ያቅም ኪዳኖ እግዚአብሔር ዘመሐለ ለአበዊክሙ ለአብርሃም ወለይስሐቅ ወለየሶቆብ

Deut 09:06 ወታአምር ዮም ከመ አኮ በእንተ ጽድቅክ ዘመሀበካሃ ለይእቲ ምድር እስመ ሕዝብ ዘያገዝፍ ክሳዶ አንተ

Deut 09:07 ወ(ተ)ዘከር ወኢትርሳዕ ሚመጠነ አምዐዕካሁ ለእግዚአብሔር አምላክክ በገዳም እምአሜ ወፃእክ እምድረ ግብጽ እስኬ በጻሕክሙ ውስተዝ መካን እንዘ ትክሕድዎ ለእግዚአብሔር

Deut 09:08 ወበኮሮብሂ አምዓዕክምዎ ለእግዚአብሔር ወተምዕዐ እግዚአብሔር ላዕሌክሙ ከመ ያጥፍእክሙ

Deut 09:09 ሶቤ ዐረጉ ውስተ ደብር ከመ እንሣእ ክልኤ ጽለተ ዘእብን ጽለተ ዘኪዳን ዘተካየደ እግዚአብሔር ምስሌክሙ

Deut 09:10 ወነበርኩ ውስተ ደብር አርብዓ ዕለተ ወእርዓ ሌሊተ እክለ ኢበለዕኩ ወማይ ኢስተይኩ

Deut 09:11 ወመሀበኒ እግዚአብሔር ክልኤ ጸለተ ዘእብን ወተጸሕፈ በአጽበዕቱ ለእግዚአብሔር ወጽሑፍ ውስቴቶን ኩሎ ቃል ዘነገረኒ እግዚአብሔር በደብር አሜ ተጋባእክሙ

Deut 09:12 ወበአርብዓ ዕለት ወበአርብዓ ሌሊት መሀበኒ እግዚአብሔር ክልኤ ጽለተ ዘእብን ጽለተ ዘኪዳን

Deut 09:13 ወይቤለኒ እግዚአብሔር ተንሥእ ወሖር ፍጡን እምዝየ እስመ አበሰ ሕዝብክ ዘአውፀአክ እምድረ ግብጽ ወፍጡ[ነ] [ክ]ሐዱ እምፍኖተ እንተ አዘዝካሆሙ ወገብሩ ሎሙ ሰብክ

Deut 09:14 ወይቤለኒ [እግ]ዚአብሔር እቤለክ ም[ዕረ] ወካዕበ እንዘ እብል ርኢክዎ ለዝ ሕዝብ ግዙፈ ክሳድ ውእቱ

Deut 09:15 [ኀ]ደገኒ አጥፍአሙ ወእደም[ሰ]ሶ ስሞሙ እምታሕተ ሰማይ ውእገብረክ ውስተ ሕዝብ ዐቢይ ወጽኑዕ ወዘይበዝኅ እምእሉ ፈድፋድ

Deut 09:16 ወተመየጥኩ ወወረድኩ እምደብር ወደብሩሰ ይነድድ በእሳተ ወዝኩሰ ጽለተ ውስተ ክልኤሆን እደዊየ

Deut 09:17 ወሶበ ርኢኩ ከመ አበሰክሙ ቅድመ እግዚአብሔር አምላክክሙ ወገበርክሙ ለክሙ ሰብክ ውኀደግሙ ፍኖተ እንተ አዘዘክሙ እግዚአብሔር ወነሠእክዎን ለእለክቱ ክልኤ ጸላተ እምውስተ ክልኤሆን እደዊየ ወገደፍክዎን ወቀጥቀጥክዎን በቅድሜክሙ



Deut 09:18 ወሰኦልኩ ቆዳመ ቅድመ እግዚአብሔር ከመ ቀዲሙ አርብዓ ዕለት ወአርብዓ ሌሊት ካዕበ ኢበለዕኩ እክለ ወማይ ኢሰተይኩ በእንተ ኩሉ ኅጢአተክሙ ዘአበስክሙ ወገበርክሙ እኩየ ቅድመ እግዚአብሔር አምላክክሙ ከመ ተምዕዕዎ

Deut 09:19 ወፈራህኩ በእንተ መዐቱ ዘተምዕዕ እግዚአብሔር ለዕሌክሙ ከመ ያጥፍ[እክ]ሙ ወሰምዐኒ ሊተ እግዚአብሔር በውእቶን መዋዕል

Deut 09:20 ወለዕሌ አሮንሂ ተምዐ እግዚአብሔር ጥቀ ከመ ይ[ስር]ዎ ወጸለይኩ በእንተ አሮንሂ በውእቱ መዋዕል ወጌጋይክሙ ዘገበርክሙ ላህም

Deut 09:21 ነሣእክዎ ወቀጥቀጥክዎ ወሐረጽክዎ ጥቀ እስኬ አድቀቀዎ በሕቁ ወረሰይክዎ ከመ ጸበለ ወወደይኩዎ ለውእቱ ሐሪጽ ውስተ ነቅዐ ዘይወርድ እምደብር

Deut 09:22 ውኅበ ወዕየተኒ ወአሜ መንሱተ ወበኅቤ ተዜክረ ፍትዋት አምዓዕክምዎ ለእግዚአብሔር አምላክክሙ

Deut 09:23 ወእመሂ ፈነወክሙ እግዚአብሔር እምቃዴስ በርኔ ወይቤለክሙ ዕረጉ ወተዋረስዋ ለይእቲ ምድር እንተ እሁበክሙ ወክሐድክሙ ቃለ እግዚአብሔር አምላክክሙ ወኢአመንክመዎ ወኢሰማዕክምዎ ቃሎ

Deut 09:24 ወኩንኩሙ ክሐድያን እግዚአብሔር እምይእቲ ዕለት እንተ ታአምሩ

Deut 09:25 ሰኦልኩ ለክሙ ቅድመ እግዚአብሔር አርብዓ ዕለት ወአርብዓ ሌሊት በከመ ሰኦልኩ ቀዲሙ እስመ ይቤ እግዚአብሔር አጠፍኦክሙ

Deut 09:26 ወጸለይኩ ኅበ እግዚአብሔር ወእቤ እግዚአብሔር ንጉሦሙ ለአማልክት ኢትሠርዎሙ ለሕዝብከ ወለመክፈልተከ ዘቤዘውከ በኅይለከ ዓቢይ እለ አውፃእከ እምድረ ግብጽ በዐቢይ ኅይልከ ወበእዴከ ጽንዕተ ወበመዝራዕተከ ልዑል

Deut 09:27 ተዘከር አብ[ር]ሃምሃ ወይስሐቅ ወያዕቆብ አግብርቲከ እለ መሐልከ ሎሙ በርእስከ ወኢትነጽር እኩዮሙ ለዝ ሕዝብ ወአበሳሆሙ ወጌጋዮሙ

Deut 09:28 ከመ ኢይበሉ እለ ይነብሩ ውስተ ምድር እለ እምኅቤሆሙ አውፀእከነ እስመ ስእነ እግዚአብሔር አብእቶሙ ውስተ ምድር እንተ መሐለ የሃበሙ ወእስመ ይጸልኦሙ አውፅኦሙ ከመ ንቅተሎሙ በገዳም

Deut 09:29 ወእሉሰ ሕዝብከ እሙንቱ ወርስትከ እለ አውፅኦከ እምግብጽ በዓቢይ ኅይልከ ወበጽኑዕ መዝራዕቲከ

Deut 10:01 ወይቤለኒ እግዚአብሔር በውእቶን መዋዕል ቀር ለከ ክልኤ ጸለተ ዘእብን ከመ እለ ቀዲሙ ወዕረግ ኅቤየ ውስተ ደብር ወግበር ታቦት እንተ ዕዕ

Deut 10:02 ወእጽሕፍ ውስተ ውእቱ ጽላተ ኩሎ ቃል ዘሃሎ ውስተ ዝክቱ ጽለተ እሌ ቀዳሚ እሌ ቀጥቀጥኩን ወደዮን ውስተ ታቦተ



Deut 10:03 ወግበርኩ ታቦተ እምዕፅ ዘኢይነቅዝ ወወቁርኩ ክልኤ ጸላተ ዘእብን ከመ እሌ ቀዲሙ ወዐረጉ ውስተ ደብር ወውስተ እዴየ ውእቶን ጸላተ ክልኤሆን

Deut 10:04 ወጸሐፈ ውስተ ውእቶን ጸላተ በከመ ቀዳሚ መጽሐፍ ወዐሥሩ ቃለ ዘነገረኒ እግዚአ ብደብረ ሲና በመእከለ እሳተ

Deut 10:05 ወወደይክዎን ውስተ ታቦት ለውእቶን ጸላተ እለ ገበርኩ ወነበርኩ ህየ በከመ አዘዘኒ እግዚአ ብሔር

Deut 10:06 ወግዕዙ ደቂቀ እስራኤል እምቤሮስ ዘደቂቀ ኢያቀም ዘሚሳዴ ወብህየ ሞተ አሮን ወተቀብረ ብህየ ወተሠይመ ካህን አልዓዛር ወልዶ ህየቴሁ

Deut 10:07 ወእምህየ ግዕዙ ውስቴ ገድጋድ ወእምገድጋድ ውስተ ኤጤባ ምድር ዘአንቀዕተ ማያት

Deut 10:08 ወበውእቱ መዋዕል ፈለጦሙ እግዚአ ብሔር ለንገደ ሌዌ ከመ ይጹሩ ታቦተ ሕጉ ለእግዚአ ብሔር ወከመ ይቁሙ ቅድመ እግዚአ ብሔር ወይግበሩ ወይጸልዩ በስመ ዚአሁ እስኪ ዛቲ ዕለት

Deut 10:09 ወበእንተዝ አልቦሙ ሌዋዊያን ክፍል ወርስተ ምስለ አጋዊሆሙ እስመ እግዚአ ብሔር ውእቱ ክፍሉ በከመ ይቤሉ

Deut 10:10 ወአንሰ ቆምኩ ውስተ ደብሮ አርብዓ ዕለተ ወአርብዓ ሌሊተ ወስምዐኒ እግዚአ ብሔር በውእቱሂ መዋዕል ወሐደገክሙ እግዚአ ብሔር ወኢየጥፍአክሙ

Deut 10:11 ወይቤለኒ እግዚአ ብሔር ሖር ወንግር ለዝ ሕዝብ ወይቡኡ ወይትዋረሱ ምድር እንተ ምሐልኩ ለአበዊሆሙ ከመ አህቦሙ

Deut 10:12 ወይእዜኒ እስራኤል ምንተ ይፈቅድ እግዚአ ብሔር እምነቤክ እንበሌ ትፍርሆ ለእግዚአ ብሔር አምላክክ ወትሖር በኩሉ ፍነዋሁ ወከመ ትፍርሆ ወታምልክ ለእግዚአ ብሔር አምላክክ በኩሉ ልብክ ወበኩሉ ነፍስክ ወትዕቀብ ትእዛዞ ለእግዚአ ብሔር አምላክክ ወኩነኔሁ ኩ(ሎ) ዘአነ እኤዝዘክ ዮም ከመ ሠናይ ይኩንክ

Deut 10:13 ወናሁ ለእግዚአ ብሔር አምላክክ ሰማይ ወሰማየ ሰማያት ወምድር ወኩሉ ዘውስቴታ

Deut 10:14 ወዳእሙ አበዊክሙ አብደረ እግዚአ ብሔር ያፍቅሮሙ ወሐረየ ዘርአሙ እምድኅሬሆሙ ኪያክሙ እምኩሉ አሕዛብ እስኪ ዛቲ ዕለት

Deut 10:15 ወግዝሩ እከዮ ለልብክሙ እስመ እግዚአ ብሔር አምላክክሙ ውእቱ

Deut 10:16 አምላክ አማልክት ወእግዚአ አጋእስት ውእቱ እግዚአ ብሔር ዐቢይ ወጽኑዕ ወግሩም ዘኢያደሉ ለገጽ ወእይነሥእ ኀልያነ

Deut 10:17 ወይገብር ፍትሐ ለግዩር ወለእጌላ ማውታ ወለእቤር ወያፈቅሮ ለግዩር ወይህቦ ሲሳዮ ወዐራዞ



Deut 10:18 ወአፍቅርዎ አንትሙ እስመ አንትሙኒ ግድራን ኮንክሙ በምድረ ግብጽ

Deut 10:19 ለእግዚአ ብሔር አምላክክሙ ፍርህዎ ወክያሁ ባሕቴቶ አምልክዎ ወኪያሁ ትለው አምልክ ወበስመ ዚአሁ መሐል

Deut 10:20 እስመ ውእቱ ምክሕክ ውእቱ አምላክክ ዘገብረ ለክ ዐቢያተ ወእላንቱ ክቡራተ ዘርኢያ አዕይንቲክ

Deut 10:21 በሰብዓ ነፍስ ወርዱ አበዊክ ውስተ ግብጽ ወይእዚሰ ገበረክ እግዚአ ብሔር አምላክክ ከመ ከዋክብተ ሰማይ በብዝሃ

Deut 11:01 ወአፍቅሮ ለእግዚአ ብሔር አምላክክ ወዕቀብ ሕጎ ወኩነኔሁ ወፍተሕ በኩሉ መዋዕል ሒይወቲክ

Deut 11:02 ወታአምሩ ዮም ከመ አኮ ደቂቀክሙ ዘርእዩ ወአእምሩ ተግሣጾ ለእግዚአ ብሔር አምላክክሙ ወዐቢያቲሁ ወእድ ጽንዕት ወመዝራዕተ ልዑል

Deut 11:03 ወተአምሪሁ ወመድምሞ ኩሉ ዘገብረ {በገብረ} በመእከለ ግብጽ ወለፈርዖን ንጉሠ ግብጽ ወበኩሉ ምድሩ

Deut 11:04 ወኩሉ ዘገብረ በጎይሎሙ ለግብጽ ወበስረገላቲሆሙ ወበአፍራሲሆሙ ዘከመ ከደኖሙ ማይ ባሕር ኤርተራ ለዕሌ ገጽሙ እንዘ ይደግኑክሙ እሙንቱ እምድጎሬክሙ ወአጥፍአሙ እግዚአ ብሔር አምላክክሙ እስከ ዮም ዛቲ ዕለተ

Deut 11:05 ወኩሉ ዘገብረ ለክሙ በገዳም እስከ በጸሕክሙ ውስተዝ መካን

Deut 11:06 ወኩሉ ዘገብረ በዳታን ወበአቢሮን ደቂቀ ኤልያብ ወልደ ሮቤል እንተ ፈትሐት ምድር አፉሃ ወውሕጠቶሙ ወለአቢያቲሆሙ ወለደባትሪሆሙ ወኩሉ ንዋዮሙ ዘምስሌክሙ እመእከሎሙ ለኩሉ እስራኤል

Deut 11:07 እስመ አዕይንቲክሙ ርእያ ኩሉ ግብረ ዐቢያተ ዘገብረ እግዚአ ብሔር

Deut 11:08 ወዕቀቡ ኩሉ ትእዛዞ ዘእኤዝዘክሙ አነ ዮም ከመ ትሕ[የ]ው ወትትበዝሑ ወትበኡ ወትትዋረሱ ምድር እንተ ላቲ ተዐድው ዮርዳንስ ከመ ትትዋረስዋ ብህየ

Deut 11:09 ከመ ይኑህ መዋዕሊክሙ በውስተ ምድር እንተ መሐለ እግዚአ ብሔር ለአበዊክሙ ከመ ይሀብክሙ ወለዘርእክሙ እምድጎሬሆሙ ምድር እንተ ትውሕዝ ሐሊበ ወመዐረ

Deut 11:10 ወከመዝ ይእቲ ምድር እንተ ትበውእ ህየ ትትዋረሳ አኮ ከመ ምድረ ግብጽ ይእቲ እንተ እምኔሃ ወፀእክ ዘሶቤ ይዘርኡ ዘርአ ይሰቂዩ በእገሪሆሙ ከመ ዐጸደ ወይን ወሐምል

Deut 11:11 ወምድርሰ እንተ ትበውእ ውስቲታ ከመ ትረስዋ ምድር እንተ (ባቲ) አድባር ወአምዳር ወእምዝናመ ሰማይ ትሴቂ



Deut 11:12 ማይ ምድር እንተ ዘልፍ ይኼውጸ እግዚአብሔር አምላክከ ወአዕይንቲሁ ለእግዚአብሔር አምላክከ ላዕሌሃ እምርእሰ ዓመት እስኬ መኅለቅቱ ለዓመት

Deut 11:13 ወለእመሰ ሰሚዐ ሰማዕክሙ ኩሎ ትእዛዘ ዘኣነ እኤዝዘክሙ ዮም ከመ ታፍቅሮ ለእግዚአብሔር አምላክከ ወታምልኮ በኩሉ ልብከ ወበኩሉ ነፍስከ ወይሁብ ዝናመ በመዋዕሊሁ ላዕላ ምድርክሙ ዘነግሀኒ ወዘሰ[ር]ክኒ

Deut 11:14 ወአስተጋብእከ እክ[ለከ] ወወይንከ ወቅብእከ ወይሁብ ሣዕር ውስተ ገ[ዳም]ከ ለእንስሳከ ወትበል[እ] ትጸግብ

Deut 11:15 ወዑቁ ባሕቱ ኢታሥብሑ ለብክሙ ወኢ[ት]ክሐዱ ወኢትሑሩ ወኢታምልኩ ባዕድ አማልክተ ወኢትስገዱ ሎሙ

Deut 11:16 ወይትምዕዕ[.] በምዕት እግዚአብሔር ለዕሌክሙ ወይዐጽዋ ለሰማይ ወኢያመጽእ ዝናም ወምድርኒ ኢትሁብ ፍሬሃ ወትጠፍኡ ፍጡነ እምድር ቡርክት እንተ ወሀበክሙ እግዚአብሔር

Deut 11:17 ወዕቀብዎ ለዝ ነገር ውስተ ልብክሙ ወውስተ ነፍስክሙ ወረስይዎ ተአምር ውስተ እደዊክሙ ወይኩን ዘኢይትሔወስ ቅድመ አዕይንቲክሙ

Deut 11:18 ወመሀርዎ ለደቂቅክሙ ከመ ይትናገረ ቦቱ ለእመ ነበሩ ውስተ ቤተ ወለእመኒ ሖሩ ውስተ ፍኖት ወሶቤ ትሰክቡኒ ወሶብ ትትንሥኡኒ

Deut 11:19 ወጸሐፍዎ ውስተ ምርፋቀ ቤተክሙ ከመ ይብዛህ መዋዕሊክሙ ወመዋዕለ ውሉድክሙ ውስተ ምድር እንተ መሐለ እግዚአብሔር ለአበዊክሙ ይሀቦሙ በአምጣኒ መዋዕለ ሰማይ ውስተ ምድር

Deut 11:20 ወለእመ ሰሚዕ ሰማዕክሙ ኩሎ [ትእ]ዛዘ ዘኣነ እኤዝዘክሙ ዮም ከመ ትግበር ወታፍቅሮዎ ለእግዚአብሔር አም[ላክ]ክሙ ወከመ ትሖሩ በኩሉ ፍናዊሁ ወከመ ትትለውዎ ወያወፅኦሙ እግዚአብሔር [ለ]እሉ አሕዛብ ለኩሎሙ እምቅድመ ገጽክሙ

Deut 11:21 ወትትዋረስዎሙ ለአሕዛብ ዐበይተ [እ]ለ ይጸንዑክሙ ፈድፋድ

Deut 11:22 ወኩሎ መካነ ጎቤ ኬደ አሰረ እግርክሙ ለክሙ ውእቱ እም ገዳም ወአንጥሊባኖስ ወእም ፈለግ ዐ[ቢ]ይ አፍራጥስ ወእስከ ባሕር እንተ መንገሌ ዐረብ ይከውን ደወልክሙ

Deut 11:23 ወአልቦ ዘይትቃወም መኑሂ ቅድመ ገጽክሙ ወያመጽእ እግዚአብሔር ቅድመ ፍርሃተክሙ ወርዕደተክሙ ለዕሌ ኩሎ ምድር እንተ ዐረግሙ ላዕሌሃ በከመ ይቤለክሙ እግዚአብሔር

Deut 11:24 ወናሁ ኣነ ዮም ኢቀውም ቅድሜክሙ በረከተ ወመርገም

Deut 11:25 ወበርከተሰ ለእመ ሰመዕክሙ ትእዛዘ ለእግዚአብሔር አምላክክሙ ኩሎ ዘኣነ እኤዝዘክሙ ዮም



Deut 11:26 ወመርገምኒ ለእመ ኢሰመዕክሙ ትእዛዞ ለእግዚአብሔር አምላክክሙ ኩሎ ዘኣነ እኤዝዘክሙ ዮም ወ[ኅ]ደግምዎ ለፍኖት እንተ [እ]ኤዝዘክሙ ዮም ወሐ[ርክ]ክሙ ወአምለክሙ አማ[ልክ]ተ ባዕድ ዘኢታአም[ር]

Deut 11:27 ወሶቤ አብአክ እግዚአብሔር አምላክክ ውስተ ምድር እንተ ላቲ ተዐዱ ዮርዳንስ ከመ ትትዋረስ በህየ ወትገብእ በረከተ ለዕለ ደብር ጋርዝን ወመርገም ለዕለ ደብር ጌበል

Deut 11:28 እለ ሀለው መዕዶተ ዮርዳንስ ድኅሬ ፍኖት ዘመንገለ ዐረቢ ፀሓይ በምድረ ከፍአን እሌ ሀለው ውስተ ዐረብ መእኃዚ ኅልኃል [ቅ]ሩብ [ዕፀ] ነዋኅ

Deut 11:29 ወናሁ ተዐድውዎ አንትሙ ዮርዳንስ ከመ ትባኡ ወትትዋረስዎ ለምድር እንተ ይህበክሙ እግዚአብሔር አምላክክሙ መክፈልተክሙ በኩሉ መዋዕል ዘታነብሩ ውስቴታ

Deut 11:30 ወዕቀቡ ከመ ትግበርዎ ኩሎ ትእዛዞ ወፍትሐ ኩሎ ዘኣነ እ[ሁ]በክሙ ቅድሚክሙ ዮም

Deut 12:01 [ዝን]ቱ ውእቱ ትእዛዝ ወፍትሐ ዘተዐቀቡ ከመ ትግበሩ በምድር እንተ ይሁበክሙ እግዚአብሔር አምላክክሙ መክፈልተክሙ በኩሉ መዋዕል

Deut 12:02 ወደምስሰ ደምስስዎ በኩሉ መካን ዘብ[.] [አም]ለኩ አማልክቲሆሙ አሕዛብ ዘአንትሙ ትትዋረ[ስ]ዎሙ በውስተ አድባ[ር ነዋኅ]ት ወበውስተ አውግር [ወበታ]ሕተ አእዋም [ቈ]ጸል

Deut 12:03 [...] ምሥዋዕቲሆሙ ወቀ[ጥቀጡ] ምሰሌሆሙ ወግዘሙ አእዋሚሆሙ ወአውዕዩ በእሳት ግልፎ አማልክቲሆሙ ወደምስሱ አስማቲሆሙ እምድር

Deut 12:04 ወትገብሩ ከመዝ ለእግዚአብሔር አምላክክሙ በአሐቲ እምአህጉሪክሙ ከመ ይሰመይ ስሞ በህየ

Deut 12:05 ወትወስዱ መሥዋዕቲክሙ ወቀርባኒክሙ በቀዳሚያቲክሙ ወበፅዓቲክሙ ወዘበፈቃድክሙ ወዘበአሚኖቲክሙ ወበኩረ አልህምቲክሙ ወዘአባግዒክሙ

Deut 12:06 ወብልዑ ብህየ ቅድመ እግዚአብሔር አምላክክሙ ወተፈሥሑ በኩሉ ዘውስቴቱ ወደክሙ አንተሙ በእዴክሙ ወበቤተክሙ እስመ ባረከክ እግዚአብሔር አምላክክ

Deut 12:07 ወኢንግበር ኩሎ ዘገብሩ ንሕነ ዮም በዝዩ አሐዱ አሐዱ ዘአደሞ በቅድሚሁ

Deut 12:08 እስሜ ኢበጻሕክሙ እስኬ ይእዜ ውስቴ ምዕራፍክሙ ወውስቴ ርስተክሙ ዘይሁብክሙ እግዚአብሔር አምላክሙ

Deut 12:09 ወዕደው ዮርዳንስ ወንበሩ ውስተ ምድር እንተ ያወርሰክሙ እግዚአብሔር አምላክክሙ ወያዐርፈክሙ እምኩሉ ፀርክሙ እለ እውድክሙ ወትነብሩ ተአሚንክሙ



Deut 12:10 ወይኩን ዝንቱ መካን ዘኅረየ እግዚአብሔር አምላክክሙ ከመ ይሰመይ ስሞ ብህየ ወትወስዱ ኩሎ
ዘኣነ እኤዝዘክሙ ዮም መሥዋቲክሙ ወቅርባንክሙ ወዕሥራቲክሙ ወቀዳሚያቲክሙ ዘእደዊክሙ ወሃበተክሙ
ወኩሎ ዘኅሩየ መባእክሙ ኩሎ ዘበፀፀክሙ ለአምላክክሙ

Deut 12:11 ወተፈሥሑ ቅድመ እግዚአብሔር አምላክክሙ አንትሙ ወደቂቀክሙ ወአዋልዲክሙ
ወአግብርቲክሙ ወአእማቲክሙ ወጊዩር ዘውስተ ሀገርክሙ ወትትፍሣሕ ቅድመ እግዚአብሔር አምላክክ በኩሎ
ዘወደይክ ውስቴቱ እደኤኪ

Deut 12:12 vacat

Deut 12:13 vacat

Deut 12:14 vacat

Deut 12:15 vacat

Deut 12:16 vacat

Deut 12:17 ወዑቅ ርእሰክ ኢትኅድኅ ለሌዋ(ዊ) በኩሎ መዋዕል ዘሕያው አንተ ለዕለ ምድር

Deut 12:18 ወለእመኒ አርሐበ ለክ እግዚአብሔር ደወለክ በከመ ይቤለክ አምላክክ ወትቤ እብልዕ ሥጋ ወለእመ
ፈተወት ነፍሰክ ከመ ትብለዕ ሥጋ እምኩሎ ዘፈተወት ነፍሰክ ብለዕ ሥጋ

Deut 12:19 ወ(ለ)እመሰ ርሑቀ ውእቱ መካን ኅቤ ሐርየ እግዚአብሔር አምላክክ ከመ ይሰመይ ስሞ በህየ
ወትጠብኅ እምውስተ አልህምቲክ ወአባግዲክ እምውስተ ዘወሀበክ እግዚአብሔር አምላክክ በከመ አዘዝኩክሙ
ወብላዕ በሀገርክ ዘፈተወት ነፍሰክ

Deut 12:20 ከመ ትብልዑ ወይጠል አው ህየል ከማሁ በልዖ ዘርኩሰኒ እምኔክ ወዘንጹሐኒ ከማሁ በልዕዎ

Deut 12:21 ወተዓቀብ ጥቀ ከመ ኢትብለዕ ደም እስመ ደም ነፍሱ ውእቱ ውኢይብልዑ ነፍሰ ምስለ ሥጋ
ኢትብልዕዎ ውስተ ምድር ከዐውዎ ከመ ማይ

Deut 12:22 ወኢትብልዕዎ ከመ ሠናይት ትኩንክ ወለውሉድከኒ እምድኅሬክ ለእመ ገበርክ ዘሠናይ ወዘአዳም
ቅድሜ እግዚአብሔር አምላክክ

Deut 12:23 ወብሕቱ ዘረሰይክ ቅዱሰ ወዘብፀፀክ ንሣእ ወሐር ውስተ መካን ዘሐረየ እግዚአብሔር አምላክክ ከመ
ይሰመይ ስሙ ብህየ

Deut 12:24 ወትገብር መሥዋዓክ ሥጋሁ ትወዲ ውስተ ምሥዋዕ ወደሙሰ ለመሥዋዕቲክ ትክዕው ኅቤ መንበረ
መሥዋዕተ ዘእግዚአብሔር አምላክክ ውብለዕ እምሥጋሁ



Deut 12:25 ወዕቀብ ወሰማዕ ኩሎ ቃል ዘኣነ እኤዝዘከ ዮም ከመ ሠናይ ይኩንከ ወለውሉድከ ለዓለም ለእመ ገበርከ ዘሠናይ ወዘአዳም ቅድመ እግዚአ ብሔር አምላክከ

Deut 12:26 ወለእመኒ አጥፍአሙ እግዚአ ብሔር አምላክከ ብህየ ለአሕዛብ ከመ ትትዋረስዎሙ ምድሮሙ እምቅድሜ ገጽከ ወትትዋ(ረ)ሶሙ ወትነብር ውስተ ምድሮሙ ወዑቅ ርእሰከ

Deut 12:27 ወኢትፍቀድ ተሊወቶሙ እምኅሬ ተሠረው እምቅድመ ገጽከ ወኢትፈቀድ አማልክቲሆሙ ወኢትበል ከመዝ ይገብሩ አሕዛብ ለአማልክቲሆሙ ወእገብር አነኒ

Deut 12:28 ወኢትጎገብር ከማሁ ለእግዚአ ብሔር አምላክከ እስመ ጸልኦ እግዚአ ብሔር ርኩስ ዘይገብሩ አሕዛብ ለአማልክቲሆሙ

Deut 12:29 ኩሎ ቃል ዘኣነ እኤዝዘከ ዮም ዕቀቡ ወግብሩ ኪያሁ ወኢትወስኩ እምኔሁ ወኢትንኪ እምኔሁ

Deut 13:01 ወ(ለ)እመኒ ተንሥኦ እምኔከ ነቢይ አው ሐላሚ ሕልም ወገብረ ተአምር አው መድምም ወበጽሐ ተአምሪሁ አው መድምም ዘይቤለከ እንዘ ይብል ነዐ ንሖር ወናምልክ አማልክተ ዘኢታአምሩ ወኢትስም(ዕ)ዎ ቃሎ ለውእቱ ነቢይ አው ለውእቱ ሐላሚ ሕልም

Deut 13:02 እስመ ያሜክረክሙ እግዚአ ብሔር አምላክክሙ ከመ ይርአይ ለእመ ታፈቅርዎ ለእግዚአ ብሔር አምላክክሙ እምኩሎ ልብክሙ ወእምኩሎ ነፍሰክሙ

Deut 13:03 ትለውዎ ድኅሬሁ ለእግዚአ ብሔር አምላክክሙ ወኪያሁ ፍርሁ ወትእዛዞ ዕቀቡ ወሰምዑ ውኅቤሁ ተማሕፀኑ

Deut 13:04 ወዝክቱሰ ነቢይ አው ሐላሚ ሕልም ለይሙት እስመ ነገረከ በዘ ያስሕተ(ከ) እመ እግዚአ ብሔር አምላክከ ዘአውፅኦከ እምድረ ግብጽ ወቤዘወከ እምቅኔ

Deut 13:05 ወእስመ ፈቀደ ያውፅእ(ከ) እምፍኖተ እንተ አዘዘከ እግዚአ ብሔር አምላክከ ከመ ትሖር ባቲ ወታሰስል ወተማስን እኩይ እምኔከ

Deut 13:06 ወእመኒ አስተቤቀዎከ እኩከ ዘእምአቡከ አው ዘእምእምከ አው ወልድከ አው ወለቲከ አው ብእሲተከ እንተ ውሰተ ሕፅንከ አው ዐርክከ ዘከመ ነፍሰከ ወይቤለከ በጽምሚተ ነዐ ንሖር (ወ)ነምልክ አማልክተ ባዕድ ዘኢታአምር አንተ ወአበዊከ እምውስተ

Deut 13:07 አማልክት አሕዘብ እሌ አውድክሙ ወእሌ ቅሩብክሙ አው እምእሌ ርሑቃን እምኔክሙ እምጽንፈ ምድር እስኪ ጽንፈ ምድር ኢትሕበር ምስሌሆሙ ወኢትስምዎሙ ወኢትምሐክ ዐይንከ ወኢትምሐሮሙ ወኢትሰውሮ

Deut 13:08 አይድዕ ወነግር በእንቲአሁ ወእደዊከ ይቀድማ ቀትሎቶ ወእምዝ እደው ኩሎ አሕዛብ ይወግራሁ በእብነ ወይቀተልዎ



Deut 13:09 እስመ ፈቀደ ያርሕቅክ እመ እግዚአብሔር አምላክክ ዘአውፅአክ እምድረ ግብጽ ወእምቤተ ቅኔ

Deut 13:10 ወኩሉ እስራኤል ሰሚያ ይፍራህ ወኢይድግም እንከ ገቢሮተ እኩይ ወስቴቲክሙ

Deut 13:11 ወለእመኒ ሰማዕከ በውስተ አሓቲ እምውስተ አህጉሪክሙ ዘወሀበከ እግዚአብሔር አምላክክ ከመ ትንቡር እንዘ ይብሉ ወፅኡ ዕደው ኃጥአን እምኔነ

Deut 13:12 ወአክሐድዎሙ ለኩሎሙ እለ ይነብሩ ውስቴ አህጉሪሆሙ ወይቤልዎሙ ንዑ ንሖር ናምልክ አማልክተ ባዕድ ዝኢታአምር ወተሰአል ወተሐተት ጥቀ

Deut 13:13 እምከመ እሙን ኮነ ወጥዩቀ ነገሩ ከመ ኮነ ርኩስ እምውስቴተክሙ ቀቲለ ትቅትሉ ኩሎሙ እለ ይነብሩ ውስተ ይኡቲ ሀገር በኅዚን

Deut 13:14 ወረጊም ተረግምዋ ወለኩሉ ዘሀለወ ውስቴታ ወለኩሉ ንዋያ ተስተጋብእ ውስተ ፍነዊሃ ወታውዒ ሀገራ በእሳት

Deut 13:15 ምስለ ኩሉ ንዋያ ወምስለ ኩሉ ሀገር ከማሁ ትንብር በቅድመ እግዚአብሔር አምላክክ ወአልቦ ዘይነብር ውስቴታ ለዓለም ወኢትተነደቅ

Deut 13:16 ወኢተግሰስ በእዴከ መንተኒ እምዘ ርጉም ዘውስቴታ ከመ ይሜጥ እግዚአብሔር መዐቶ ወየሀብከ ምሕረተ ወይምሐርከ ወያስተባዝኅከ በከመ መሐለ እግዚአብሔር ለአበዊከ

Deut 13:17 ከመ ለእመ ሰሚዐ ሰማዕከ ቃለ እግዚአብሔር አምላክከ ወዐቀብከ ኩሎ ትእዛዞ ኩሎ ዘአነ እኤዝዘከ ዮም ወገበርከ ሠናይ ወዘአዳም ቅድመ እግዚአብሔር አምላክከ ውሉደ ትከውኑ ለእግዚአብሔር አምላክከ

Deut 14:01 ወኢትትላጸዩ ርእሰክሙ በእ[ን.] ዘሞተ እስመ ሕዝብ ቅዱስ አንተ ለእግዚአብሔር አምላክከ ወኪያክ ሐረየክ እግዚአብሔር አምላክከ ከመ ትኩኖ ሕዝቦ ለርእሱ እምውስተ ኩሉ አሕዛብ ዘውስተ ምድር

Deut 14:02 ወኢትብልዑ ዘንተ ኩሎ ርኩስ ወዝ ውእቱ ዘትበለዑ እምውስተ እንሰሳ ላህም ወበግዕ ወእምውስተ አባግዕኒ ወሐራጊተ ወእምውስተ አራዊተኒ ህየል ወወይጠል ወቶራ ወድስክን ወውዕል ወአሪጋ ወዘራተ

Deut 14:03 ወኩሉ እንሰሳ ዘንፉቀ ሰኩናሁ ወክፋለ ጽፍሩ ወክልኤ ጽፈሪሁ ወይትምስኳዕ ዘንተ ዘተበልዑ እምውስተ እንሰሳ

Deut 14:04 ወዘንተ ዘኢተበልዑ እምውስተ ዘይምሥኳዕ ዘንፉቀ ሰኩናሁ ወዘክፋል ጽፈሪሁ ገመል ወዳሲጳጳ ወክሮግርሊዮድን እስመ ይትምሥኳዕ ወኢኮነ ንፉቀ ሰኩናሁ ርኩስ ውእቱ(ዝ) ለክሙ

Deut 14:05 Vacat



Deut 14:06 ወዝእብኒ እስመ ንፉቀ ሰኩናሁ ወክፉል ጽፍሩ ወተመሥኸዎ ኢይትመሰኳዕ ርኩሰ ውእቱ ለክሙ እምውስተ ሥጋሆሙ ኢይብልዑ ወበድኖሙ ኢትግሰሱ

Deut 14:07 ወዝ ዘትበልዑ ዝእምውስተ ማይ ኩሎ ዘቦ ክንፍ ወቀሳር ብልዑ

Deut 14:08 ወኩሎ ዘክልቦ ቅሰ[ር] ወክንፍ ኢትብልዑ ርኩሰ ውእቱ ለክሙ

Deut 14:09 ወኩሎ ሶፍ [ን]ጸሐ ብልዑ

Deut 14:10 ወዘኢትበልዑ እምውስቲቶሙ ንስር ወጊጻ ወኢሊንጦን ወጊርጻ ወሆባይ ወዘአምሳሉ

Deut 14:11 ቋዕ ወዘአምሳላ

Deut 14:12 ወሰገኖ ወግሊውቃ ወለሮን ወኦሮድዮን ወቀቀናን ወኢብን ወቀጥራቀጤን ወጉዘ ወዘአምሳሉ

Deut 14:13 ወህጳጳ ወጉጳ ወኦባ ጉንባሕ ወኩራድርዮን ወዘአምሳሉ

Deut 14:14 ወጳርፍርዮን ወፅግነተ

Deut 14:15 ዘንተ ኩሎ አዕዋፍ ርኩሰ ውእቱ ለክሙ ውኢትብልዑ እምኔሆሙ

Deut 14:16 ወእምኩሎ አዕዋፍ ዘንጸሐ ብልዑ

Deut 14:17 ወኩሎ ምውተ ኢተብልዑ ለአረሚይ ዘውስተ ሀገርከ ሀብዎ ይብላዕ አው ሀብዎ ለሲሳዩ እስመ (ሕዝብ) ቅዱስ አንተ ለእግዚአ ብሔር አምላክክ

Deut 14:18 ወኢታብስል መሕስኦ በሐሊበ እሙ

Deut 14:19 ወዐሠራተ ትዔሥር ኩሎ እክልክ ዘዘራእክ ዘታኦቱ እምውስተ ገራውህክ ዘዘ ዓመቱ ውብልዎ

Deut 14:20 በቅድመ እግዚአ ብሔር አምላክክ በመካን ዘሐርየ እግዚአ ብሔር አምላክክ ከመ ይሰመይ ስሙ ብህየ

Deut 14:21 ወታበውእ ዓሥራቲሁ ለእክል(ከ) ህየ ወለወይንክ ወለቅብእክ ወለኩሎ አልህምቲክ ወዘአባግዒክ ከመ ትትምህር ፈሪሆቶ ለእግዚአ ብሔር አምላክክ በኩሎ መዋዕል

Deut 14:22 ወለእመሰ ርሑቀ ውእቱ እምኔክ ፍኖቱ ወኢተክል ወሲድ እስመ ርሑቅ ውእቱ መካን ዘሐርየ እግዚአ ብሔር አምላክክ ከመ ይሰመይ ስሙ በህየ እስመ ይበርክክ እግዚአ ብሔር አምላክክ

Deut 14:23 ወትሁብ ሢጦ ለኩሎ ዘፈተወት ነፍስክ



Deut 14:24 አው ለላህም አው ለበግዕ አው ለወይን አው ለሜስ አው ለኩሉ ዘፈተውት ነፍስከ ወብላዕ ብሂየ በቅድመ እግዚአ ብሔር አምላክከ ወተፋሥሕ አንተ ወቤተከ

Deut 14:25 ወሌዋዊ ዘውስቴ ሀገርክ እስመ አልቦ ክፍል ወርስተ ምስሌክ

Deut 14:26 ወበሣልስ ዓም ታበውእ ዓሥራተ እክልከ ወዘዓመቱስ ታነበሮ ውስተ ቤተከ ወእምዝ ይመጽእ ምስሌክ ሌዋዌ እስመ አልቦ ክፍል ወርስተ ምስሌክ

Deut 14:27 ወግደር ወእንለ ማውታ ወእቤር አንተ ውስተ ሀገርክ ከመ ይብልፁ ወከመ ይባርክ እግዚአ ብሔር አምላክከ በኩሉ ግብርክ ዘገበርክ

Deut 15:01 ወበሳብዕ ዓም ትገብር ኅድገተ ወከመዝ ውእቱ ትእዛዝ ለኅድገተ ዘይትኅደግ

Deut 15:02 ኩሉ ንዋይከ ዘይፈድየከ ካልእከ ወእኅከ ኢትትፈደይ እስመ ኅድገተ ተሰምየት ለእግዚአ ብሔር አምላክከ

Deut 15:03 ወዘገቤስ ነኪር ተፈደይ ኩሉ ዘብከ ኅቤሁ ለእኅከስ ኅድገተ ትገብር ዘይፈድየከ

Deut 15:04 እስመ አልቦ ነዳይ እምኔከ እስመ ባርኮ ይባርክ እግዚአ ብሔር አምላክከ በውስተ ምድር እን[ተ] ይሁበከ እግዚአ ብሔር አምላክከ መክፈልቲከ ዘትወርስ

Deut 15:05 ወለእመስ ሰሚዐ ሰማዕክሙ ቃለ እግዚአ ብሔር አምላክክሙ ወዐቀብክሙ ወገበርክሙ ኩሎ ዘንተ ትእዛዝ ዘእነ እኤዝዘክሙ ዮም እስመ ባረከከ እግዚአ ብሔር አምላክከ በከመ ይቤለከ

Deut 15:06 ወትሌቅሕ ለአሕዛብ ብዙኅ ወአንተስ ኢትትሌቃሕ ወትኳንኖሙ አንተ ለብዙኃን አሕዛብ ወኪያከስ ኢይኳንኑከ

Deut 15:07 ወለእመኒ ቦ ዘተፀነስ በውስተ አኃዊከ በአኅቲ እምአህጉሪከ ዘወሀበከ እግዚአ ብሔር አምላክከ ኢተሚጥ ልብከ ወኢታጽንዕ እዴከ እምውሂቦቱ ለእኅከ

Deut 15:08 ወፍታኅ ወአርኅ እዴከ ወሀብ ዘሰአለከ ዘከመ ሰአለከ

Deut 15:09 ወዑቅ ርእስከ ኢይኩን ኅቡእ ቃለ ኅጢአት ውስተ ልብከ እንዘ ትብል ቅሩብ ውእቱ ዓመተ ኅድገተ ዘሰብዕ ዓም ወኢይሁብ ወያኣኪ ለዕሌከ ዐይኖ እኅከ ወይጸርኅ ላዕሌከ ኅቤ እግዚአ ብሔር ወይከውነከ ዓቢይ ኅጢአት

Deut 15:10 እላ ወሂበኒ ሀብ ወለቂሐኒ ለቅሕ መጠኔ ሰአለከ ወኢይተክዝከ ልብከ እንዘ ትሁብ እስመ በእንተዝ ነገር ይባርክከ እግዚአ ብሔር አምላክከ በኩሉ ምግባሪከ ውውስተ ኩሉ ዘወደይከ እዴከ



Deut 15:11 እስሜ ኢይተኅጠእ ነዳይ ውስተ ምድር ወበእንተዝ እኤዘዘክ ኣነ ዮም ትግበር ዘንተ ነገር ወእብልክ ከመ ትፍታኅ ወከመ ታርሑ እዴክ ለእኅክ ዘነዳይ ውእቱ ወለዘ ይስእለክሂ ዘቅሩብክ ዘውስተ ምድርክ

Deut 15:12 ወለእመኒ ተሳይጥክ ኅቤክ እኅክ ዕብራዊ አው ዕብራዊተ ስድስተ ዓመት ይትቀነዩ ለክ ወበሳብዕ ትፌንዎ አግዓዚ እምኅቤክ

Deut 15:13 ወኢትፈንዎ ዕራቁ

Deut 15:14 ሥንቀ ተሰንቆ እምውስተ አባግዲክ ወእምውስተ እክልክ ወእምውስተ መከየደ ወይነክ በአመጣነ ባረክ ለክ እግዚአ ብሔር አምላክክ

Deut 15:15 ወተዜከር ከመ ገብር አንተ በምድረ ግብጽ ወቤዘወክ እግዚአ ብሔር አምላክክ እምህየ ወበእንተዝ እኤዘዘክ ኣነ ዮም ትግበር ዘንተ ነገር

Deut 15:16 ወእመሰ ይቤለክ ሌሊሁ ኢይወፅእ እምቤተክ እስመ አፍቀረክ ወቤተክኒ ሐየሶ ነቢረ ኅቤክ ተነሥእ መስፌ ወትሰቀሩር እዝኖ በኅቤ ጥኅተ በውስተ ምድራክ

Deut 15:17 ወይኩንክ ገብር ዘለዓለም ወእመኒ አመትክ ከማሁ ከመ ትግበር

Deut 15:18 ወኢይትዓፀብክ ፈኒዎቱ አግዓዚ እምኅቤክ እስመ ዐሰብ ዐስብ ዘበ ምድር ተቀንዩ ለክ ስድስተ ዓመተ ወይባርክክ እግዚአ ብሔር አምላክክ በኩሉ ዘገበርክ

Deut 15:19 ወኩሎ በኩር ዘተወልደ እምውስተ አልህምቲክ ወእምውስተ አባግዲክ ተባዕቶ ትቈድሶ ለእግዚአ ብሔር አምላክክ ወኢትቀኒ በኩረ ላህምክ ወኢትቀሩረጽ በኩረ አባግዲክ

Deut 15:20 በቅድመ እግዚአ ብሔር ብልዎ በበ ዓመት በውስተ መካን ዘሐረየ እግዚአ ብሔር አምላክክ አንተ ወቤተክ

Deut 15:21 ውእመሰ ቦቱ ነውር እመኒ ዕዉር ውእቱ አው ሐንከስ አው እምዘ ኮነ ነውር እኩየ ላዕሌሁ ኢትሁሥ ለእግዚአ ብሔር አምላክክ

Deut 15:22 በሀገርክ ብልዎ ርኩሰኒ ወንጹሐኒ ኅቡር ብልዕዎ ከመ ወይጠል አው ህየል

Deut 15:23 ዳእሙ ደም ኢይብልዑ ውስተ ምድረ ይክዐውዎ ከመ ማይ

Deut 16:01 ወዕቀብ ወርኅ ኒሶን ወግበር ፋስካሁ ለእግዚአ ብሔር አምላክክ እስመ በወርኅ ኒሶን ወግእክ እምድረ ግብጽ ሌሊተ

Deut 16:02 ወትጠብኅ ፋሲካሁ ለእግዚአ ብሔር አምላክክ አባግዐ ወአልህምተ በውስተ መካን ዘሐረየ እግዚአ ብሔር አምላክክ ከመ ይሰመየ ስሙ በህየ



Deut 16:03 ወኢትብላዕ ምስሌሁ ብሑኣ ሰቡዕ ዕለተ ናእተ ብለዕ ምስሌሁ ኅብስተ ሕማም እስመ በጉጉእ ወፀእክሙ እምግብጽ ከመ ትዘከሩ ዕለተ ፀአተክሙ እምድረ ግብጽ በኩሉ መዋዕለ ሕይወቲክሙ

Deut 16:04 ወኢ[ያስ]ተርኢ ብሑኣ በኩሉ ደውልከ ሰቡዕ ዕለተ ወኢይቢት እምውስተ ውእቱ ሥጋ ዘጥባኅከ ሰርክ በቀደሚተ ዕለተ ለነግህ

Deut 16:05 ወኢተክል ጥብኅቶ ለፋሲካ ወኢበውስተ አሐቲ በውስተ አህጉሪከ ዘመሀበከ እግዚአ ብሔር አምላክከ እንበሌ ውስተ መካን ዘኅረየ እግዚአ ብሔር አምላክከ ከመ ይሰመይ ስሙ ብህየ

Deut 16:06 ወበህየ ትጠበኅ ፋሲካ ሰርክ ጊዜ ተዐርብ ፀሓይ እስመ በውእቱ ጊዜ ወፃእከ እምግብጽ

Deut 16:07 ታበስል ወታጠብስ ወትበልዕ በውእቱ መካን ዘኅረየ እግዚአ ብሔር አምላክከ ወትገብእ በነግህ ወተአቱ ውስተ አብያቲከ

Deut 16:08 ሰዱስ ዕለት በላዕ ናእተ ወሳበዕተ ሰ ዕለተ እንተ አስተዋፅእ ይእቲ ዘበዓሉ ለእግዚአ ብሔር አምላክከ ወኢትግበር ባቲ ኩሉ ግብር ዘእንበለ ዘይትግበር ለነፍስከ

Deut 16:09 ወሰብዑ ሰናብተ ትኹልቑ ለከ እመዝ አኅዝከ ተዕፅድ እምአሜ መአረር ወትእኅዝ ትኹልቑ ሰብዕ ሰናብተ

Deut 16:10 ወትገብር በዓለ ሰንበተ ለእግዚአ ብሔር አምላክከ በአምግነ ትክል እዴከ ትገብር ወበአምጠነ በረከከ እግዚአ ብሔር አምላክከ

Deut 16:11 ወትትፈላሕ በቅድመ አምላክከ አንተ ወደቂቀከ ወውለትከ ወገብርከ ወአመትከ ወሌዋዊ ዘውስተ ሀገርከ ወግዶር ወእጓለ ማውታ ወእቤር እንተ ኅቤክሙ ውእንተ ውስተ መካን እንተ ኅበ ሐረየ እግዚአ ብሔር አምላክከ ከመ ይሰመይ ስሙ በህየ

Deut 16:12 ወተዘከር ከመ ገብር አንተ በምድረ ግብጽ ወዕቀብ ወግበር ኩሉ ዘንተ ትእዛዝ

Deut 16:13 ወተገብር ለከ በዓለ መጸለተ ሰቡዕ ዕለት ሶቤ አስተጋባእከ ዓውድ ምክያድከ ወእምውስተ ምክያድ ወይንከ

Deut 16:14 ወተፈሣሕ በበዓልከ ወወልድከኒ ወውለተከኒ ወገብርከኒ ወአመቲከኒ ወሌዋዊ ወግዶር ወእጸለ ማውታ ወእቤር እንተ ሀለወት ውስተ ሀገርከ

Deut 16:15 ሰቡዕ ዕለት በዓለተ በዓለ ትገብር ለእግዚአ ብሔር አምላክከ አምውስተ ኩሉ እክልክ ወእምውስተ ኩሉ ግብረ አዴከ



Deut 16:16 ወተፈሳሽ ሠሉስ መዋዕል ለዓመተ ወያስተርኢ ኩሉ ተባዕተ ቅድመ እግዚአብሔር አምላክከ በውስተ መካነ ዘሐረየ እግዚአብሔር አምላክከ በመዋዕል ሃሌሉያ ወበበዓለ ሰንበተ ወ(በ)በዓለ መጸለተ ወኢትምፃእ ቅድመ እግዚአብሔር አምላክከ ዕራቅከ

Deut 16:17 አሐዱ አሐዱ በአምጣነ ኅይለ እዴክሙ ወበአምጣን በረከቱ ለእግዚአብሔር አምላክከ እንተ ወሀበክሙ

Deut 16:18 [ወ]ሢሙ በከሙ ፍትሐተ ወጽሕፍተ መባእ በኩሉ አህጉሪከ ዘወይበከ እግዚአብሔር አምላክከ በበ ነገድክሙ ወይኩንንዎ ለአሕዛብ ኩነኔ ጽድቀ

Deut 16:19 ወኢ(ያ)ድልው ለገጽ ወኢይንሥኡ ሕልያን እስመ ሕልያን ያዐውሮሙ ለጠቢባን ወያሴስሎ ለቃለ ጽድቅ

Deut 16:20 ዘይጸድቅኒ በጽድቁ ለይተሉ ከመ ትሕየዉ ወትባኡ ትትዋረሱ ምድር እንተ ይህበከ እግዚአብሔር አምላክከ

Deut 16:21 ወኢትትክል ለከ አመ ዘያመልኩ እምውስተ ኩሉ ዕፅ ኅቤ ምሥዋዑ ለእግዚአብሔር አምላክከ

Deut 16:22 ወኢትግበር ምስለ ዘጸልእ እግዚአብሔር አምላክከ

Deut 17:01 ወኢትሡዕ ለእግዚአብሔር አምላክ ላህም አው በግዕ ዝነውርቦ ላዕሌሁ ኩሉ ነገር እኩይ ርኩስ ውእቱ በኅቤ እግዚአብሔር አምላክከ

Deut 17:02 ወለእመ ተረክበ በውስተ አህጉሪከ ዘወሀበከ እግዚአብሔር አምላክከ ብእሲ አው ብእሲተ ዘይገብር እኩይ ቅድመ እግዚአብሔር አምላክከ እለ ተዐወሩ ሕጎ

Deut 17:03 ወሐሩ ወአምለኩ ባዕድ አማልክተ ወሰገዱ ሎሙ ለፀሓይ አው ለውርኅ አው እምውስቱ ኩሉ ሰርጐ ሰማይ ዘኢአዘዘከ ወሰመዕከ ወተሐተት ጥቀ

Deut 17:04 ወእምከመ እሙነ ኮነ ዝነገር ወኮነ ዝንቱ ርኩስ በውስተ እስራኤል ወታወፅእ ለውእቱ ብእሲ ወእመኒ ብእሲተ ይእቲ ወይወግርዎሙ በእብን ወይቀተልዎሙ

Deut 17:05 በክልኤቱ ሰማዕተ ወሃለስቱ ሰማዕተ ይመውቱ ወእለ ይመውቱ ኢይሙቱ በአሐዱ ሰምዕ{.}

Deut 17:06 ወአደቂሆሙ ለእሙንቱ ሰማዕት ይቀድማ ቀቲሎቶሙ ወእ(ም)ድኅሬሆሙ እደወ ኩሉ ሕዝብ ወታወፅኡ እኩይ እምኔክሙ

Deut 17:07 ወለእመቦ ዘተሰአነከ ቃል በውስተ ፍትሐ ዘማእከለ ደም ወደም ወመእከ(ለከ) ንጹሐ ለአንጽሐ ወመእከለ ለኳ ወለኳ ቃለ ፍትሐ በውስተ አህጉሪክሙ ትትኔሃእ ወታዐርግ ውስተ መካነ ዘሐረየ እግዚአብሔር አምላክከ ከመ ይሰመይ ስሙ በህየ



Deut 17:08 ወተሐውር ኅብ ካህናት ሌዋዊያን {ወኅቤ} ውኅብ መኳንንት ዘሀለወ በውእቱ መዋዕል ወተስእል ወያየድዑክ ፍትሐ

Deut 17:09 ወትገብር በከመ ቃለ ነገሩክ በውእቱ መካን ዘሐረየ እግዚአብሔር ይሰመይ ስሙ በህየ ወዕቀብ ኩሎ ከመ ትግበር ዘመሀሩክ ሕጎ

Deut 17:10 ወበከመ ፍትሑ ዘነገሩክ ግበር ወኢትትገሐሥ እምቃል ዘነገሩክ ወኢየምን ወኢፅግም

Deut 17:11 ወገክቱ ብእሲ ዘገብረ በትዐቢት ከመ ኢይትአዘዝ ለካህን ዘይቀውም ወይገብር በስሙ ለእግዚአብሔር አምላክክ አው ለመኳንን ዘሀለወ በውእቱ መዋዕል ለይሙት ውእቱ ብእሲ ወአሰሰሉ እኩይ እምእስራኤል

Deut 17:12 ወኩሉ ሕዝብ ሰሚዖ ይፈርህ ወኢይደግም እንከ አበሳ

Deut 17:13 ወለእመኒ ቦእከ ውስተ ምድር እንተ ወሀበከ እግዚአብሔር አምላክክ መክፈለተከ ወተዋረስካሃ ወነበርከ ውስቴታ

Deut 17:14 ወትቤ እሰይም ሊተ መልአክ ከመ ኩሎ አሕዛብ እለ አውድየ ወትሠይም ለከ መልአክ ዘሐረየ አምላክክ እምውስተ አኃዊከ

Deut 17:15 ወኢተክል ሠይም ለከ ብእሴ ነኪር እስመ ኢኮነ እኑከ ከመ ኢያብዝኅ ሎቱ አፍራሰ ወከመ ኢያብእ ለአሕዛብ ውስተ ግብጽ እስመ እግዚአብሔር ይቤ ኢትድገም እንከ ገቢአታ ለይእቲ ፍኖተ

Deut 17:16 ወኢያብዝኅ ሎቱ አንስተ ወኢይሚጥ ልቦ ወኢያብዝኅ ሎቱ ወርቀ ወብሩር ጥቀ

Deut 17:17 ወሶበ ነበረ ውስተ ምኩናኑ ለይጽሐፍ ሎቱ ዘንተ ዳግመ አሪት ውስተ መጽሐፍ በኅቤ ካህናት ሌዋዊያን

Deut 17:18 ወይገብር ኅቤሁ ወያኑብብ ቦቱ በኩሉ መዋዕል ሒይወቱ ከመ ይትመሀር ፈሪሆቶ ለእግዚአብሔር አምላኩ ወይዕቀብ ኩሎ ትእዛዞ ወይግበር ኩነኔሁ

Deut 17:19 ከመ ኢያዕቢ ልቦ እምአኃዊሁ ወከመ ኢይኅድግ እመ ትእዛዙ ለእግዚአብሔር አምላኩ ወኢይትገሐሥ ወኢይምን ወኢፅግም ከመ ይኑኅ መዋዕሉ በውስተ ምኩናኑ ውእቱ ወለውሉደ ውሉዱ በውስተ ደቂቀ እስራኤል

Deut 18:01 ወአልቦሙ መክፈልተ ካህናት ወሌዋዊያን ወኩሉ ሕዝብ ሌዊ ምስሌ እስራኤል መባሉ ለእግዚአብሔር ክፍሎሙ ወኪያሁ ይሴሰዩ

Deut 18:02 ወክፍል ባሐቱ አል(ቦ)ሙ በውስተ አኃዊሆሙ እስመ እግዚአብሔር ውእቱ ክፍሎሙ በከመ ይቤሎሙ



Deut 18:03 ወዝ ውእቱ ሕጎም ለካህናት ዝእምነቤ ሕዝብ እለ ይጠብሑ ጥብኅ እምላህም ወእመበግዕ ዘይህብዎ ለካህን መዝራዕቱ ውጎለቀ

Deut 18:04 ወቀዳሜ ወይንከ ወቀዳሜ ቅብእከ ወዘቀረጽከ አባግዲከ ትህቦ

Deut 18:05 እስመ ኪያሁ ኅረየ እግዚአ ብሔር አምላክከ እምውስተ ኩሉ አሐዘቢከ ከመ ይቁም ቅድሜሁ ለእግዚአ ብሔር አምላክከ ወይትለአክ ወይባርክ በስመ ዚአሁ ውእቱ ወደቂቁ በኩሉ መዋዕል

Deut 18:06 ወለእመ መጽአ ሌዋዊ እመ አህጉሪከሙ ዘእምኩሉ ደቂቀ እስራኤል ወኅቤከ ይነብር ውእቱ እስመ ፈተወ በነፍሱ ከመ ይትልአክ በዝክቱ መካን ኅቤ ኅረየ እግዚአ ብሔር አመላኩ

Deut 18:07 ወይትቀነይ ለስመ እግዚአ ብሔር አምላኩ ከመ ኩሉ አኅዊሁ ሌዋዊያን እለ ይቀውሙ ህየ ቅድመ እግዚአ ብሔር

Deut 18:08 ይትካፈል ወይሴሳይ ዝእንበለ ዘበ ሢመቱ ዘበ ሀገሩ

Deut 18:09 ወእመቦእከ ውስተ ምድር እንተ ይህበከ እግዚአ ብሔር አምላክከ ኢትትምህር ትግበር ከመ ርኩሶሙ ለውእቶሙ አሕዛብ

Deut 18:10 ወኢይትረከብ በውስቴተክሙ ዘይሠውዕ ወልዱ አው ውለቱ በእሳት ወዘያስተቀስም በቅስም ወዘያስተሰግል ወዘይጤያር ወዘሥራይ ወዘሐርስ ወዘብዓዊዕ ወዘያንቅህ ምውተ ወዘይስእሎ ለምውት ወዘያስተሰግል በዶፍ

Deut 18:11 እስመ ርኩስ ውእቱ ኩሉ ዘይገብሮ ለዝ በኅቤ እግዚአ ብሔር እስመ በእንተዝ ረኩሶሙ ያጠፍአሙ እግዚአ ብሔር እምኔከ

Deut 18:12 ወኩን ፍጹም ቅድመ እግዚአ ብሔር አምላክከ እስመ አለኩቱ አሕዛብ እለ አንተ ትወርሶሙ እሙንቱ ያስተሰግሉ ወያጸምኡ መቀሰመ ወለከሰ አኮ ከማሁ

Deut 18:13 ነቢይ ወሀበከ እግዚአ ብሔር አምላክከ እምውስተ አኅዊከ ዘከማየ ወያነሥእ ለከ እግዚአ ብሔር አምላክከ ወሎቱ ስምዕዎ በኩሉ

Deut 18:14 ወበኩሉ ዘሰአልካሁ ለእግዚአ ብሔር አምላክከ በኬሮብ እምዕለተ ተጋባእክሙ (ወትቤሉ) ወኢንድገም እንከ ሰምዖተ ቃሎ ለእግዚአ ብሔር አምላክከ ወዛቲ እሳተ ዐበይ ኢንርአያ እንከ ከመ ኢንሙተ

Deut 18:15 ወይቤለኒ እግዚአ ብሔር አማን ኩሉ ዘይቤሉ

Deut 18:16 ነቢይ አነሥእ ሎሙ እምውስተ አኅዊሆሙ ዘከማከ ወእህቦ ቃልየ ውስቴ አፉሁ ወይነግሮሙ ኩሉ ዘአዘዝክዎ



Deut 18:17 ወብእሲ ዘኢሰምዖ ለውእቱ ነቢይ ለኩሉ ዘነገረ በስመ ዚኣየ ኣነ እትቤቀል እምኔሁ

Deut 18:18 ወባሕቱ ነቢይ ዘይኤብስ ወይገብር ቃል በስምዖ ዘኢኣዘዝኸዎ ይነብብ ወዘነበበ በስመ ባዕድ ኣማልክት ለይሙት ውእቱ ነቢይ

Deut 18:19 ወለእመስ ትብል በልብከ እፎ ኣኣምር ቃል ዘኢይቤ እግዚአ ብሔር እምኩሉ ዘነበበ ነቢይ በስመ እግዚአ ብሔር እምከመ ኢበጽሐ ቃሉ ወኢኮነ በከመ ይቤ ኢነበበ እግዚአ ብሔር ለውእቱ ቃል ወበሐሶት ነበበ ውእቱ ነቢይ ወኢተስምዕዎ

Deut 19:01 ወለእመ ኣጥፍኦሙ እግዚአ ብሔር ኣምላክከ ለኣሕዛብ እለ ይሁበከ እግዚአ ብሔር ምድሮሙ ወተዋረስክምዎሙ ወነበርክሙ ውስተ ኣህጉሪሆሙ ወውስተ ኣበያቲሆሙ ሠለሰ ኣህጉር ትፈልጥ ለከ በመእከለ ምድርክ እንተ ወሀበከ እግዚአ ብሔር ኣምላክከ

Deut 19:02 ወታኣምር ሌሊከ ፍኖቶን ወተከፍል ደወለ ምድርክ መሠልስተ ዘኣስተካፈለከ እግዚአ ብሔር ኣምላክከ ወይኩን ብሂየ ምስካዮ ለቀታሊ ለኩሉ

Deut 19:03 ወዝ ውእቱ ሕጉ ለቀታሌ እምከመ ሰከየ ህየ ይሐይው ለእመ ብኢያእምሮ ቀተሎ ለከልኡ ወእንዘ ኢኮነ ጸላኢሁ ቀዲሙ

Deut 19:04 ወለእመበ ዘኖረ ምስለ ካልኡ ሐቅል ይሐጠብ ዕፅ ወተጉ(ደ)ኣ እዴሁ በጉድብ እንዘ ይገዝም ዕፅ ወወደቀ ሐፂኑ እምውስተ ዕፁ ወወረደ ላዕለ ካልኡ ወቀተሎ ይሰኪ ውእቱ ውስተ ኣሐቲ እምእለ ኣህጉር ወየሐዩ ከመ

Deut 19:05 ኢይዴግኖ ኣበ ደም ወይቀትልዎ ለቀታሊ እስመ ተቀየሞ ልቡ ወይረክብ ለእመ ርሐቆ ፍኖት ወይቀትሎ ነፍሶ እንዘ ኢኮነ ኣበሳሁ ለሞተ እስመ ኢኮነ ጸላኢሁ ቀዲሙ

Deut 19:06 ወበእንተዝ ኣዘዝኩ ኣነ ትግበር ዘንተ ነገር ወእቤለከ ሠላሰ ኣህጉር ፍልጥ ለከ

Deut 19:07 ወለእመ ኣርሐበ ለከ እግዚአ ብሔር ደወለከ በከመ መሐለ እግዚአ ብሔር ለኣበዊከ ወወሀበከ እግዚአ ብሔር ኩሎ ምድር እንተ ይቤ እህቦሙ ለኣበዊከ

Deut 19:08 ለእመ ሰማዕከ ከመ ትግበር ኩሉ ዘንተ ትእዛዝ ዘኣነ እኤዘዘከ ዮም ከመ ታፍቅሮ ዮም ለእግዚአ ብሔር ኣምላክከ ወከመ ትሖር በኩሉ ፍነዊሁ በኩሉ መዋዕል ወትዌስከ ለከ ዓዲ ሠላሰ ኣህጉር ላዕሌ እለክቱ ሠላሳ

Deut 19:09 ወኢትክዐው ደመ ንጹሐ ውስተ ምድርክ እንተ ወሀበከ እግዚአ ብሔር ኣምላክከ መክፈልቲከ ወኢየሀሉ ውስቴተክክሙ ቀታሌ ነፍስ

Deut 19:10 ወለእመስበ ብእሲ ዘይጸልእ ለካልኡ ወይጸንሖ ወእምዝ ተንሥኣ ላዕሌሁ ወቀተሎ ነፍሶ ወሞተ ወሰከየ ውስተ ኣሐቲ እምእለንቱ ኣህጉር ወይልእኩ ሊቃናተ ሀገሩ ወያመጽእዎ እምህየ ወይሜጥውዎ ኪያሁ ለኣበደም ወይቀትሎ



Deut 19:11 ወዐይንክ ኢይሜሕክ ወታነጽሕ ደመ ንጹሐ እምእስራኤል ወትከውን ሠናይተ ለዕሌክ

Deut 19:12 ወኢትትሐሰሰ ደወለ ቢጽክ ዘሠርዑ አበዊክ በውስተ ርስቲክ ዘተዋረስክ ምድር እንተ ወሀበክ እግዚአብሔር አምላኪክ መክፈልቲክ

Deut 19:13 ወኢይከውን አሐዱ ሰማዕተ ከመ ይኩን ሰማዕተ ላዕሌ ሰብእ በኩሉ ጌጋየ ወበኩሉ አበሳ ዘአበሱ በአፍ ክልኤቱ ሰማዕት ወበአፈ ሠለስቱ ሰማዕተ ይሐልቅ ኩሉ ነገር

Deut 19:14 ወእመ አምጽኡ ሎቱ ለሰብእ ሰማዕተ በዐመፃ ወነበበ ላዕሌሁ ሐሰተ ወይቀውሙ እለክቱ ክልኤቱ ዕደው እለ ተጋሠሡ ቅድመ እግዚአብሔር ወቅድመ ካህናት ወቅድመ መኳንንተ እለ ሀለው በእማንቱ መዋዕል ወየሐትቱ መኳንንተ ወይጠይቁ

Deut 19:15 ወእለክቱኒ ክልኤቱ ሰማዕተ ወለዝክቱ አሐዱ ዐማጺ ዘኮነ ስምዐ በዐመፃ ወቆመ ለዕሌ ካልኡ ይግበርዎ ዘከመ ፈቀደ ይግበር እኪተ ለዕሌ ካልኡ ወታሴስሉ እኩይ እምኔክሙ

Deut 19:16 ወባዕድ ሰሚዖ ይፍራህ ወኢይድገም እንከ ገቢረ ዝንተ ነገር እኩይ በውስቴቲክሙ

Deut 19:17 ወዐይን ኢይምሐክ ነፍስ ህየተ ነፍስ ወዐይን ህየተ ዐይን ወስን ህየተ ሰን ወእድ ህየተ እድ ወእግር ህየተ እግር

Deut 20:01 ወለእመ ወፃእክ ፀብእ ለዕለ ፀርክ ወርኢክ አፍራሰ ወመስተጽዕናን ወአሕዛብ ዘይበዝኸክ ኢትፍራህ እምኔሆሙ እስሜ እግዚአብሔር አምላክክ ምስሌክ ውእቱ ዘአውፀክ እምድረ ግብጽ

Deut 20:02 ወሶቤ አኅዝክ ትተቃተል ይመጽእ ካህን ወይነግር ለሕዝብ ወይብሎሙ ስምዑ እስራኤል ናሁ ተሐውሩ አንተሙ ዮም ከመ ትተቃተልዎሙ ለፀርክሙ ወኢይደንግፅክሙ ልበክሙ ወኢትፍርሁ ወኢ(ተ)ንጥዑ ወኢትትገሐሱ እምቅድመ ገጸሙ

Deut 20:03 እስመ እግዚአብሔር አምላክክሙ የሐውር ፍጽመ ለክሙ ከመ ይቅትል ለክሙ ፀርክሙ ወያድኅነክሙ ለክሙ

Deut 20:04 ወይብልዎሙ ጸሐፍተኒ ለአሕዛብ ለእመቦ ብእሲ ዘነደቀ ቤተ ሐዲሰ ወኢገብረ መድቀሐ ቤቱ ለይሖር ወለይግባእ ውስተ ቤቱ ከመ ኢይሙት በውስተ ቀትል ወካልእ ብእሲ ኢይግበር መድቀሐ ቤቱ

Deut 20:05 ወለእመቦ ብእሲ ዘተከለ ዐጸደ ወይን ወኢተፈሥሐ እምውስቴቱ ለይሖር ወለይግባእ ውስተ ቤቱ ከመ ኢይሙተ በውስተ ቀትል ወካልእ ብእሲ ኢይትፍግሕ ቦቱ

Deut 20:06 ወለእመቦ ብእሲ ዘፍሐረ ብእሲተ ወኢነሥኦ ለይሖር ወለይግባእ ውስተ ቤቱ ከመ ኢይሙት በውስተ ቀትል ወካልእ ብእሲ ኢይነሥእ ለብእሲቱ



Deut 20:07 ወይደግሙ ጸሐፍት ብሂሎቶሙ ለሕዝብ ለእመቦ ብእሲ ፈራህ ዘይፈርሆ ልቡ ለይሖር ወለይግባእ ውስተ ቤቱ ከመ ኢይፍራህ ልበ ካልኡ ከመ ዚዚአሁ

Deut 20:08 ወሶበ አኅለቄ ነጊሮቶሙ ጸሐፍተ ለሕዝብ ይሠይሙ መላእክተ ሠራዊተ እምውስተ ዐበይት ሕዝብ

Deut 20:09 ወሶቤ ትመጽእ ኅቤ ሀገር ትትቃተሉ ትጼውዕዎሙ በሰላም

Deut 20:10 ወለእመ አውሥኡክ በሰላም ወኣርሐዉክ ይኩንክ ኩሉ ሕዝብ እለ ተረክቡ በውስቴታ እለ ያገብኡ ለክ ጽብሐተ ወመኩናንክ

Deut 20:11 ወለእመስ ኢያውሥኡክ ወገብሩ ምስሌክ ፀብእ ተነብር ላዕሌሃ ወያገብእ እግዚእ ብሔር አምላክክ ውስተ እደዊክ

Deut 20:12 ወትቀትል ኩሉ ተባዕተ በቀትለ በኅጺን ዘእንበለ አንስት ወንዋይ

Deut 20:13 ወኩሉ እንስሳ ወኩሉ ዘሀሉ ውስቴታ ወኩሉ ጥሪቶሙ ትቤርብር ለክ ወበላዕ ኩሉ በርባር ዘወሀበክ እግዚእ ብሔር አምላክክ

Deut 20:14 ወከመዝ ትገብር ለኩሉ አህጉር እለ ጥቀ ርሑቃን እምኔክ እለ ኢኮነ እምነ አህጉሪሆሙ ለእሉ አሕዛብ እንተ ይሀብክ እግዚእ ብሔር አምላክክ ምድሮሙ ከመ ትትዋረስ

Deut 20:15 ወኢታሐይው ኩሉ ዘነፍስ እለ መርገም ትረግምዎሙ ለኬጤዎን ወለአሞሬዎን ወለከኖንዎን ወለፌሬዜዎን ወለኤዌዎን ወለኢያቡሴዎን ወለጌርጌሴዎን በከመ አዘዘክ እግዚእብሔር አምላክክ

Deut 20:16 ከመ ኢይሜህሩክ ገቢረ ኩሉ ረኩሶሙ ወኩሉ ዘከመ ይገብሩ ለአማልክቲሆሙ ወትጌግዩ ቅድመ እግዚእ ብሔር አምላክክሙ

Deut 20:17 ወለእመ ነበርክ ኅቤ ሀገር ብዙኅ መዋዕል ከመ ትትቃተላ ወከመ ትንሣኣ ኢትግዘም ኦማ ወኢታውርድ ኅጺን ላዕሌሆን እለ እምኔሁ በልዕ ቦኑ ሰብእ ውእቱ ኦም ዘገዳም ከመ ይመጽእ ቅድሜክ ወይባእ ውስተ ሐጹር

Deut 20:18 ወበሕቱ ዘታአምር ዕፅ ዘኢ(ይ)ፈሪ ኪያሁ ትገዝም ወትመትር ወትነድቅ ሐጹር ለዕሌ ይእቲ ሀገር እንተ ትገብር ፀብእ ምስሌክ እስክ ታስተጋብእ

Deut 21:01 ወለእመ ተረከበ ቅቱል በውስተ ምድር እንተ ወሀበክ እግዚእ ብሔር አምላክክ ትትዋረስ ወዱቅ ውስተ ገዳም ወኢያአምሩ ቀታሊሁ ወይወፅኡ ሊቃናቲክሙ ወመኳንንቲክሙ ወይሜጥኑ ዘአውዱ ለውእቱ ምውት

Deut 21:02 ወሀገር እንተ ቅርብት ይእቲ መንገሌሁ ለውእቱ ቀቱል አእሩጊሃ ለይእቲ ሀገር ወያመጽኡ እጉልተ እምውስተ አልህምተ እንተ ኢተቀንየት ወእንተ ኢሰሐበት አርዑተ



Deut 21:03 ወያዐርግዋ አእሩጊሃ ለይእቲ ሀገር ለይእቲ እጐልት ውስተ ቀላተ መብእስ ዘኢተሐርሰ ወኢተዘርእ ወይመትርዋ ሠረዊሃ ለይእቲ እጐልተ በውእቱ ቀላተ

Deut 21:04 ወይምጽኡ ካህናት ወሌዋዊያን እስመ ኪያሆሙ ኅረየ እግዚአ ብሔር ይቁሙ ኅቤሁ ወይባርኩ በስመ ዚአሁ ወበቃለ ዚአሆሙ ይቁም ኩሉ ተስናን ወኩሉ ዘይትጎደግ

Deut 21:05 ወኩሉ አእሩጊሃ ለይእቲ ሀገር እንተ ቅርብት መንገለ ውእቱ ቅቱል ወይትጎፀቡ እደዊሆሙ ለዕለ ርእሶ ለይእቲ እጐልት እንተ መተርዋ ሠረዊሃ በውስተ ቁላት

Deut 21:06 ወይነብቡ ወይበሉ እደዊነ ኢክዐዋ ደሞ ለዝንቱ ወአዐይንተነሂ ኢርኢያ

Deut 21:07 ሰረይ ለሕዝብክ እስራኤል እለ ቤዘወካሆሙ እግዚአ እምድረ ግብጽ ከመ ኢይኩን ጊጋየ ነፍሰ ለዕለ ሕዝብክ እስራኤል ወይሰራ(ይ) ሎሙ በእንተ ውእቱ ነፍስ

Deut 21:08 ወአንተሰ አሰስል ጊጋየ ነፍስ እምላዕሌክሙ ወትከውን ሠናይ(ተ) ለዕሌክሙ ለእመ ገበርከ ዘሠናይ ወዘአዳም ቅድመ እግዚአ ብሔር አምላክክ

Deut 21:09 ወለእመ ወፃእክ ፀብእ ለዕሌ ፀርክ ወአግብአሙ እግዚአ ብሔር አምላክክ ውስተ እዴክ ሂወውክ ሂዋሆሙ

Deut 21:10 ወርኢክ በውስተ ሂዋ ብእሲት ወሠናይተ ርእየታ ወ(ፈተ)ውከሃ ወነሣእካሃ ተወስብ

Deut 21:11 ወታበውአ ውስተ ጽርሐ ቤትክ ወትለጽያ ርእሳ ወትጸፍራ ወታሴስል አልባሲሃ ዘቦቱ ተሂወወት ወታነበራ ውስተ ቤትክ ወብኪ አቡሃ ወእማ ሰላሳ ዕለት

Deut 21:12 ወእምድኅረዝ ትበውእ ኅቤሃ ወትነብር ምስሌሃ ወተክውነክ ብእሲተ

Deut 21:13 ወእምዝ ለእመ ኢፈቀደከሃ ትፌንዋ ወታግዕዘ ወሠይጠሰ ኢትሠይጣ በወርቀ ወኢተክሕዳ ዘአውሰብከሃ

Deut 21:14 ወለእመ አውሰበ ብእሴ ክልኤ አንስት ወአሐተ ይጸልእ ወአሐተ ያፈቅር ወወለደት ወልድ በኩሩ እንተ ይጸልእ

Deut 21:15 አሜ ያስተዋርሶሙ ንዋዮ ለደቂቁ ኢይከውኖ አዕቢዮቶ ለወልደ ለእንተ ያፈቅር ወተዐውሮቶ ለወልዳ ለእንተ ይጸልእ

Deut 21:16 ለበኩሩ እስመ ውእቱ በኩሩ ወልዳ ለእንተ ይጸልእ ወይሁብ ምክዕቢተ እምኩሉ ዘተርከበ ሎቱ እስመ ውእቱ ቀዳሜ ወልዱ ወሎቱ ይረሲ ዘበኩረ



Deut 21:17 ወለእመቦ ዘቦቱ ወልድ ወዝሁር ወኢይትኤዘዝ ለቃለ አቡሁ ወለቃለ እሙ ወገሠጽዎ ወኢሰምዖሙ ይንሥእዎ ወይሰድዎ ኀበ ሊቃናተ ሀገሩ ወውስተ አንቀጽ ብሔሩ

Deut 21:18 ወይብልዎሙ ለሰብእ ሀገሮሙ ዘወልድነ ይክሕደነ ወያዐቢ ርእሶ ወኢይሰምዕ ቃልነ ወይሰግር ወይሰክር

Deut 21:19 ወይገርዎ በእብን ሰብአ ሀገሩ ወይቀተልዎ ወታሴስሉ እኩይ እምኔክሙ ወኩሉ እስራኤል ሰሚዖ ይፍራህ

Deut 21:20 ወለእመቦ ዘአበሰ ወበጽሐ ጊጋዮ ከመ ይትኩነን ሞተ ትሰቅልዎ ዲበ ዕፅ ወተቀትልዎ

Deut 21:21 ወኢይቢት ሥጋሁ ዲበ ዕፅ እለ ቀቢር ቅበርዎ በይእቲ ሰዐት እስመ ርጉም ውእቱ በኀበ እግዚአ ብሔር ኩሉ ዘስቁል ዲበ ዕፅ ወኢታርኩስዎ ለምድር እንተ ይሁበክሙ እግዚአ ብሔር አምላክክሙ መክፈልተክ

Deut 22:01 ወ[ለእመ ርኢ]ከ ላህም ቢጽከ አው በግዖ ኀቤ ተገድፈ ውስተ ፍኖተ ወኢትትዐወሮ አሡጥ ወአግብአ ሎቱ ለካልእከ ወአወፊዮ

Deut 22:02 ወለእመኒ ኢኮነ ቅሩብ ኀቤከ ካልእከ ወለእመኒ ኢተአምሮ ታስተጋብእ ወታአቱ ቤተከ ወይነበር ኀቤከ እስኪ አሜ ይኀሥዎ ካልእከ ወታገብእ ሎቱ

Deut 22:03 ወከመዝ ትገብር በእንተ ኩሉ ዘገደፈ ካልእከ ወተገድፈ እምኀቤሁ ወረከብካሁ ወኢትክል ተዐውሮቶ

Deut 22:04 ወለእመ ርኢከ አድግ ቢጽከ አው ላህም እንዘ ውዱቅ ውስተ ፍኖት ኢትትዐወሮ ታነሥእ ወታልዕል ምስሌሁ እመኒ አድኀ ወእመኒ ላህሙ ከመዝ ትገብር ወእመኒ ልብሱ ከማሁ ትገብር በእንተ ኩሉ ዘገደፈ ካልእከ ዘተገድፈ እምኀቤሁ

Deut 22:05 ወኢትትረሰይ {ብእሲ} ብእሲተ ብእሲ ወኢይልበስ ብእሲ ልብስ ብእሲተ እስመ ርኩስ በኀቤ እግዚአ ብሔር አምላክከ ኩሉ ዘይገበሮ ለዝ

Deut 22:06 ወለእመ ረከበከ እፄለ ዖፍ በቅድመ ገጽከ በውስተ ፍኖተ ወእመኒ በውስተ ኩሉ ዕፀው አው በውስተ ምድር እመኒ እፄለ አዕዋፍ ዘኢይሰርር ወእመኒ አንቆቀሐ ኢትንሣእ አሜ እስከ እፄሊሃ

Deut 22:07 ታሰርር ወታጊዕዝ እም ወእፄሊሃኒ ትንሣእ ለከ (ከመ) ትኩን ሠናይተ ለዕሌከ ወይብዘኀ መዋዕሊከ

Deut 22:08 ወለእመ ነደቀ ቤተ ሐዲስ ትገብር ትድባብ ለናሕስከ ወኢትግበር ቀትለ በውስተ ቤተከ ከመ ኢይደቅ ዘይወድቅ እምኔሁ

Deut 22:09 ወኢትትክል እምውስተ ኩሉ ኀብር ዐጸድ ወይንከ ከመ ይትቀደስ ፍሬሁ ወዘርእኒ ዘትዘርእ ምስሌ ፍሬ ወይንከ



Deut 22:10 ኢትሕረስ በአድግ ወበላህም ኅቡር ወኢትልበስ ልብስ ዘበጸምር ወበዐጌ ኅቡር ተአንመ

Deut 22:11 ወትገብር ለከ ዘፈሩ ዘፍቱለ ውስቴ አርባዕቲሆሙ መአዘነ አልባሲከ ዘትለብስ

Deut 22:12 ወለእመቦ ዘአውሰበ ብእሲተ ወነበረ ምስሌሃ ወእምዝ ጸልአ ወእምጽአ ላቲ ነገር ምክንያተ ወአውፅአ ላቲ ስመ እኩይ ወይቤ ነሣእክዋ ለዛቲ ብእሲተ ወሶቤ ቦእኩ ለዕሌሃ ኢረከብኩ ድንግልናሃ ወይነሥኡ አቡሃ ወእማ መንጸፈ ድንግልናሃ ለውለቶሙ ወይወስዱ ኅቤ ሊቃናተ ኅቤ አንቀጽ

Deut 22:13 ወይብሎሙ አቡሃ ለይእቲ ውለተ ለሊቃናተ ዛቲ ወለትየ ወሃብክዎ ለዝ ብእሲ ትኩኖ ብእሲቶ ወሶቤ ጸልአ ይእዜ አምጸአ ላቲ ነገር ምክንያተ ወይቤ ኢረከብኩ ድንግልናሃ ለውለተከ

Deut 22:14 ናሁ ዝውእቱ መንጸፍ ድንግልናሃ ለወለትየ ወይሰፍሕዎ ለውእቱ መንጸፍ ቅድመ ሊቃናተ ዘይእቲ ሀገር

Deut 22:15 ወይኅአዝዎ ለውእቱ ብእሲ ሊቃናተ ይእቲ ሀገር ወይገስጽዎ ወይነሥእዎ ምእተ ኅልቀ ወየሀብዎ ለአቡሃ ለይእቲ ወለት

Deut 22:16 እስመ አውፅአ ስመ እኩይ ለዕለ ድንግልና እስራኤል ወትከውኖ ሎቱ ብእሲቶ ወኢይከውኖ ኅዲጎታ መጠነ ሕያው ውእቱ

Deut 22:17 ወለእመሰ እሙን ኮነ ዝነገር ወኢተረክበ ድንግልናሃ ለይእቲ ወለተ ወያመጽእዋ ለይእቲ ወለተ ኅቤ ኖኅተ ቤተ አቡሃ ወይወግርዋ በእብን ሰብአ ሀገር ወይቀትልዋ

Deut 22:18 እስመ ገብረት ፅእለተ በውስተ ደቂቀ እስራኤል ወአዘመወት ቤተ አቡሃ ወአፅአለት ወታሴስሉ እኩይ እምውስቴቲክሙ

Deut 22:19 ወለእመቦ ዘተረክበ ብእሲ እንዝ ይሰክብ ምስለ ብእሲተ ብእሲ ቅተልዎሙ ክልኤሆሙ ለውእቱሂ ብእሲ ዘሰከበ ምስሌሃ ለይእቲ ብእሲተ ወለይእቲኒ ብእሲት ወያሴስሉ እኩይ እምውስተ እስራኤል

Deut 22:20 ወለእመቦ ውስተ ድንግል እንተ ፍኅርተ ይእቲ ለብእሲ ወረከባ በዕድ ብእሲ በውስተ ሀገር ወሰከበ ምስሌሃ አውፅእዎሙ ክልኤሆሙ ኅቤ አንቀጸ [ለይእቲ] ሀገር ወይውግርዎሙ [...]

Deut 22:21 ወይቅትልዎሙ ለወለተኒ እስመ ኢጸርኅተ በውስተ ሀገር ወለውእቱኒ ብእሲ እስመ አኅሰራ ለብእሲተ ካልኡ ወአሰስሉ እኩየ እምውስቴትክሙ

Deut 22:22 ወለእምሰ በገዳም ረከባ ብእሲ ለውለት እንተ ፍሕርት ይእቲ ወተኅየላ ወሰከበ ምስሌሃ ቅተልዎ ለዝንቱ ዘሰከበ ምስሌሃ ለባሕቱቱ

Deut 22:23 ወለውለትሰ አልቦ ዘትፊሲይዋ እስመ አልባቲ ጊጋይ በዘ ተመውት ይእቲ ወለተ ከመ ሶቤ ይትነሣእ ብእሲ ለዕሌ ክልኡ ወይቀትሎ ነፍሰ ከማሁ ውእቱ ዝነ(ገ)ር



Deut 22:24 እስመ በገዳም ረከባ ወጸርሐት ይእቲ ውለት እንተ ፍኅርት ይእቲ ወአልቦ ዘረድአ

Deut 22:25 ወእመቦ ዘረከበ ወለተ ድንግል እንተ ኢኮነት ፍኅርተ ወተሐያለ ወሰከበ ምስሌሃ ወረኮብዎ ይህቦ ለአቡሃ ውእቱ ብእሲ ዘሰከበ ምስሌሃ ለይእቲ ወለት ኅምሳ ዲድርክመ ብሩር ወትከውኖ ሎቱ ብእሲቱ እስመ አኅሰ(ራ) ወኢይከውኖ ጊጋይ ወኢይከውኖ ይኅድጋ መጠኔ ሕያው ውእቱ

Deut 22:26 ወኢይንሣእ ብእሲ ብእሲተ አቡሁ ወኢይክሠት ኅፍረተ አቡሁ

Deut 23:01 ወኢይባእ ንውር ወሕፅው ውስተ ቤተ እግዚአ ብሔር ከመ ኢያዛሙ ቤተ እግዚአ ብሔር

Deut 23:02 ወኢይባእ ዐመናዊ ወመአባዊ ውስተ ቤተ እግዚአ ብሔር እስኪ ሠልስተ ወራብዕተ ተውልድ ወእስከ ዐሠርተ ኢይባእ ቤተ እግዚአ ብሔር ወእስኪ ለዓለም

Deut 23:03 እስመ ኢተቀበሉክሙ በእክለ ወበማይ ውስተ ፍኖተ አሜ ወገእክሙ እምድረ ግብጽ እስመ ዐሠብዎ ለበለዐም ወልደ ቤዖር ከመ ይርገምክሙ

Deut 23:04 ወኢፈቀደ እግዚአ ብሔር ከመ ይስምዖ ለበለዐም ወሜቦ እግዚአ ብሔር አምላክከ ለመርገሙ ውስተ በረከት እስመ አፍቀረክ እግዚአ ብሔር አምላክከ

Deut 23:05 ወኢትትናገሮሙ ሰለም በዘ ይደልዎሙ በኹሉ መዋዕሊከ ወለዓለም

Deut 23:06 ወኢታስቆርሮ ለኢያዶምያዊ እስመ እኅከ ውእቱ ወኢታስቆርሮ ለግብጻዊ እስመ ፈለሲ ኮንከ ውስተ ምድሮሙ

Deut 23:07 ወደቂቀ ለእመ ተወልድ ሎሙ በሣልስተ ተውልድ ይበውእ ቤት እግዚአ ብሔር

Deut 23:08 ወለእመ ወገእከ ተፅብኦሙ ለፀርከ ተዓቀብ እምኹሉ ቃለ እኩይ

Deut 23:09 ወለእመቦ ብእሲ እምውስቴተክሙ ዝኢኮነ ንጹሐ እምሰንበቱ በሌሊት ለይባእ አፍአ እምተዓይንተ ወኢይባእ ውስተ ተዓይንተ

Deut 23:10 ፍና ሰርክ ይትኅፀብ ሥጋሁ በማይ ዐርበ ፀሐይ ወይበውእ ውስተ ተዕይንተ

Deut 23:11 ወአሐዱ መካን ረሲ ለከ አፍአ እምተዕይንተ ኅበ ትወፅእ ህየ አፍአ

Deut 23:12 ወዕፀ ንሣእ ለከ ውስቴ ቅናተከ ወሶቤ ነበርከ ቀሰፈ ተከሪ ወተንሢእከ ትደፍን ኅፍረቲከ

Deut 23:13 እስመ እግዚአ ብሔር እምላክከ ያንሶሱ ውስተ ተዓይንቲከ ከመ ያድኅንከ ወያግብኦሙ ለፀርከ ውስተ እዴከ በቅድመ ገጽከ ወትኩን ቅድስተ ተዓይንቲከ ከመ ኢያስተሪኢ በውስቴቲከ ሠይኢ ኅፍረተ ወይትሜየጥ እምኔከ ወይኅድገከ



Deut 23:14 ወኢታግብእ ለግብር ኅብ እግዚኡ እምድኅረ ተመይጦ ኅቤከ ይንበር ምስሌከ ኅቤ አደሞ ወኢትሣቂዮ

Deut 23:15 ወኢትኩን እምውስቱቲክሙ ዘማ እመውስተ አዋልደ እስራኤል ወአልቦ ዘይዜሙ እመውስተ ደቂቀ እስራኤል አልቦ ዘያገብእ ግብር እምውስተ አዋልደ እስራኤል

Deut 23:16 ወአልቦ ዘያገብእ ጽብሐተ እምውስተ ደቂቀ እስራኤል ኢታብእ ደናስ ዘማ ወኢቤዘ ከልብ ውስተ ቤተ እግዚአ ብሔር አምላክከ በበይነ ኩሎ ብፅዓት

Deut 23:17 እስመ ርኩሳን እሙንቱ በኅቤ እግዚአ ብሔር አምላክከ ክልኤሆሙ

Deut 23:18 ወኢትትረደይ እምኅቤ ቢጽከ ኢርዴ ወርቅ ወኢርዴ እክል ወኢርዴ ኩሎ ዘኮነ ትካዙ ዘተለቃሐከ እምኅቤ ነኪር ትትርደይ ወእምቢፀከሰ

Deut 23:19 ኢትትረደይ ከመ ይባርክ እግዚአ ብሔር አምላክከ ለዕሌ ምድር በኩሎ ግብርክ እንተ ውስቱታ ትበውእ ህየ ከመ ትትዋረስ

Deut 23:20 ለእመ በፀዕከ ብፅዓተ ለእግዚአ ብሔር ኢታጉንዲ ገቢርቶ እስመ ተኃሥሦ ይትኃሠሠከ እግዚአ ብሔር አምላክከ እምኔከ ወይከውን ኅጢአተ ላዕሌከ

Deut 23:21 ወለእመሰ ኢፈቀድከ ትብፀዕ አልብከ ኅጢአተ ዳእሙ እምድኅሪ ወፅእ እምአፉከ ተዓቀብ ወግበር በከመ በፀዕከ ተህብ ለእግዚአ ብሔር ዘነበብከ በአፉከ ከማሁ ግበር

Deut 23:22 ወለእመ ቦእከ ውስተ ገራህተ ካልእከ ትምሑ ሠዊተ በእደዊከ ወመዕጽድ ኢታበውእ ውስተ ገራህተ ከልእከ

Deut 23:23 ወለእመ ቦእከ ውስተ ዐጸደ ወይኑ ለካልእከ ብላዕ እስካለ እስከ ትጸግብ ነፍስከ ወውስተ ሙዳይ ባሕቱ ኢትወዲ

Deut 24:01 ወለእመሰ ዘነሥክ ብእሲተ ወነበረ ምስሌሃ ወእምዝ ለእመ ኢረከበት ሞገሰ ቅድሜሁ እስመ ረከበ ኅፍረተ ዘኮነ ላዕሌሃ ይጽሕፍ ላቲ መጽሐፈ ኅድጋቲሃ ወይሜጥዋ ውስተ እደዊሃ ወያወፅእ እምቤቱ

Deut 24:02 ውኖረት ወአውሰበት ካልእ ብእሴ ውእምዝ ጸልክ ውእቱኒ ብእሴ ደኅሪ ወጸሐፈ ላቲ መጽሐፈ ኅድገቲሃ ወመጠዋ ውስተ እደዊሃ ወያወፅእ እምቤቱ ወለእመኒ ሞተ ውእቱ ብእሴ ደኃሪ ዘነሥክ ሎቱ ትኩኖ ብእሴቶ

Deut 24:03 ኢይከውኖ ለዝክቱ ብእሴ ቀዳማዊ ዘአውፀክ ከመ ይግባእ ለዕሌሃ ወይነሥክ ሎቱ ትኩኖ ብእሴተ እመድኅረ ረኩሰት እስመ ርኩስ ውእቱ ዝንቱ በኅቤ እግዚአ ብሔር አምላክከ

Deut 24:04 ወኢታርኩሱ ምድር እንተ ይህበክሙ እግዚአ ብሔር አምላክክሙ መክፈልቲክሙ



Deut 24:05 ወለእመቦ ዘነሥኣ ብእሲተ ግብተ ኢይፃእ ፀብእ ወአልቦ ምንተኒ ዘያቀትውዎ ድኑን ውእቱ ወይነብር ውስተ ቤቱ አሐተ ዓመት ከመ ይትፈሣሕ ምስለ ብእሲቱ እንተ አውሰበ

Deut 24:06 ወኢተአጎዝ መሕረጽ ወኢመድሄ ማሕረጽ እስመ መብዕለ ነፍሰ ውእቱ ወኢተአጎዝዎ

Deut 24:07 ወለእመቦ ዘተርክበ ብእሲ ዘሰረቀ ነፍሰ እምውስተ አጋዊሁ ወእምደቂቀ እስራኤል ወተአገሎ ወሢጦ ለይቅተልዎ ለውእቱ ሰራቂ ወታሴስሉ እኩየ እምኔክመ-

Deut 24:08 ወዑቅ ርእሰከ በእንተ ተእምረተ ለምጽ ተዓቀብ ጥቀ ከመ ትግበር ኩሉ ሕገ ዘይቤሉክመ ካህናት ወሌዋዊያን በከመ አዘዝኩክመ ትዕቀቡ ዘትገብሩ

Deut 24:09 ተዘከር ኩሎ ዘገብረ እግዚአ ብሔር አምላክከ ለዕለ ማሪያም በፍኖት ወፂእክመ እምግብጽ

Deut 24:10 ወለእመቦ ዘይፈዲየከ ካልእከ ዕዳ ዘኮነ ኢታበውእ ውስተ ቤቱ ከመ ተትአሐዝ አሕዝከ አፍአ ታቀውም

Deut 24:11 ወብእሲ ዕደከ ዘክቱ ዘይፈድየከ ለዕሌሁ ያወፅእ አጎዝከ አፍአ ኀቤከ

Deut 24:12 ወለእመቦ ብእሲ ነዳይ ውእቱ ኢታቢታ አጎዝ ኀቤከ

Deut 24:13 ታገብእ ሎቱ አጎዞ ዐርበ ፀሐይ ወይበይት መልበሱ ወትትባረክ ወይከውነከ ምጽዋት ቅድመ እግዚአ ብሔር አምላክከ

Deut 24:14 ኢተዐምዎ ዐስቦ ላዐሳብከ ለነዳይ ዘጎጡእ ውእቱ እምውስተ አጎዊከ አው እምውስተ ግድራን እለ ውስተ ሀገርከ

Deut 24:15 እንተ ጸብሐት ትሁብ ዐሠብ ወኢታዕርብ ፀሐይ ለዕሌሁ እስመ ነዳይ ውእቱ ተስፋሁ ውኢይግዐር ላዕሌከ ኀቤ እግዚአ ብሔር ኢይኩን(ከ) ኀጢአት

Deut 24:16 ኢይመውቱ ወላድያን በእንተ ውሉዶሙ ወኢይመውቱ ውሉደ በእንተ አበዊሆሙ አሐዱ አሐዱ በጊጋዩ ይመውት

Deut 24:17 ወኢትሜጥ ፍትሐ ግድር ወዘእሻለ ማውታ ወዘእቤር

Deut 24:18 ወተዘከር ከመ ገብር አንተ በምድረ ግብጽ ወቤዘወከ እግዚአ ብሔር አምላክከ እምህየ ወበእንተዝ እኤዝዘከ አነ ትግበር ዘንተ ነገር

Deut 24:19 ወለእመ አኬድከ እክለ ገራህተከ ወርዐይከ አሐተ ክልስስተ ውስተ ገራህትከ ኢተግባእ ከመ ትንሣእ ለግድር ወለእሻለ ማውተ ወለእቤር ይኩን ከመ ይባርከ እግዚአ ብሔር አምላክከ በኩሉ ተግባረ እደዊከ



Deut 24:20 ወለእመኒ ቀሠምከ ወይንከ ኢትድገም ተመይጥ ድኅሬከ ከመ ተስተናጽሕ ቀሢም ለግድር ወለእሹለ ማውታ ወለእቤር ይኹን ወተዘከር ከመ ገብር አንተ በምድረ ግብጽ ወበእንተዝ እኤዝዘከ አነ ከመ ትግበር ዘንተ ነግር

Deut 24:21 ወለእመኒ ቀሠምከ ዘይተከ ኢትድገም ተመይጦ ድኅሬከ ከመ ተስተናጽሕ ቀሢም ለግድር ወለእሹለ ማውታ ወለእቤር ይኹን

Deut 24:22 ወተዘከር(ር) ከመ ገብር እንተ በምድረ ግብጽ

Deut 24:23 ወበእንተዝ እኤዝዘከ አነ ከመ ትግበር ዘንተ ነግር

Deut 25:01 ወለእመ ኮነ ተስናነ መእከለ ሰብእ ወመጽኡ ውስተ ዐውድ ወተሰነኑ ወአርትዑ ለዘ ይረትዕ ወአአሰው ለዘይኤሱ

Deut 25:02 ወለእመ ኮነ ለተቀሥፎ ዝክቱ ዘይፀውግ ያንብርዎ ቅድመ ዐውድ ወይቅሥፍዎ በቅድሚሆሙ በአምጣነ አበሳሁ

Deut 25:03 አርብዓ ይቀሥፍዎ በኖልቀኡ ወኢያብዝኹ እምኔሁ ወለእመ አብዝኹ ቀሢፎቶ እምዝንቱ አስተሐፈርከ አኅከ በቅድሚከ

Deut 25:04 ወኢትፌጽም አፉሁ ለላህም እንዘ ታከይዶ እክል

Deut 25:05 ወለእመቦ እኃው እለ ይነብሩ ኅቡር ብእሲ ምስለ እኑሁ ወሞተ አሐዱ እምኔሆሙ ወአልቦ ውሉደ ወኢይተውሰብ ብእሲቱ ለውእቱ ዘሞተ ነኪር ብእሴ ዘኢኮነ ቅሩብ እኑሁ ለምታ ለያውሰብ ወውእቱ ይበውእ ኅቤሃ ወሎቱ ትኩኖ ብእሲቶ ወይንበር ምስኤሃ

Deut 25:06 ወሕፃን ዘተወልደ ይኹን ለዘሞታ ወይሰመይ በስሙ ወኢይደምሰስ ስሙ እምእስራኤል

Deut 25:07 ወለእመ ኢፈቀደ ውእቱ ብእሲ ያውስበ ለብእሲተ እኑሁ ወተዐርግ ይእቲ ብእሲተ ኅቤ ሊቃናተ በኅቤ አንቀጽ ወትብል ኢፈቀደ እኑሁ ለምትየ ያቅም ሰመ እኑሁ በውስተ እስራኤል

Deut 25:08 ወይጼውዕዎ ሊቃናተ ሀገሩ ለውእቱ እኑሁ ለዘ ሞተ ወይበልዎ ኢትፈቅድኑ ታቅም ዘርዕ ለእኑከ ውስተ እስራኤል ወይብል ቀዊሞ ኢያፈ(ቅ)ድ [አ]ውስባ

Deut 25:09 ወትመጽእ ይእቲ ብእሲተ ቅድመ እግዚአ ብሔር ወቅድመ ሊቃናተ ይእቲ ሃገር ወትፈተሕ አሣእኖ እምውስተ አሐተ እግሩ ወትተፍእ ውስተ ገጹ ወትብል ከመዝ ይገብር(ዎ) ለብእሲ ዘኢይሐንጽ ቤተ እኑሁ

Deut 25:10 ወይሰመይ ስሙ በውስተ እስራኤል ቤተ ፍቱሐ እሣእን



Deut 25:11 ወለእመ ተበአሱ ክልኤቱ ዕደው ኅቡር ብእሲ ምስለ ካልኡ ወመፅአት ብእሲቱ ለአሐዱ እምክልኤሆሙ ከመ ታኅድሳ ለምታ እምእደ ዘባጢሁ ወአልዐለት አዴሃ ወአኅዞት በክልኤሆን አሰካቲሁ ለይምተሩ እደዊሃ ወኢይምሐክ ዐይንክ

Deut 25:12 ወኢታንብር ለክ መዳለወ ንኡስ ወዐቢይ ወኢትግበር ለክ ውስተ ቤትክ መስፈርተ ዐቢይ ወመስፈርተ ንኡስ

Deut 25:13 ወመዳሉከኒ ርቱዕ ወጽዱቅ ይኸንክ ከመ ትብዛኅ መዋዕሊክ በውስተ ምድር እንተ ይሁበክ እግዚአ ብሔር አምላክክ መክፈልቲክ

Deut 25:14 እስመ ርኩስ ውእቱ በኅቤ እግዚአ ብሔር አምላክክ ኩሉ ዘገብሮ ለዝንቱ ወኩሉ ዘይገብር ዐመፃ

Deut 25:15 ወትዘከር ኩሉ ዘገብረ ለዕሌክ ዐማሌቅ በፍኖተ አሜ ወፃእክ እምድረ ግብጽ

Deut 25:16 አፎ ተቃወመክ በፍኖት ወአመተረክ ግዓዝክ እለ ይጸምው በድኅሬክ

Deut 25:17 ወአንተስ ርኅብክ ወለኅጥክ ወኢፈራህካ(ሁ) ለእግዚአ ብሔር

Deut 25:18 ወእመ የዐርፈክ እግዚአ ብሔር አምላክክ አምኩሉ ፀርክ እለ አውድክ ውስተ ምድር እንተ ይሁበክ እግዚአ ብሔር አምላክክ ከመ ትትዋረስ መክፈልተክ ወትድመስሶ ለዐማሌቅ እምታሕተ ሰማይ ወኢትርስዖ

Deut 26:01 ወለእመ ቦእክ ውስተ ምድር እንተ ይሁበክ እግዚአ ብሔር አምላክክ ትትዋረስ መክፈልተክ ወነበርክ ውስቴታ ውትነሥእ እምፍሬ ምድርክ እንተ ወሀበክ እግዚአ ብሔር አምላክክ

Deut 26:02 ወትወዲ ውስተ ሙዳይ ቀርጠሎን ወተሐውር ውስተ መካን ዘኅረየ እግዚአ ብሔር አምላክክ ከመ ይሰመይ ስሙ በህየ

Deut 26:03 ወትበውእ ኅቤ ካህን ዘሀሎ በውእቱ መዋዕል ወትብሎ አይድዕ ዮም ለእግዚአ ብሔር አምላኪየ እስመ በጻሕኩ ውስተ ምድር እንተ መሐለ እግዚአ ብሔር ለአበዊነ ከመ ይህበነሃ

Deut 26:04 ወይነሥእ ካህን ለውእቱ ሙዳይ ቀርጠሎን እመውስተ እደዊክ ወያነብሮ ቅድመ ምሥዋዑ ለእግዚአ ብሔር አምላክክ

Deut 26:05 ወተብል ቅድመ እግዚአ ብሔር አምላክክ አቡየ ወፅእ እምድረ ፋርስ ወእምሶርያ ወወረደ ውስተ ምድረ ግብጽ ወነበረ ህየ እንዘ ወሑዳን እሙንቱ ጥልቆሙ ወኮኑ በህየ ሕዝበ ዐቢይ ወመልኡ ወዐቢይ በዝኑ

Deut 26:06 ወሣቀዩነ ግብጽ ወአሕመሙነ ወአገበሩነ ዕፁብ ግብር

Deut 26:07 ወጸራሕነ ኅበ እግዚአ ብሔር አምላክ አበዊነ ወሰምዐ እግዚአ ብሔር ቃለተነ ወርኢየ ሕማምነ ወሥራሕነ ወሥቃይነ ርእየ እግዚአ ብሔር



Deut 26:08 ወአውፅአነ እግዚአብሔር ሌሊሁ እምግብጽ በእድገት ጽንዕት ወበመዝራዕተ ለዑል ወዐቢየ ግርማ ዘታአምር ወመድምም

Deut 26:09 ወአበአነ ውስተ ዝንቱ መካን ወወሀበነሃ ለዛቲ ምድር ምድር እንተ ትውሕዝ መዐር ወሐሊብ

Deut 26:10 ወይእዚሂ ናሁ አምጸእኩ ቀዳሜ እክል ምድርየ እንተ ወሀበኒ እግዚአብሔር ምድር እንተ ትውሕዝ ሐሊብ ወመዐረ ወትሰግድ ቅድመ እግዚአብሔር አምላክክ

Deut 26:11 ወትትፍሣሕ በኩሉ በረከት ዘወሀበክ እግዚአብሔር አምላክክ አንተ ወቤተክ ወሌዊኒ ወግደር ዘኅቤክ

Deut 26:12 ወእምከመ ፈጸምክ ዐሥሮተ ዕሠራተ ኩሉ እክለ ምድርክ በሠላሳ ዓም እምዝ ዝእመ ዳግም ትዔሥር ትህቦ ለሌዋዊ ወለግደር ወለእጼለ ማውታ ወለእቤር ወይበልዕዎ በሀገርክ ወይጸግቡ

Deut 26:13 ወትብል በቅድመ እግዚአብሔር አምላክክ አንጻሕኩ ዘይትቈደስ ለክ እምቤትየ ወወሀብኩዎ ለሌዋዊ ወለግደር ወለእጼለ ማውታ ወለእቤር በከመ ኩሉ ትእዛዝክ ዘአዘዝ(ከ)ኒ ኢተዐዶኩ ትእዛዝክ ወኢረሣዕኩ

Deut 26:14 ወበሕማምየኒ ኢበለዕኩ እምኔሁ ወኢሥዕኩ እምውስቴቱ ለርኩስ ወኢወደይኩ ውስተ በድን እምኔሁ ሰማዕኩ ቃለ እግዚአብሔር አምላክየ ሰማዕኩ በከመ አዘዘኒ

Deut 26:15 ወነጽር እምቤተ መቅደስክ እምሰማይ ወባርክ ሕዝብክ እስራኤል ወምድሩኒ እንተ ወሀብካሆሙ እንተ መሐልክ ለአበዊነ ከመ ተሀበነ ምድር እንተ ትውሕዝ ሐሊብ ወመዐር

Deut 26:16 በዛቲ ዕለት እግዚአብሔር አምላክክ አዘዘክ ከመ ትግበር ኩሎ ዘንተ ኩነኔ ወትዕቀብ ፍትሐ ወትግበሮ እምኩሉ ለብክ ወበኩሉ ነፍስክ ታምልኮ ለእግዚአብሔር አምላክክ ወትሖር በፍናዊሁ ወተዕቀብ ፍትሐ ወኩነኔሁ ወትስማዕ ቃሉ

Deut 26:17 እስመ እግዚአብሔር ኅረየክ ዮም ትኩኖ ሕዝብ ለርእሱ በከመ ይቤ ከመ ትዕቀቡ ኩሎ ትእዛዙ ወትኩን ምልዕልተ ኩሉ አሕዛብ

Deut 26:18 ወገብረ ለክ ስመ ዐቢይ ወምክሐ ወክብር ከመ ትኩን ሕዝብ ቅዱስ ለእግዚአብሔር አምላክክ በከመ ይቤ

Deut 27:01 ወአዘዘሙ ሙሴ ለአእሩግ እስራኤል ወይቤሎሙ ዕቀቡ ከመ ትግበሩ ኩሎ ዘንተ ተእዛዘ ኩሎ ዘአነ እኤዝዘክ ዮም

Deut 27:02 ወእመሰ ተዐድውዎ ለዮርዳንስ ውስተ ምድር እንተ ይሁበክሙ እግዚአብሔር አምላክክሙ ወታቀውም ለክ እብን ዐበይተ ወትመርኅ መሬተ ጸዕዳ



Deut 27:03 ወትጽሕፍ ውስተ ውእቶን እቦን ኩሎ ነገሮ ለዝንቱ ሕግ ዐዲውክሙ ዮርዳንስ ሶብ ቦእክሙ ውስተ ይእቲ ምድር እንተ ይህበክሙ እግዚአብሔር አምላክክሙ ለአበዊክሙ ከመ የሀብከ ምድር እንተ ትውሕዝ ሐሊብ ወመዐር በከመ ይቤለክ እግዚአብሔር አምላክሙ ለአበዊክ

Deut 27:04 ወሶቤ ዐዲውክሙ ዮርዳንስ ታቀውምዎን ለእለንቱ አባን እለ እኤዝዘክሙ ዮም በእንቲአሆን ውስቲ ደብር ጌበል ወትመርግዎን መሬተ ጸዕዳ

Deut 27:05 ወትነድቅ ብህየ ምሥዋዕ ለእግዚአብሔር አምላክክ በእብን ወኢይገስስዎ [ኀጺን] እንበይነ ዘኢኮነ ውቁር ቦንቱ ታነድቅ ምሥዋዕ ለእግዚአብሔር አምላክክ

Deut 27:06 ትሠውዕ ላዕሌሆን መሥዋዕተ መድኃኒት ወብላዕ ወጽገብ ብህየ ወተፈሣሕ በቅድመ እግዚአብሔር አምላክክ

Deut 27:07 ወጸሐፍ ውስተ ውእቶን እብን ኩሎ ዝንተ ሕግ ጥዩቀ ጥቀ

Deut 27:08 ወይቤልዎሙ ሙሴ ወካህናተ (ለ)ሌዋዊያ(ን) ለኩሎ እስራኤል አርምም ወስማዕ እስራኤል በዛቲ ዕለት ኮንከ ሕዝብ ለእግዚአብሔር አምላክክ ወስማዕ ቃለ እግዚአብሔር አምላክክ ወግበር ኩሎ ትእዛዞ ወኩነኒሁ ወኩሎ ዘኣነ እኤዝዘክ ዮም

Deut 27:09 ወአዘዞሙ ሙሴ ለሕዝብ በይእቲ ዕለት ወይቤሎሙ እሉ እሙንቱ እለ ይቀውሙ ወይባርክዎ ለሕዝብ በድብድ ገሪዝን ዐዲውክሙ ዮርዳንስ ስምዎን ወሌዊ ወይሁዳ ወይሣክር ወዮሴፍ ወብንያም

Deut 27:10 ወእሉ እለ ይቀውሙ ለረጊም በደብረ ጌባል ሩቤል ወጋድ ወአሴር ወዛቡሎን ወዳን ወንፍታሌም

Deut 27:11 ወያወሥኡ ሌሊሆሙ [ሌ]ዋዊያን ወይብልዎሙ ለኩሎ እስራኤል በቃለ ዐቢይ

Deut 27:12 ርጉም ለይኩን ብእሲ ዘይገብር ግልፎ ወስብኮ ዘርኩስ በኀቤ እግዚአብሔር ግብረ እደ ኬንያ ወይሠይም ወይሐብእ ወያወሥእ ኩሎ ሕዝብ ወይብል አሜን አሜን

Deut 27:13 ወርጉም ለይኩን ዘየስተአኪ አቡሁ ወእም ወይብል ኩሎ ሕዝብ አሜን አሜን

Deut 27:14 ርጉም ለይኩን ዘይሰርቅ ደውለ ቢጹ ወይብል ኩሎ ሕዝብ አሜን አሜን

Deut 27:15 ርጉም ለይኩን ዘያስሕቶ ፍኖተ ለዕውር ወይብል ኩሎ ሕዝብ አሜን አሜን

Deut 27:16 ርጉም ለይኩን ዘይገምጽ ፍትሐ ግዩር ወዘእጌለ ማውታ ወዘእቤር ወይብል ኩሎ ሕዝብ አሜን አሜን

Deut 27:17 ርጉም ለይኩን ዘይሰክብ ምስለ ብእሲተ አቡሁ እስመ ከሠተ ምክሠተ አቡሁ ወይብል ኩሎ ሕዝብ አሜን አሜን



Deut 27:18 ርጉም ለይኩን ዘሰከበ ምስለ ኩሉ እንስሳ ወይብል ኩሉ ሕዝብ አሜን አሜን

Deut 27:19 ርጉም ለይኩን ዘይሰከብ ምስለ እኅቱ ወእመኒ እንተ እምአቡሁ ወእመኒ እንተ እመ እሙ ወይብል ኩሉ ሕዝብ አሜን አሜን

Deut 27:20 vacat

Deut 27:21 ርጉም ለይኩን ዘይዘብጥ ካልኡ በጉሕሉት ወይብል ኩሉ ሕዝብ አሜን አሜን

Deut 27:22 ርጉም ለይኩን ዘይነሥእ ሐልያን ከመ ይቀተል ነፍስ ደመ ንጹሐ ወይብል ኩሉ ሕዝብ አሜን አሜን

Deut 27:23 ርጉም ለይኩን ኩሉ ብእሲ ዘኢይቀውም ይግበር ኩሉ ቃለ ዘውስተዝ ሕግ ወይብል ኩሉ ሕዝብ አሜን አሜን

Deut 28:01 ወለእመ ሰሚዐ ሰማዕክሙ ቃለ እግዚአ ብሔር አምላክክሙ ወዐቀብክሙ ከመ ትግበሩ ኩሉ ትእዛዘ ዘእነ እኤዝዘክሙ ዮም ወይሬሲየክ እግዚአ ብሔር መልዕልተ ኩሉ አሕዛብ ምድር

Deut 28:02 ወይበጽሐክ ኩሉዝ በረከት ወይመጽእ ለዕሌክ ወይረክበክ ለእመ ሰማዕክ ቃለ እግዚአ ብሔር አምላክክ

Deut 28:03 ቡሩክ ትከውን በሐቅል ወቡሩክ ትከውን በሀገር

Deut 28:04 ቡሩክ ይከውን ፍሬ ከርሥክ ወቡሩክ ይከውን እክለ ምድርክ ወአዕጻ(ዳ)ተ ላህምክ ወመራዕየ አባግዒክ

Deut 28:05 ቡሩክ ይከውን መዛግበቲክ ወተረፋቲክ

Deut 28:06 ቡሩክ ትከውን በበአተክ ወቡሩክ ትከውን በፅአተክ

Deut 28:07 ወያገብአሙ እግዚአ ብሔር አምላክክ ለፀርክ ለእለ ይትቃወሙክ ከመ ይትቀጥቀጡ በታኅተ እገሪክ በኦሐቲ ፍኖተ ወይወፅኡ ይተቀበሉክ ወበሰብዑ ፍናዎ ይነጥዑ እምቅድመ ገጽክ

Deut 28:08 ወይፌኑ እግዚአ ብሔር በረከቶ ውስተ አብያቲክ ውስተ ኩሉ ዘወደይክ እዴክ በዲበ ምድር እንተ ወሀበክ እግዚአ ብሔር አምላክክ

Deut 28:09 ወያቀውመክ እግዚአ ብሔር ሎቱ ሕዝበ ቅዱስ በከመ መሐለ ለአበዊክ ለእመ ሰማዕክ ቃለ {...} እግዚአ ብሔር እምላክክ ወሖርክ በኩሉ ፍናዊሁ

Deut 28:10 ወይርኢዩክ ኩሉ አሕዛብ ምድር ከመ ስሙ ለእግዚአ ብሔር ተሰምየ ላዕሌክ ወይፈርሁክ

Deut 28:11 ወያስተበዝኅክ እግዚአ ብሔር አምላክክ ውስተ ሠናይተ በውሉደ ከርሠክ ወበእክለ ምድርክ



Deut 28:12 ወበተዋልዶ እንስሳከ ወበውስተ ምድር እንተ መሐለ እግዚአብሔር ለአበዊከ ከመ ይህብከ ከመ መዋዕለ ሰማይ ዲበ ምድር

Deut 28:13 ወይፍታኅ ለከ እግዚአብሔር መዝግበ በረከተ ሰማይ ከመ ይህብከ ዝናመ ለምድርከ በመዋዕሊሁ ከመ ይባርክ ለከ ኩሉ ተግባረ እደዊከ ወትሌቅሕ አንተ ለብዙኃን አሕዛብ ወአንተሰ ኢትትሌቃሕ ወትኳንን አንተ ለብዙኅ አሕዛብ ወለከሰ ኢይኳንኑከ

Deut 28:14 ወይሰይመከ እግዚአብሔር ውስተ ርእሰ ወአኮ ውስተ ዘነብ ወተከውን ምልዕልተ ወኢትከውን መትሐተ ወለእመ ሰመዕክሙ ቃለ እግዚአብሔር አምላክክሙ ወትእዛዝ ኩሉ ዘአነ እኤዘ(ዘ)ክሙ ዮም ከመ ትዕቀቡ ወትግበሩ

Deut 28:15 ወኢተትገሐስ እምኩሉ ቃል ዘአነ እኤዝዘከ ዮም ወኢለየማን ወኢለጸጋም ከመ ኢትሐሩ ድኅረ አማልክተ ባዕድ ታምልክዎሙ

Deut 28:16 ወለእመ ኢሰማዕክሙ ቃለ እግዚአብሔር አምላክክሙ ከመ ትዕቀቡ ኩሉ ትእዛዞ ወኩሉ ዘአነ እኤዝዘክሙ ዮም ወይመጽእ ለዕሌከ ኩሉ ዝንቱ መርገም ወይረክበከ

Deut 28:17 ወትከውን ርጉመ አንተ በሐቅል ወበሀገር

Deut 28:18 ወይከውን ርጉመ መዝግብከ ወተረፋቲከ

Deut 28:19 ወርጉም ውሉድከ ወእክለ ምድርከ ወአዕጻደ አልህምትከ ወመራዕየ አባግዒከ

Deut 28:20 ወርጉም አንተ በበአትከ ወበፀአተከ ርጉም ትከውን

Deut 28:21 ወይፌኑ ለዕሌከ እግዚአብሔር ንዴተ ወርኃበ ወብድብድ ወይጠፍእ [ኩሉ] ዘወደይከ እዴኮ ውስቴቱ ወይሴርወከ እስከ ይደመስስከ ፍጡነ በእንተ እኩይ ምግባሪከ እስመ ሐደገኒ

Deut 28:22 ወያትሉ እግዚአብሔር ሞተ ለዕሌከ እስከ ያጠፍአከ [እምነ] ምድር እንተ ውስቴታ [ትበው]እ ህየ ከመ ትትዋረስ

Deut 28:23 ወይቀሥፈከ እግዚአብሔር በደዌ ሲሐ ወበፍጽንተ ወበአዝፋር ወበፍርሀተ ወበድንጋዒ ወበዐበር ወበኅግእ ወይሰዱከ እስከ ያጠፍኡከ

Deut 28:24 ወትከውኒከ ሰማይ በምልዕልተ ርእስከ ብርተ ወምድር በታሕቴከ ኀዒን

Deut 28:25 ወይሬሲዮ እግዚአብሔር ለዝናመ ምድርከ ቆባር ወመሬት ይወርድ እምሰማይ ላዕሌከ እስኪ ይድፍነከ ወእስከ ያጠፍአከ



Deut 28:26 ወይገብረከ እግዚአብሔር ከመ ትትቀተል በቅድመ ፀርከ በአሐቲ፤ ፍኖተ ትወፅእ ኅቤሆሙ ወበሳብዑ ፍነው ትነጥዕ እምቅድመ ገጸሙ ወትከውን ዘርው ውስተ ኩሉ መንግሥታት ምድር

Deut 28:27 ወይከውን አብድንቲክሙ መብልዕ ለአዕዋፈ ሰማይ ወኢትረክቡ ዘይቀብረክሙ

Deut 28:28 ወይቀሥፍከ እግዚአብሔር (በ)መቀሠፍተ ግብጽ በዐበቅ እኩይ ውስተ ነፍሳቲከ ወበኅክክ ዘአልቦ ፈውሰ

Deut 28:29 ይቀስፈከ እግዚአብሔር በድቀተ ወበዐዊር ወበድንጋዒ ልብ

Deut 28:30 ወትገብ(እ) ታመርስስ መዐልተ ከመ ያመርስስ ዕውር በውስቴ ጽልመተ ወኢትረክብ ፍኖተ ወትትገፋዕ ወትትብርበር በኩሉ መዋዕሊከ ወኢትረክብ ዘይረድኦከ

Deut 28:31 ወታወስብ ብእሲተ ወይሀይዱከሃ ካልአ ብእሲ ወትነድቅ ቤተ ወኢትነብር ውስቴቱ ወትተክል ወይን ወኢትቀስሞ

Deut 28:32 ወይጠብሑ ለህምከ በቅድሜከ ወኢትበልዕ እምኔሁ ወየሃይዱከ አድግከ ወኢያገብኡ ለከ ወይገብእ አባግሂከ ለአግብርተ ወለፀርከ ወኢትረክብ ዘይረድኦከ

Deut 28:33 ወይገብኡ ደቂቀከ ወአዋሊዲከ ለካልአ ሕዝብ ትሬኢ በአዕይንቲከ እንዘ ይኩርዕዎሙ ወአልቦ ዘተክል ገቢር

Deut 28:34 ይበልዕ አሕዛብ ዘኢታአምር እክለ ምድርከ ወጸማከ ወትከውን ጽዑር ወሥቁየ በኩሉ መዋዕለ

Deut 28:35 ወትከውን ምኑፀ በምርአየ አዕይንቲከ ወኢተሬኢ

Deut 28:36 ወይቀሥፈከ እግዚአብሔር በደዌ እኩይ ውስተ ብርከክ ወውስተ አዕማደ እገሪከ ወውስተ ቀሥዲከ በዘ ኢትክል ሐይወ እምሰኩና እገሪከ ወእስከ ርእስከ

Deut 28:37 ወይወስድከ እግዚአብሔር ኪያከ ወመላእክቲከ እለ ሢምከ ለከ ውስተ ሕዝብ ዐቢይ ዘኢታአምር አንተ ወኢአበዊከ ወታመልክ ብህየ በዕድ አማልክተ ዕፀው ወእብን

Deut 28:38 ወትከውን በህየ ድንጉፀ ወትከውን አምሳለ ወነገረ ለአሕዛብ በኩሉ እለ ውስቴቶሙ ትበውእ ወእለ ኅቤሆሙ ይወስደከ እግዚአብሔር ህየ

Deut 28:39 ወታወፅእ ብዙኅ ዘርእ ውስተ ገራህቲከ ወውሑድ ታበውእ እስመ አንበጣ በልዎ

Deut 28:40 ወትትክል ዐጸደ ወይን ወትትጌበሮ ወኢትሰቲ ወይኖ ወኢትትፌሣሕ እምኔሁ እስመ ዕዒ በልዎ

Deut 28:41 ታጠሪ ዕፅታተ ዘይት ውስተ ኩሉ ደውልከ ወኢትትቀባእ ቅብአ እምኔሁ እመ ተነግፈ ፍሬሁ



Deut 28:42 ትወልድ ደቂቀ ወአዋልደ ወኢያታርፍዎሙ ለከ እስመ ይነሥእወሙ ወይዪውዎሙ

Deut 28:43 ወኩሎ እክል ምድርከ ወኩሎ ተክላ ዕፅከ አናኳዕ ያጠፍእ ለከ

Deut 28:44 ወፈላሲ ዘሀሎ ኀቤከ ይዐርግ ምልዕልቲከ ወለዕሌከ ወአንተሰ መታኅቶ

Deut 28:45 ወውእቱ ይሌቀሐከ ወአንተሰ ኢተሌቅሐ ውእቱ ይከውነከ ርእሰ ወአንተሰ ትከውኖ ዘነብ

Deut 28:46 ወይመጽእ ለዕሌከ ኩሎዝ መርገም ወይዴግነከ ወይረከብከ እስከ ያጠፍኦከ ወእስከ ይድምስሰከ (እስመ) ኢሰማዕከ ቃለ እግዚአ ብሔር አምላክከ ከመ ትዕቀብ ትእዛዞ (ወኩናኔሁ ኩሎ ዘአዘዘከ)

Deut 28:47 ወይከውን ተአምር ወመድምም ለዕሌከ ወለዕሌ ዘርእከ እስከ ለዓለም እስመ ኢያምለካሁ ለእግዚአ ብሔር አምላክከ በተፍሥሕተ ወበሠናየ ልብ

Deut 28:48 ወበብዙኅ ኩሎ ወትትቀነይ ለጸላእቲከ እለ ይፌኑ እግዚአ ብሔር ለዕሌከ በርኃብ ወበ ጽምእ ወዕ(ር)ቃን ወበኀጢአ ኩሎ ወይወዲ ለከ ጋገ ዘኅዪን ውስተ ክሳድክ እስከ ያጠፍኦከ

Deut 28:49 ወይመጽእ እግዚአ ብሔር ለዕሌከ ሕዝብ እምርሑቀ አምአጽናፈ ምድር ከመ ርደታ ንስር ሕዝብ እለ ኢትሰምዕ ነገሮሙ

Deut 28:50 ሕዝብ ግሩም ገጸ እለ ኢያከበሩ ገጸ ልሂቀ ወኢያስትምሕሩ ንእሰ

Deut 28:51 ወያጠፍኡ እርሳ መራዕይከ ወእክለ ምድር(ከ) እስከ ኢያተርፍ ለከ ኢእክል ወኢወይን ወኢቅብእ ወኢአዕጻዳተ ላህምከ ወኢመራዕየ አባግዒከ እስከ ያጠፍእከ

Deut 28:52 ወይድምስሰከ እምውስተ ኩሎ አህጉሪከ እስከ ያወድቅ አረፋቲከ ወበውስቴ አጽዋኒከኒ ዘቦቱ ትትኤመን ዘውስተ ኩሎ በሐውርትከ ወይሣቅዩከ በውስተ ኩሎ አህጉሪከ ዘወሀበከ እግዚአ ብሔር አምላክከ

Deut 28:53 ወብለዕ ውሉደ ከርሥከ ወሥጋ ደቂቀከ ወአዋሊዱከ ዘወሀበከ በምንዳቤከ ወበሥቃይከ ዘሣቀየከ ፀለኢከ በውስተ አህጉሪከ

Deut 28:54 ረኅጽከሂ ወለምለምከሂ ትድነጹ ዐይነ ለእኅሁ ወለብእሲቱ እንተ ውስተ ሕፅኑ ወዘተረፈ ውሉድ ዘአትረፉ ሎቱ

Deut 28:55 ይህብዎሙ ለለ አሐዱ እምኔሆሙ ሥጋ ውሉዶሙ ወይሴሰዩ እስመ ኢያትረፉ ሎሙ ወኢምንተ በምንዳቤ ዘይሣቅዩከ ጸለእቲከ በኩሎ አህጉሪከ

Deut 28:56 ወለእንተ ረኅጽኒ ይእቲ እምኔከሙ ወለእንተ ድክመተ ይእቲ ትሜህር እገሪሃ ሐዊር ውስተ ምድር እስመ ርኅጽ ይ(እ)ቲ ወድክመተ ትደነጽዎ ዐይና ለምታ ዘዲቤ ሕፅና ወለወልዳ ወለውለታ



Deut 28:57 ወለሥጋሃ ዘእምውስተ አባለ ውእቱ ወሕፃናሂ ዘወለደተ ትበልፆ ሶቤ ኅጥአት ኩሉ ጽሚሚተ በምንዳቤ ወበሥቃይ ዘይሣቂየክ ጸላኢክ በውስቴ አህጉሪክ

Deut 28:58 ወእመ ኢሰማዕክ ከመ ትግበር ኩሉ ዝንተ ነገሮ ለዝ ሕግ ዘጽሑፍ ውስተዝ መጽሐፍ እመ ትፈርህ ስመ ክቡር ወስቡሕ ዝንቱ ዘእግዚአ ብሔር አምላክክ

Deut 28:59 ወይገብር እግዚአ ብሔር ነኪረ መቅሠፍተክ ወመቅሠፍተ ዘርእክ ወመቅሠፍተ ዐቢይ ወምድምም ወደዌ እኩይ ወሕማም

Deut 28:60 ወያገብእ ለዕሌክ ኩሉ ደዌሆሙ ለግብጽ እኩይ ዝክቱ ዘኢፈራህክ እምኔሁ ወኢፈራህክ እምቅድመ ገጸሙ ወይተሉ ዲቤክ

Deut 28:61 ኩሉ ደዌ ወኩሉ መቅሠፍተ ዘኢኮነ ጽሑፍ ውስተዝ መጽሐፍ ሕግ ያመጽእ እግዚአ ብሔር ለዕሌክ እስክ ያጠፍኣክ ወእስክ ትድምሰሱ

Deut 28:62 ወትተርፉ ሕዳጠ በኖልቃ እምድኅረ ከመ ከዋክብተ ሰማይ አንትሙ በዝኅክሙ እስመ ኢሰማዕክሙ ቃለ እግዚአ ብሔር አምላክክሙ

Deut 28:63 ወበከመ ተፈሥሐ እግዚአ ብሔር ለዕሌክሙ ከመ ይግበር ሠናይተ ዲቤክሙ ወአብዘኅክሙ ከማሁ ይትፍሣሕ እግዚአ ብሔር ከመ ይሠሩክሙ (ለዕሌክሙ) ወትጠፍኡ እምድር እንተ ውስቴታ ተበውኡ ከመ ትትዋረስዋ

Deut 28:64 ወይዘርወክ እግዚአ ብሔር አምላክክ ውስተ ኩሉ አሕዛብ እምአጽናፈ ምድር እስክ አጽናፈ ምድር ወትትቂነይ ብህየ ለባዕድ አማልክት ለዕፀው ወለእብን ለዘ ኢታአምር አንተ ወኢአበዊክ

Deut 28:65 ወህየኒ በውስተ ውእቱ አሕዛብ ኢያዐርፈክ ወኢ(ያ)በወሐክ ትቂም በእገሪክ ወይሁበክ እግዚአ ብሔር በህየ ልበ ሕዙን ወአዕይንተ ጥፋአተ ወነፍሰ ምንሱተ

Deut 28:66 ወትከውን ሕ(ይ)ወቲክ ስቅልተ ቅድመ አዕይንቲክ ወትድንግፅ መዐልተ ወሌሊተ ወኢትትኤመን በሕይወቲክ

Deut 28:67 ለእመ ጸብሐ ትብል እፎ እንጋ ይመሲ ወለእመ መሰየ ትብል እፎ እንጋ ይጸብሕ እምፍርሀተ ልብ ዘትድንግፅ ወእምዝ ያስተሪኢየክ ውስተ አዕይንቲክ ወዘትርኢ

Deut 28:68 ወያገብኣክ እግዚአ ብሔር ውስተ ግብጽ በአሕማር ወእንተ ምድር በእግር ወዝክቱ ዘእቤ ኢትደግም እንከ ዓዲ ርኢዮታ

Deut 28:69 ወትከውኑ ብሂየ አግብርተ ወአእማተ ለፀርክሙ ወአልቦ ዘይምሕረክሙ



Deut 29:01 ወዝ ውእቱ ውእቱ ነገር ኪዳን ኩሎ ዘአዘዘ እግዚአብሔር ለሞሴ ከመ ይትካየዶሙ ለደቂቀ እስራኤል በምድረ ሞአብ ዘእንበለ ዝክቱ ኪዳን ዘተካየዶሙ በኬሮብ

Deut 29:02 ወጸውያሙ ሞሴ ለኩሎ ደቂቀ እስራኤል ወይቤሎሙ ለሊክሙ ርኤክሙ ኩሎ ዘገብረ እግዚአብሔር አምላክክሙ ለክሙ በምድረ ግብጽ ለዕሌ ፈርዖን ወለዕለ መገበቱ ወለዕለ ኩሎ ምድሩ

Deut 29:03 ዐቢየ መቅሠፍተ ዘርኢየ አዕይንቲክ ወዝክቱ ተአምረ ወመድምም ዐበይት ወእድ ጽንዕት ወመዝራዕተ ልዑል

Deut 29:04 ወኢወሀበክሙ እግዚአብሔር አምላክክሙ ልበ ከመ ተእምሩ ወበዐይን ተርአዩ ወአዝነ ከመ ትስምዑ እስከ ዛቲ ዕለተ

Deut 29:05 ወወሰደክሙ አርብዓ ዓም ውስቱ ገዳም ወአልባሲክሙ ኢበልየ ወአሣእኒክሙኒ ኢበልየ እምውስቱ እገሪክሙ

Deut 29:06 እንዘ እክለ ኢትበልዑ ወወይነ ወሜሰ ኢትሰቲዩ እስከ በጸሕክሙ ውስተዝ ብሔር ከመ ታእምሩ ከመ አነ ውእቱ እግዚአብሔር አምላክክሙ

Deut 29:07 ወወፅእ ሴዎን ንጉሠ ሐሴቦን ወአግ ንጉሠ መአብ ተቀበሉክሙ ይትቃተሉክሙ ወቀተልናሆሙ ወነሣእነ ምድሮ(ሙ)

Deut 29:08 ወወሀብክምዎሙ ይእቲ ለሮቤል ወጋድ ወለመንፈቀ ነገደ ምናሴ

Deut 29:09 ወዕቀቡ ከመ ትግበሩ ኩሎ ነገር ዘኪዳን ከመ ታእምሩ ኩሎ ዘትገብሩ

Deut 29:10 ወናሁ ቆምክሙ አንትሙ ኩልክሙ ቅድመ እግዚአብሔር አምላክክሙ ዐበይተ ነገድክሙ ወሊቃናቲክሙ ወመኳንንቲክሙ ወጸሐፍቲክሙ ወኩሎ ተባዕተ እስራኤል

Deut 29:11 ወአንስቲ(ያ)ክሙ ወውሉድክሙ ወግዩር ዘውስተ መእከለ ተዓይንቲክሙ እም[ወ]ፍሬ ዕፀውክሙ እስከ ጸዋሬ ማይክሙ

Deut 29:12 ከመ ትስምዑ ኪዳኖ ለእግዚአብሔር አምላክክሙ ወመርገሞ ለእግዚአብሔር አምላክክሙ ዘተካየደ ምስሌክሙ ዮም

Deut 29:13 ከመ ይረሲክ ሕዝቦ ሎቱ ወውእቱኒ ከመ ይኩንክ አምላክክ በከመ መሐለ ለአበዊክ ለአብርሃም ወለይስሐቅ ወለየዕቆብ

Deut 29:14 ወአኮ ለክሙ ለበሕቴትክሙ ዘአቀውም አነ ዝንቱ ኪዳን ወዘንተ መርገም



Deut 29:15 አለ ለእላሂ ሀለዉ ዝየ ምስሌክሙ ዮም እስመ ሌሊክሙ ታኣምሩ ዮም ዝየ ቅድመ እግዚአ ብሔር ኣምላክክሙ ወለእላሂ ኢሀለው ዝየ ዮም

Deut 29:16 እስመ ሌሊክሙ ታኣምሩ ዘከመ ነበርክሙ ውስቴ ምድረ ግብጽ ወዘከመ ኅለፍነ እንተ ማእከሎም ለእላክቱ ኣሕዛብ ወተዓዶናሆም

Deut 29:17 ወርኢይኮም ረኵሶም ወኣማልክቲሆም ዕፅ ወእብን ወብሩር ወወርቅ ዘገብሩ ሌሊሆም

Deut 29:18 ወኣልቦ እምውስቴተክሙ ኢብእሲ ወኢብእሲተ ወኢሕዝብ ወኢነገድ {ወኢነገድ} ወኢመንሂ ዘየኅድግ ልቦ (እመ) እግዚአ ብሔር ኣምላክክሙ ወይሐውር ያምልክሙ ለእላክቱ ኣማልክት ኣሕዛብ ወኢይኩን እምኔክሙ ሥርወ እኪት እንተ ትበቅላ ወትፈሪ ሕምዘ ወምሬተ

Deut 29:19 ወሰሚዕክሙ ቃለዝ መርገም ዘይቤ በልቡ ይሰሪ ሊተ እስመ በእበድ ልብ ገበርኩ ወሐርኩ ከመ ኢየዐሪ መዊተ መኣበሰ ምስሌ ዘኢኣበሰ

Deut 29:20 ኢይፈቅድ እግዚአ ብሔር ከመ ይሣህሎ እለ በጊዜሃ መዐቱ ለእግዚአ ብሔር ወቀኒኡ ለያውዕዮ ለውእቱ ብእሲ ወለይተልዎ ኩሎዝ መርገም ዘዝንቱ ኪዳን ዘጽሑፍ ውስተዝ መጽሐፍ ሕግ ወይሥዐር እግዚአ ብሔር ስሞ ኣምታሕተ ሰማይ

Deut 29:21 ወለያግብኣ እግዚአ ብሔር ውስተ እኪት ወለይፍልጦ እምኩሉ ደቂቀ እስራኤል በኩሉ ዝንቱ መርገም ዘዝንቱ ኪዳን ዘጽሑፍ ውስቴዝ መጽሐፍ ዘዝንቱ ሕግ

Deut 29:22 ወይበሉ ድኃሪ ተውልድ ደቂቀክሙ እለ ይትንሥኡ እምድኅሬክሙ ወነኪርኒ ዘይመፅእ እምርሑቀ ብሔር ወይርኢዩ መቅሠፍታ ለይእቲ ምድር ወደዌሃ ዘፈነወ እግዚአ ብሔር ለዕሌሃ

Deut 29:23 ተይ ወዚው ይነድድ ውስተ ኩሉ ይእቲ ምድር ወኢትዝራእ ወኢትበቅላ ወኢይወፅእ ውስቴታ ኩሎ ሐመልማል በከመ ገፍተኣ ሰዶም ወኅሞራ ወኣድያማ ወሴበይም እሌ ገፍተኣን እግዚአ ብሔር በመዐቱ

Deut 29:24 ወይብሉ ኩሉ ሕዝብ ለምንተ ከመዝ ገብራ እግዚአ ብሔር ለይእቲ ምድር ወምንተ ውእቱ መንሱቱ ለዝ መዐት ዐቢይ

Deut 29:25 ወይብሉ እስመ ኅደጉ ኪዳኖ ለእግዚአ ብሔር ኣምላክ ኣበዊሆም ዘተከየደ ምስለ ኣበዊሆም ኣሜ ኣውፀኦም እምድረ ግብጽ

Deut 29:26 ወሐሩ ወኣምለኩ ባዕደ ኣማልክተ ወሰገዱ ሎም ለዘ ኢያኣምሩ ወለዘ ኢይበቅሎም

Deut 29:27 ወተምዐ መዐተ እግዚአ ብሔር ለዕለ ይእቲ ምድር ወኣምጽኣ ለዕሌሃ ኩሎ መርገም ዘጽሑፍ ውስተዝ መጽሐፍ ሕግ



Deut 29:28 ወአሥዐሮሙ እግዚአብሔር እምድሮሙ በመዐተ ወበመንሱተ ወበመቅሠፍተ ዐቢይ ከመ ይእዜ ዘኅቡእ ለእግዚአብሔር አምላክነ

Deut 29:29 ወዘያስተፊኢሰ ለነ ወለውሉድነ ለዓለም ከመ ንግበር ኩሎ ዘይብል ዘሕግ

Deut 30:01 ወአሜ መጽአ ላዕሌከ ኩሎ ዝነገር በረከቱሂ ወመርገሙሂ ዘአቀምኩ ቅድሜከ ተዘከሮ በቅድሜከ ወበልብከ በውስተ ኩሎ አሕዛብ ኅበ ዘረወከ እግዚአብሔር ህየ

Deut 30:02 ወተመይጦ ኅበ እግዚአብሔር አምላክከ ወስመዕ ቃሎ ወኩሎ ዘኣነ እኤዝዘከ ዮም በኩሎ ልብከ ወበኩሎ ነፍስከ

Deut 30:03 ወይኅድግ ለከ እግዚአብሔር ኅግይኢከ ወይሣህለከ ወካዕቤ ያስተጋብኦከ እግዚአብሔር እምነ ኩሎ አሕዛብ እለ ውስቴቶሙ ዘረወከ ህየ

Deut 30:04 ወለእመኒ ውስተ አጽናፈ ሰማይ ዘረወከ ያስተጋብኦከ እምህየ እግዚአብሔር አምላክከ

Deut 30:05 ወይወስደከ እግዚአብሔር አምላክከ ውስተ ይእቲ ምድር እንተ ተዋረሱ አበዊከ ወትትዋረሰ ወይገብር ሠናይተ በላዕሌከ ወያበዝኅከ ወይሬሲያከ ፈድፋድ እምአበዊከ

Deut 30:06 ወያሴስሎ እግዚአብሔር ለዝክቱ ልብከ ወልቦሙ ለዘርእከ ከመ ታፍቅሮ ለእግዚአብሔር አምላክከ በኩሎ ልብከ ወበኩሎ ነፍስከ ከመ ትሕየው አንተ ወዘርእከ

Deut 30:07 ወያገብኦ እግዚአብሔር አምላክከ ለዝ መርገም ለዕሌ ፀርክ ወለዕለ እለ ይጸልኡከ ወለእለ ይሰድዱከ

Deut 30:08 ወእንተሰ ተመየጥ ወስማዕ ቃለ እግዚአብሔር አምላክከ ወግበር ትእዛዞ ኩሎ ዘ[ኣነ] እኤዝዘከ ዮም

Deut 30:09 ውብዙኅ ያጸንዐከ እግዚአብሔር አምላክከ በኩሎ ተግበረ እደዊከ ወበውሉደ ከርሥከ ወበዘርኦ ምድርከ ወበአስተዋልዶ እንሰላከ እስመ ይትመየጥ እግዚአብሔር አምላክከ ከመ ይትፈሣሕ ብከ ለሠናይተ በከመ ተፈሥሐ በአበዊከ

Deut 30:10 ለእመ ሰማዕከ ቃለ እግዚአብሔር አምላክከ ከመ ትዕቀብ ወከመ ትግብር ኩሎ ትእዛዞ ወኩሎ ኩነኔሁ ወፍትሐ ዘጽሑፍ ውስተዝ መጽሐፍ ሕግ ለእመ ገባእከ ኅቤ እግዚአብሔር አምላክከ በኩሎ ልብከ ወበኩሎ ነፍስከ

Deut 30:11 እስመ ዛቲ ትእዛዝ እንተ ኣነ እኤዝዘከ ዮም ኢኮነት ክብድ ወኢኮነ ርሕቅተ እምኔከ

Deut 30:12 ወኢኮነት ውስተ ሰማይ ወትብል ማኑ የዐርግ ለነ ውስተ ሰማይ ያመጽእ ለነ ወንሰመዓ ወንገብራ

Deut 30:13 ውኢኮነተ ማዕዶተ ባሕር ወትብል መኑ እምዓደወ ለነ መዕዶተ ባሕር ወያመጽእ ለነ ወያሰምዐናሃ ወንግብራ



Deut 30:14 እስመ ናሁ ቅርብተ ይእቲ ለከ ጥቀ ቃለ ውስተ አፉከኒ ወውስተ ልብከኒ ወውስቱ እደዊከኒ ከመ ትግበራ

Deut 30:15 ወናሁ ሢምኩ ቅድመ ገጽከ ዮም ሕይወተ ወሞት ሣናይተ ወእኪተ

Deut 30:16 ለእመ ሰማዕክሙ ቃለ እግዚአ ብሔር አምላክክሙ ወትእዛዛ ኩሎ ዘአነ እኤዝዘከ ዮመ ከመ ታፍቅሮ ለእግዚአ ብሔር አምላክከ ወትሖር በኩሉ ፍናዊሁ ወትዕቀብ ኩነኒሁ ወፍትሖ ወትሕየዉ ወትትባዝሖ ወይባርከከ እግዚአ ብሔር አምላክከ በኩሉ ምድር እንተ ውስቲታ ትበውእ ህየ ከመ ትትዋረሳ

Deut 30:17 ወለእመሰ ተመይጦ ልበከ ወአበየከ ሰሚዐ ወሰሐትከ ወሰገድከ ለባዕድ አማልክተ አይዳዕኩክሙ ናሁ ዮም ከመ ጠፊአ ትጠፍእ

Deut 30:18 ወኢይነውሖ መዋዕሊክሙ በምድር እንተ ውስቲታ ተዐድዉ ዮርዳንስ ህየ ከመ ትትዋረስዋ

Deut 30:19 ናሁ አሰምዕ ለክሙ ዮም ሰማየ ወምድር ከመ ሢምኩ ቅድሜከ ሕይወተ ወሞት ወበረከተ ወመርገም ወሕረያ ለከ ለሒይወተ ከመ ትሕየው አንተ ወዘርእከ

Deut 30:20 ወአፍቅሮ ለእግዚአ ብሔር አምላክከ ወስማዕ ቃሎ ወአጽንዖ ኪያሁ እስመ ውእቱ ሕይወቲከ በዘ ቦተ ይነውኅ መዋዕሊከ ከመ ትንበር ውስተ ምድር እንተ ምሐለ እግዚአ ብሔር ለአበዊከ ለአብርሃም ወለይስሐቅ ወለያዕቆብ ከመ የሃበሙ

Deut 31:01 ወፈጸመ ሞሴ ንግሮቶሙ ለኩሉ ደቂቀ እስራኤል ዘንተ ኩሎ ነገሮ

Deut 31:02 ወይቤሎሙ ምእት ወዕሥራ ዓም ሊተ ዮም ወኢይክል እንከ በዊአ ወወፂአ ወይቤለኒ ባሕቱ እግዚአ ብሔር ኢተዐድዎ ለዝ ዮርዳንስ

Deut 31:03 ውእቱ እግዚአ ብሔር ዘየሐውር ቅድሜከ ውእቱ ያጠፍአሙ ለእሉ አሕዛብ እምቅድመ ገጽከ ወትትዋረሶሙ ወዮሳዕኒ ዘየሐውር ቅድመ ገጽከ ወበከመ ይቤ እግዚአ ብሔር

Deut 31:04 ከማሁ ይገብሮሙ እግዚአ ብሔር በከመ ገብሮሙ ለሴዎን ወለአግ ለክልኤቱ ነገሥተ አሞሬዎን እለ ይነብሩ ውስተ ማዕዶተ ዮርዳንስ ወለምድሮሙ በከመ ሠረዎሙ

Deut 31:05 ወአግብአሙ እግዚአ ብሔር ለክሙ ወገበርዎሙ በከመ አዘዝኩክሙ

Deut 31:06 ተተባዕ ወ(ተ)ጽናዕ ወኢትፍራህ ወኢትደንግዕ ወኢትፀብስ በቅድሜ ገጸሙ እስመ እግዚአ ብሔር አምላክከ ውእቱ ይሐውር ቅድሜከ ወምስሌከ ወኢየሐድገከ ወኢያሰ(ተ)ተከ

Deut 31:07 ወጸውዖ ሞሴ ለዮሴዕ ወይቤሎ በቅድሜ ኩሉ እስራኤል ትባዕ ወጽናዕ እስመ አንተ ትበውእ ቅድሜሁ ለዝ ሕዝብ ውስተ ምድር እንተ መሐለ እግዚአ ብሔር ለአበዊከ ከመ የሃበሙ ወአንተ ታወርሶሙ



Deut 31:08 ወእግዚአ ብሔር የሐውር ምስሌክ ወኢየሐድገክ ወኢያሰ(ኅ)ተክ ወኢትፍራህ ወኢትደንግፅ

Deut 31:09 ወጸሐፎ ሞሴ ለነገረ ዘሕግ ውስቴ መጽሐፍ ወወሀቦሙ ለካህናት ለእለ ይጸውሩ ታቦተ ሕጉ ለእግዚአ ብሔር ለደቂቀ ሌዊ ወለሊቃናቶሙ ለደቂቀ እስራኤል

Deut 31:10 ወአዘዘሙ ሞሴ በይእቲ ዕለት ወይቤ እምድጎረ ሰብዐቱ ዓመት በዓመተ ኅድገተ አመ በዓለ መጸለተ

Deut 31:11 ዘእመ የሐውር ኩሉ እስራኤል ከመ ያስተርኢ ቅድመ እግዚአ ብሔር አምላክክ ውስተ መካን ዘኅረየ ወአንብብዎ ለዝ ግሕ ቅድመ እስራኤል

Deut 31:12 አስተጋቢእክ ሕዝብ ከመ ይስምዑ ዕዱ ወአንስቱ ወደቂቁ ወግድራን እለ ውስተ ሀገርክሙ ከመ ይስምዑ ወያአምሩ ፈሪሆቶ ለእግዚአ ብሔር አምላክክሙ ወሰሚረሙ ከመ ይግበሩ ኩሉ ሕጎ ለዝ ቃል

Deut 31:13 ወደቂቆሙኒ እለ ኢያአምሩ ይሰምዑ ወይትመሀሩ ፈሪሆቶ ለእግዚአ ብሔር አምላክክሙ በኩሉ መዋዕሊሆሙ ዘሐየው እሙንቱ ዲቤ ምድር እንተ ውስቴታ ተዐድው ዮርዳንስ አንትሙ ከመ ትትዋረስዋ ብህየ

Deut 31:14 ወይቤሉ እግዚአ ብሔር ለሞሴ ናሁ ቀርብ መዋዕለ ሞተክ ጸውዖ ለዮሴፅ ወቁም ኅቤ ጥኅተ ደብተራ ዘመርጡር ወእኤዝዝ ወሐሩ ሞሴ ወዮሴፅ ውስተ ደብተራ ዘመርጡር ወቆሙ ኅቤ ጥኅተ ደብተራ ዘመርጡር

Deut 31:15 ወወረደ እግዚአ ብሔር በዐምደ ደመና ወቆሙ ኅቤ ጥኅተ ደብተራ ዘመርጡር ወቆሙ ዐምደ ደመናኒ ኅቤ ጥኅተ ደብተራ ዘመርጡር

Deut 31:16 ወይቤሉ እግዚአ ብሔር ለሞሴ ናሁ ትነውም አንተ ምስለ አበዊክ ወይትነሣእ ሕዝብ ወይዜሙ ድጎረ አማልክተ ባዕድ ዘውስተ ምድር እንተ ውስቴታ ይበውሉ ወይጎድጉኒ ወይትዔወሩ ኪዳንየ ዘተካየድክዎሙ

Deut 31:17 ወእትሜዐፅ መዐት ለዕሌሆሙ በይእቲ ዕለተ ወአጎድጎሙ ወእመይጥ ገጽየ እምኔሆሙ ወይክውኑ መብልፅ ለፀሮሙ ወትረክብ ብዝኅተ እኪተ ወሥቃየ ወይብል በይእቲ ዕለተ እስመ ኅደገኒ እግዚአ ብሔር አምላክየ ወኢህለወ ምስሌኑ ረከበተነ ዛቲ እኪት

Deut 31:18 ወአንሰ መይጥ እመይጥ ገጽየ እምኔሆሙ በይእቲ ዕለተ እስመ ኩሉ ኅጢአቶሙ ዘገብሩ ወገብኡ ኅብ አማልክተ ባዕድ

Deut 31:19 ወይእዜኒ ጸሐፉ ነገራ ለዛቲ ማኅሌት ወመሀርዎሙ ኪያሃ ለደቂቀ እስራኤል ወደይዋ ውስቴ አፉሆሙ ከመ ትኩነኒ ዛቲ መኅሌት ስምዐ ለዕሌ ደቂቀ እስራኤል

Deut 31:20 እስመ አበውአሙ ውስተ ምድር ቡርክተ እንተ መሐልኩ ለአበዊሆሙ ምድር እንተ ተውሕዝ ሐሊበ ወመዐር ወበሊሆሙ ወጸጊቦሙ ይዐብዱ ወይገብኡ ኅብ አማልክተ ባዕድ ወያመልክዎሙ ወያምዕዑኒ ወይጎደጉ ኪዳንየ



Deut 31:21 ወትቀውም ላዕሌሆሙ ዛቲ መኅሌተ ስምዕ ቅድመ ገጽሙ እስመ ኢትትርሳዕ እምውስተ አፉሁ ወእምውስተ አፈ ውሉዶሙ እስመ ኣነ አአምር እከዮሙ ኩሉ ዘይገብሩ በዝዩ ዘእንበለ አበአሙ ውስተ ይእቲ ምድር ቡርክት እንተ መሐሐልኩ ለአበዊሆሙ

Deut 31:22 ወጸሐፋ ሞሴ ለዛቲ ማኅሌተ በይእቲ ዕለት ወመሀሮሙ ኪያሃ ለደቂቀ እስራኤል

Deut 31:23 ወአዘዞ[ሙ] ሞሴ ለዮሴፅ ወይቤሎ ጽናዕ ወጥባዕ እስመ አንተ ታብውአሙ ለደቂቀ እስራኤል ውስተ ምድር እንተ መሐለ እግዚአ ብሔር ለአበዊሆሙ ወውእቱ ይሄሉ ምስሌክ

Deut 31:24 ወሶበ አኅለቆ ሞሴ ጽሒፈ ለዝ ነገር ሕግ ውስቴ መጽሐፍ እስከ ፈጸመ አዘዞሙ ለሌዋዊያነ ለእለ ይጸውሩ ታቦተ ሕጉ ለእግዚአ ብሔር

Deut 31:25 ወይቤሎሙ ገሥኡ ዘንተ መጽሐፍ ወእንበርዎ ውስቴ ከርሣ ለታቦተ ሕጉ ለእግዚአ ብሔር አምላክክ ወይነበር ህዩ ለክ ስምዕ

Deut 31:26 እስመ ኣነ አአምር ወሕከተክ ወክሳድክ ጽኑዕ ዘእንዘ[.] ሀለውኩ ኣነ ዓዲዩ ሕያው ዮም አምዕዕክሙዎ ለእግዚአ ብሔር እፎኬ ፈድፋድ እምድኅረ ሞትኩ

Deut 31:27 ወአስተጋብኡ ኅቤዩ ዐበይተ ነገድክሙ ወሊቃናቲክሙ ወመኳንንቲክሙ ወጸሐፍቲክሙ ከመ እንገሮሙ ይስምዑ ኩሉ ዘንተ ነገር ወአስምዕ ላዕሌሆሙ ሰማይ ወምድር

Deut 31:28 እስመ አአምር ከመ እምድኅረ ሞትኩ አበሳ ትኤብሱ ወተኅድግዋ ለፍኖተ እንተ አዘዝኩክሙ ወትመጽእ ላዕሌክሙ እኪት በደኃሪ መዋዕለ እስመ ትገብሩ እኪተ ቅድመ እግዚአ ብሔር አምላክክሙ ከመ ታምዕዕዎ በግብረ እደዊክሙ

Deut 31:29 ወነገሮሙ ሞሴ ወአስምዖሙ ለኩሎ መኅበረ እስራኤል ነገራ ለዛቲ መኅሌተ ፍጹመ

Deut 32:01 ወይቤ አጽምእ ሰማይ ወስማዕ ምድር ቃለ አፉዩ

Deut 32:02 ወተወከፍዎ ከመ ነጠብጣበ ለነገርዩ ወይወርድ ከመ ጠል ቃልዩ ወከመ ዝናም ውስተ ገዳም ወከመ ጌሜ ዲቤ ሣዕር

Deut 32:03 እስመ ስመ እግዚአ ብሔር ጸዋዕኩ አግባኡ ዕበዩ ለእግዚአ ብሔር

Deut 32:04 እስመ ጽድቅ ግብሩ ለእግዚአ ብሔር ወርቱዕ ኩሉ ፍናዊሁ እግዚአ ብሔር ጸድቀ ወአልቦ ዐመፃ ጸድቅ ውኄር ውእቱ እግዚአ ብሔር

Deut 32:05 አበሱ ወአኮ ሎቱ ውሉደ ዐማኒያን ተውልድ ዕሉት ወግፍትእት ዝንተኑ ተዑሢይዎ ለእግዚአ ብሔር

Deut 32:06 ዝሕዝብ አብድ ወአልቦ ጥበበ ወአኩኑ ውእቱ አቡክ ዘፈጠረክ ወገበረከሂ ወፈጠረከሂ



Deut 32:07 ተዘክሩ መዋዕለ ዓለም ወለብው ተውልደ ተውልድ ተሰአሎ ለአቡከ ወያየድዐከ ወለአእሩጊክሙኒ ወይነግሩከ

Deut 32:08 አሜ ከፈሎሙ ልዑል ለአሕዛብ ዘከመ ዘርኦሙ ለደቂቀ አዳም ወአቀመ አድባሪሆሙ ለአሕዛብ ወበበ ጥልቆሙ ለመላእክተ እግዚአ ብሔር

Deut 32:09 ወኮነ መክፈልተ ሕዝቡ ለእግዚአ ብሔር ያዕቆብ ወሐብለ ርስቱ እስራኤል

Deut 32:10 ወዐቀቦ በምድረ በድው በውስተ ፋልል በሐሩር ወበጽምእ ሐጸሮ ወአጥበቦ ወዐቀቦ ከመ ብንተ ዐይን

Deut 32:11 ከመ ንስር ዘይከድን እጃሊሁ ወይሐቅፍ ወጸሮሙ በክናፊሁ ወይሐቅፎሙ በገበዋቲሁ

Deut 32:12 እግዚአ ብሔር ባሕቴቱ መርሐሙ ወአልቦ ባዕድ አማልክት ምስሌሁ

Deut 32:13 ወአዕረጎሙ ዲበ ኀይላ ለምድር ወሴሰዮሙ እክለ ገራውህ ወሐፀኖሙ በመዓረ እምኩኩሕ ወሰተዩ እምኩኩሕ ጽንዕት

Deut 32:14 በቅብአ ላህም ወበሐሊ በ አባግዕ ምስሌ መቀሩዓለ አጣሊ ወአባግዕ ወእጉላ አልህምተ ወአጣሊ ምስሌ አንጉዐ ስርናይ ወደመ አስካለ ሰትየ ወይን

Deut 32:15 ወበልዐ ያዕቆብ ወጸገበ ወከረዮ ጽጋብ ለፍቁርየ ወስብሐ ወገዘፈ ወርሐበ ወከረዮ ጽጋብ ወኀደጎ ለእግዚእ ለዘ ገብሮ ወኮነት ወፅአተ እምእግዚአ ብሔር ሒወቱ

Deut 32:16 ወአምዕዑኒ በዘ ባዕድ ወአምረሩኒ በረኩሶሙ

Deut 32:17 ወሦው ለአጋንንት ወአኮ ለእግዚአ ብሔር ለአማልክተ እለ ኢያአምርዎሙ እለ ግብተ ይትገበሩ በምዕር ወኢይበቀሁ ወእለ ኢያአምሩ አበዊሆሙ

Deut 32:18 ወሐደጋሁ ለእግዚአ ብሔር ዘወለደከ ወረሣዕኮ ለእግዚአ ብሔር ዘሐፀነከ

Deut 32:19 ወርእየ እግዚአ ብሔር ወቀንኦ ወተምዐ መዐተ ለዕሌ ደቂቆሙ ወለዕለ አዋልዲሆሙ

Deut 32:20 ወይቤ እመይጥ ገጽየ እምኔሆሙ እርኢዮሙ ምንተ ይከውን ላዕሌሆሙ በድኃሪ መዋዕል እስመ ተውልድ ዕሉት ውእቶሙ ወውሉድ እለ አልበሙ ሃይማኖተ

Deut 32:21 እሙንቱ አቅንኡኒ በዘ ኢኮነ አምላክ ወአምዕዑኒ በአማልክቲሆሙ ወአነሂ አቀንኦሙ በዘ ኢኮነ ሕዝብ ወአምዶሙ ብሕዝብ ዘኢይሌቡ

Deut 32:22 እስመ እሳት ትነድድ እምዐትየ ወታውዒ እስከ ሲኦል ታሕቱ ወትበልዖ ለምድር ወልእክል ወታነድድ መሰረታተ አድባር



Deut 32:23 ወአስተጋብአሙ ለእኪት ወአሐልቅ አሕጻየ በላዕሌሆሙ ወይትሜሰው በርኃብ ወይከውኑ መብልዐ ለአዕዋፋተ

Deut 32:24 ወይደክም ጽንዖሙ ወእፌኑ ስነ አራ(ዊ)ተ ምድር ምስለ ሕምዝ ከመ ይጉየዩ እምድር

Deut 32:25 ወእምአፍአ ታጠፍኦ ውሉዶሙ መጥባኅተ ወበውስተ አብያተ ፍርሃተ ወሬዛ ምስለ ድንግል ወሕፃን ምስለ አረጋዊ

Deut 32:26 ወእቤ ከመ እዝረዎሙ ወእሥዕር እምድር ዝክሮሙ ወእምእጸለ እመሕያው

Deut 32:27 ወሶቤ አኮ በመንሱት ፀር ከመ ኢይኑኅ መዋዕሊሆሙ ከመ ኢይትዐበዩ ፀር ወኢይበሉ እዴነ ፀንዕት ወአኮ እግዚአ ብሔር ዘገብሮ ለኩሉ ዝንቱ

Deut 32:28 እስመ ሕዝብ ሕጉለ ምክር ውእቱ ወአልበሙ ኅፍረት

Deut 32:29 ወኢሐለዩ ከመ ያእምርዎ ለዝንቱ ወኢያአምርዎ ለመዋዕለ ዘይመጽእ

Deut 32:30 እፎ ያነትዖሙ አኅዱ ለዐሠርቱ ምእት ወክልኤቱ ይሰድድዎሙ ለእልፍ እስመ እግዚአ ብሔር ፈድዮሙ ወእግዚአ አግብአሙ

Deut 32:31 እስመ ኢኮኑ ከመ አምላክነ አማልክቲሆሙ ወፀርነሰ አብዳን

Deut 32:32 እስመ ዐጸደ ወይነ ሴዶም ዐጸደ ወይኖሙ ወአሕረኅሙሂ እመ ግሙራ ወአስከሎሙሂ አስካለ ሐሞት ወቀምሐሙሂ መሪር

Deut 32:33 ወሕምዘ አርዌ ምድር ወይኖሙ ወሕምዘ አፍዖት ዘይቀትል

Deut 32:34 አኮኑ ዝንቱ ዘኅልቀ በኅቤየ ወተሐትመ ውስተ መዛግብቲየ

Deut 32:35 ወበዕለተ ተብቀሎ እትፈደይ በመዋዕለ ዛትድኅጽ እግሮሙ እስመ ቀርበት ዕለተ ኅርትምናሆሙ ወበጽሐ ወድሉተ ይእቲ ለክሙ

Deut 32:36 እስመ ይፈተኅ ለሕዝቡ እግዚአ ብሔር ወይትናበብ በእንተ አግብርቲሁ እስመ ርኢዮሙ ከመ ደክሙ ወሐልቁ ወእምዝ ይስሕብዎሙ

Deut 32:37 ወሶቤ ሰርሑ ይቤ እግዚአ ብሔር አይቱ ውእቱ አማልክቲሆሙ እለ ቦሙ ተወከሉ

Deut 32:38 እለ ትበልዑ መሰብሕተ መሥዋዕቶሙ ወትሰቲዩ ወይን ሞጸኅቶሙ ለይትነሥኡ ወይርድኡክሙ ወለይኩኑክሙ መድኅናን



Deut 32:39 አእመሩ አእምሩ ከመ አነ ውእቱ ወአልቦ ባዕድ አምላክ ዘእንበሌየ አነ እቀትል ወአሐዩ ወአነ አቈስል ወእፌውስ ወአልቦ ዘያመስጥ እምእደዊየ

Deut 32:40 እስመ አልዕል ውስተ ሰማይ እደዊየ ወእምሕል በየማንየ ወእብል ሕያው አነ ለዓለም

Deut 32:41 ወአበልሓ ከመ መብረቅ ለመጥበሕቲየ ወትቀውም እዴየ በኩነኔየ ወእትፈደዮሙ በቀለ ለፀርየ ወእትቤቀሎሙ ለጸላእቲየ

Deut 32:42 ወአሰክሮን በደም ለሕዳየ ወአበልዓ ሠጋ ለመጥባኅቲየ አመደመ ቅቱላን ወዚውዋን አምኦርእስተ መላእክተ ፀር

Deut 32:43 ተፈሥሐ ሰማያት ኅቡር ምስሌሆሙ ይሰግዱ ሎቱ ኩሎ መላእክተ እግዚአ ብሔር ለይትፈሥሐ አሕዛብ ምስሌ ሕዘቢሆሙ ወለያጽንዕዎ መላእክተ እግዚአ ብሔር

Deut 32:44 እስመ ይትቤቀል ደመ ደቂቄ ወይትቤቀለ ወይትፈደዮሙ በቀለ ለፀሩ ወይትቤቀሎሙ ለጸላእቱ ወያነጽሕ እግዚአ ብሔር መድር ለሕዝቡ

Deut 32:45 ወጸሐፉ ሞሴ ለዛቲ ማኅሌት በይእቲ ዕለተ ወመሀሮሙ ለደቂቀ እስራኤል ወቦአ ሞሴ ወነገሮሙ ለሕዝብ ወአሰምያሙ ውእቱ ወዮሰዕ ወልደ ኔዌ

Deut 32:46 ወሶሴ አሕለቀ ሞሴ ነግሮቶሙ ለኩሎ እስራኤል ወይቤሎሙ ተዐቀብዎ በልብክሙ ለኩሎዝ ነገር ዘአስማዕኩ አነ ላዕሌክሙ ዮም ዘትኤዝዙ ለደቂቅክሙ ዮም ከመ ይዕቀቡ ወይግበሩ ኩሎ ነገሮ ለዝ ሕግ

Deut 32:47 እስመ ኢኮነ ከንቱ ዝንቱ ነገር ለክሙ እስመ ውእቱ ሕይወትክሙ ወበእንተ ዝንቱ ነገር ይነውኅ መዋዕሊክሙ ውስተ ምድር እንተ ላቲ ተዐድው ዮርዳንስ ከመ ትትዋረስዋ ብህየ

Deut 32:48 ወነበቦ እግዚአብሔር ለሙሴ በይእቲ ዕለት ወይቤሎ ዕረግ ውስተ ደብር አብሪም ዘውእቱ ደብር ናደር ዘውስቴ ደብር ሞክብ ዘውስቴ ገጸ ኢያሪኮ ወርኢያ ለምድር ክናኣን እንተ እህቦሙ ለደቂቀ እስራኤል ይምልክዋ

Deut 32:49 ወሙት በውስተ ደብር ዘውስቴቱ ተዐርግ ህየ ውእቱ ወእደ ሕዝብከ በከመ ሞተ ኦሮን እኑከ በውስቴ ደብር ሆር ወአተወ ኅብ ሕዝቡ

Deut 32:50 እስመ ክሐድክሙ በቃልየ በኅቤ ደቂቀ እስራኤል በውእደ ማይ ቅሥት በቃዴስ በገዳም ዘሲና እስመ ኢቀደስክሙኒ ውስቴ ደቂቀ እስራኤል

Deut 32:51 ርኢያ ለይእቲ ምድር ቅድሚከ ወህየሰ ኢትበውእ

Deut 33:01 ወከመዝ ውእቱ በረከቱ ዘባረኩሙ ሙሴ ለደቂቀ እስራኤል ብእሴ እግዚአ ብሔር እምቅድመ ይሙት



Deut 33:02 ወይቤ እግዚአብሔር እምሲና መጽአ ወአስተርአየኝ በሴይር ወአዕረፈ በደብሪ ፋራጌ ምስለ አእላፍ ቅዱሳን እለ እምየማኑ መላእክቲሁ እለ ምስሌሁ

Deut 33:03 ወመሐኮ ለሕዝቡ ወለኩሉ እለ ተቀደሱ በእደዊሁ ወእሉሂ እሊአከ እሙንቱ

Deut 33:04 ወረከቡ ሕገ በቃለ ዚአሁ ዘአዘዘኝ ወርስተ ለሕዝበ ያዕቆብ

Deut 33:05 ወይከውን መእከለ እምውስቴ ፍቁር ተጋቢአሙ መለእክት አሕዛብ ምስለ ነገደ እስራኤል

Deut 33:06 አሐሥሶ ለርቤል ወኢይሙተኒ ወይከውን ብዙኅ ጥልቀኢ

Deut 33:07 ወዛቲ ለይሁዳ ስምዖ እግዚአብሔር ለይሁዳ ወይገብእ ውስቴ ሕዝቡ ወእደዊሁ ይኩናናሁ ወኩኖ ረዳኤ እምፀሩ

Deut 33:08 ወለሌዊኒ ይቤሎ አግብእ ለሌዊ ቃሎ ወጽድቆ ለብእሲ ጸድቅ ዘአመክርዎ በምክራ ወጸአልዎ በኀቤ ማየ ቅሥተ

Deut 33:09 ዘይቤሎ ለአቡሁ ወለእሙ ኢርኢኩከ ወበአጋዊሁኒ ኢያአምራ ወበደቂቁኒ ኢለበወ ወዐቀበ ቃልከ ወተማሕፀን ኪዳንከ

Deut 33:10 ከመ ይንግሩ ኩነኔከ በያዕቆብ ወሕግከ በእስራኤል ወከመ ይደዩ ዕጣን በመዕጠንቲከ ወበኩሉ ጊዜ ውስቴ ምሥዋዔከ

Deut 33:11 ወባርክ እግዚአብሔር ኀይሎ ወተወከፍ ግብረ እደዊሁ ወአውርድ ክበደ ለዕሌ እለ ይትቃወምዎ ፀሩ ወኢታንሥአሙ ለእለ ይጸለእዎ

Deut 33:12 ወለብንያመሂ ይቤሎ ፍቁረ እግዚአብሔር የኀድር ተአሚኖ ወእግዚአብሔር ይጼልሎ በኩሉ መዋዕሊሁ ወያዐርፍ መእከለ መታክፍቲሁ

Deut 33:13 ወለዮሴፍሂ ይቤሎ እምበረከተ እግዚአብሔር ምድሩ እምዝናም ሰማይ ወጠል ወነቅዐ ቀላይ ዘእምታሕቱ

Deut 33:14 ወለለ ሰዐቱ እክሉ እምሠርቀ ፀሐይ ወእምጥልቆሙ ለአውራኅ

Deut 33:15 ወይቀድም እምውስተ አርእስተ አድባር ወእምውስተ አርእስተ አውግር ዘአኤናዎን

Deut 33:16 ምድር እንተ ዘልፈ ጽግብተ ወሠናይተ ለዘ አስተርአየ በውስተ ዕጸተ ዘባጦስ ለይምፃእ ዲቤ ርእሱ ለዮሴፍ ወበርእሱ ይክበር ውስተ አኅዊሁ ከመ በኩር ላህም ሥኖ



Deut 33:17 ወአቅርንተ ዘአሐዱ ቀርኑ አቅርንቲሁ ወይወገኦሙ ለአሕዛብ ቦሙ ኅቡር እስከ አጽናፈ ምድር ዝንቱ አእላፍ ዘኤፍሬም ወዝንቱ አእላፍ ዘምናሴ

Deut 33:18 ወለዛብሎንሂ ይቤሎ ተፈሣሕ ዘቡሎን በፅአትከ ወይዘከር በመኃድሪክ እለ ያጠፍእዎሙ ለአሕዛብ

Deut 33:19 ወጸውዑ ብህየ ወሡዑ መሥዋዕተ ጽድቅ እስመ ብዕለ በሕር የኅፅነከ ወንዋዮሙ ለእለ ይነብሩ ውስቴታ ጳራልያ

Deut 33:20 ወለጋድሂ ይቤሎ ርሐብ በረከቱ ለጋድ ከመ አንበሰ ቀጥቂጦ መዝራዕቱ ወመላእክተ

Deut 33:21 ወርእየ ቀዳሜ[ሁ] ከመ በሂየ ተከፈልዋ ለምድር መላእክት [እ]ንዝ [ጉቡኣ]ን መሳፍንተ ኅቡረ ምስለ መልአክ ሕዝብ ወምስለ ሕዝብ እስራኤል እግዚአ ብሔር ገብረ ጽድቅ ወኩነኒሁ [ም]ስለ እስራኤል

Deut 33:22 ወለዳንሂ ይቤሎ ዳን እጃለ አንበሳ ወይሰርር እምባሳን

Deut 33:23 ወለንፍታሌምሂ ይቤሎ ንፍታሌም ጽጉብ እምሠናይት ይጸግብ እምበረከተ እግዚአ ብሔር ወለይትዋረስ በሕር ወሊብ

Deut 33:24 ወለአሰርሂ ይቤሎ ቡሩክ ውእቱ እምውሉደ አሴር ወይከውን ኅሩየ ለአኃዊሁ ወየሐፅብ በቅብእ እገሪሁ

Deut 33:25 ወዘኅጺን ወዘብርተ አሣእኒሁ ወይከውን በከመ መዋዕሊከ ኅይልከ

Deut 33:26 አልቦቱ ከመ አምላኩ ለፍቁር ዘይነብር ዲበ ሰማይ ውእቱ ርዳኢኮ ወዕበየ ሥኑ ለሰማይ

Deut 33:27 ወይከድነከ እግዚአ ብሔር ፍጹም በኅይ(ለ) መዝራዕቱ አኤናዎን ወይወፅእ እምቅድመ ገጽከ ፀር በከመ ይቤ ከመ ያጥፍኦሙ

Deut 33:28 ወያነብሮ ለእስራኤል ተአሚኖ ባሕቱቶ ውስተ ምድር ያዕቆብ ውስተ ምድረ ስርናይ ወወይን ወሰማየኒ ለከ ምስለ ደመና ወጠል

Deut 33:29 ወብፁዕ እንተ እስራኤል መኑ ከማከ ሕዝብ ዘእግዚአ ብሔር ያድኅኖ ወያጸንዐከ ወይረድአከ ወበመጥባኅትከ ዕልገቲከ ወሐሰወ[ነ] ፀ[ር]ከ ወአንተ ትዂዐን ለዕለ ክ[ሳዳቲ]ሆሙ።

Deut 34:01 [ወዐርገ] ሞሴ እምአራብድ ዘሞአብ ውስተ ደብር ናበጥ ውስተ ርእሰ ፋስካ ዘሀለወ ቅድመ ኢያሪኮ ወአርአዮ እግዚአ ብሔር ኩሉ ምድር ገላኦድ ወኩሉ ምድረ ንፍታሌም ወኩሉ ምድረ ምናሴ ወኩሉ ምድረ ይሁዳ እስከ ደኅሪተ ባሕር

Deut 34:02 ወገዳሙ ወአድያሚሃ ለኢያሪኮ ሀገር ፊኒቆን እስከ ሴጎር



Deut 34:03 ወይቤሎ እግዚአብሔር ለሞሴ ዛቲ ይእቲ ምድር እንተ መሐልኩ ለአብርሃም ወለይስሐቀ ወለየዕቆብ ወአቤሎሙ ለዘርእክሙ እህበ ወናሁ አርአየኩክዋ በአዕይንቲክ ወህየ ባሕቱ ኢትበውእ

Deut 34:04 ወሞተ ሞሴ ቀዳሄሁ ለእግዚአብሔር በምድር ሞአብ በቃለ እግዚአብሔር

Deut 34:05 ወቀበርዎ ውስተ ምድር ቅሩብ ቤተ ፌጎር ወአልቦ ዘያአምር መኑሂ መቃብሮ እስከ ዛቲ ዕለተ

Deut 34:06 ወምእተ ወዕሥራ ዓመቲሁ ሎቱ ለሞሴ ወእመ ሞተ ኢተሐምጐ አዕይኒቲሆ ወኢማስነ

Deut 34:07 ወበከይዎ ደቂቀ እስራኤል ለሞሴ በአራቦተ ዘሞአብ በጎበ ዮርዳኖስ ዘመንገሌ ኢያሪኮ ሠለሰ መዋዕል ወተፈጸመ መዋዕለ ለሐ ለሞሴ ዘበከይዎ

Deut 34:08 ወዮሴዕሰ ወልደ ኔዌ ተመለአ መንፈሰ ጥበብ እስመ ወደየ እደዊሁ ሞሴ ላዕሌሁ ወተአዘዙ ሎቱ ኩሉ ደቂቀ እስራኤል ወገብሩ በከመ አዘዞ እግዚአብሔር ለሞሴ

Deut 34:09 ወኢተንሥአ እንከ ነቢይ ውስተ እስራኤል ዘከመ ሞሴ ዘተናገሮ ለእግዚአብሔር ገጸ በገጽ

Deut 34:10 ወበኩሉ ተአምረ ወመድምም ዘፈነወ እግዚአብሔር ከመ ይግበሮ በምድረ ግብጽ ለዕሌ ፈርዖን ወመገብቱ ወለዕሌ ምድሩ

Deut 34:11 ዐበይተ ወመድምም ወእደ ጽንዕተ ወመዝራዕተ ልዑል ኩሎ ዘገብረ ሞሴ በቅድመ ኩሉ እስራኤል

ተፈጸመ ዳግም ኦሪት